

DIE NUWE BYBEL

BOEK 3

DIE BEKRAGTING

DIE NUWE BYBEL

BOEK 3

DIE BEKRAGTIGING

Uit MY WESE, JAHSHUA-MIRIAM-GEES, blink 'n nuwe more, 'n geleentheid vir elkeen om by MY te wees en hulle gereinigde bestaan te omvorm tot totale diensbaarheid. Geeneen wat sorgeloos rondom geloof lewe, kan dit deelagtig word nie, want soos die mossie net soek na sy daaglikse brood, sal net die wat MY soos daaglikse Brood opsoek, Krag van geloof ontvang om lewende werke vir MY te verrig.

HOOFSTUK 1 -

DIE LIEFDE

1) Die LIEFDE se Krag lê in MY VOLHEID. MIRIAM, die spreker in hierdie Boek, is die barende wat Krag sal bewerk, aangesien WYSHEID en Krag MY saad in HAAR laat vrugdra.

2) Geen Ware gelowige kan MY vind, sonder die LIEFDE nie. Slegs met die uitlewing van die LIEFDE, sal EK herkenbaar word en in al MY vorme woning maak by jou. As EK eers woning gemaak het en die LIEFDE, MIRIAM, genooi word om by jou intrek te neem, wat daarmee saam WYSHEID in jou laat groei deur die vereniging van jou gees met MY GEES, MIRIAM, kan EK met julle verenig, al woon EK reeds in jou hart en dan eers sal Krag daaruit spruit.

3) Laat niemand twyfel oor die begin van hierdie skrywe nie, want soos elkeen weet, sal EK alleen bekragtig wie EK wil en toevertrou wat EK wil. Geen Kennis uit die Hoogte is toe te vertrou aan liefdelose, onheiliges nie. Daarom is MY Kruik, hierdie skryfneg, die olie waardig.

4) Laat julle geloof versterk word in die wete dat EK julle dra in swaar tye en al wat EK vra, is ootmoed en nederigheid om 'n groeibodem vir LIEFDE te kan wees.

5) Laastens is LIEFDE die reiniger om Krag die goeie grond te gee wat dit nodig het om 'n goeie oes te lewer.

6) LIEFDE is die Allerheiligheid wat elkeen moet raaksien in die Skepping om dankbaarheid te laat groei, sodat die Moeder van bestaan, die LIEFDE, 'n tuiste kan vind in daardie hart. 'n Dankbare kind word altyd met meer gewes beloon, want hy sal dit oppas en ontwikkel.

7) Geen taak sal uitgedeel word om te doen as daar nie rede

is tot groei nie. EK is ewig en groei elke dag om nuwe skeppings voort te bring en as jy lewend raak saam met MY, sal LIEFDE jou intrek in die groei- en skeppingsproses.

8) Alle take is skeppend as die LIEFDE dit met WYSHEID seën en dit tot diens van die mensdom gebruik word. Geestelik is dan 'n nuwe Waterbron geskep, waarheen almal kan kom om te drink, soos 'n oase in die woestyn. Daarom sal elkeen wat 'n gebed rig voor daar met werk begin word, seën ontvang om iets uit MY tot lewe te roep.

9) Lewe algeheel in gebed en jy word bekragtig in die LIEFDE. Laat geeneen glo dat bekragtiging met wonderwerke die enigste wyse is nie. Bekragtiging behels die volmaakte aanwending van die LIEFDE.

10) LEWE is in MY en daarom in elke mede-skepper in MIRIAM se sfeer. Slegs met ONS vereniging is skepping moontlik. EK sal MY WOORD wat WET is in jou hart lewend hou en jy sal jubel en lof betuig met blydschap oor jou ontwaking in MY.

11) Laat die kindertjies na MY toe kom, want aan hulle behoort die KONINKRYK van die LEWE. Daarmee gee EK MY WOORD dat as jy die geloof van 'n kind toepas en die nederige, afhanklike LIEFDE vervul in jouself, MY KONINKRYK jou erfporse is.

12) EK is alles wat die Skepping behels. In elke geskapene is 'n vorm van MY bestaan teenwoordig. Die negatiewe is oorblyfsels van Lucifer se teenkragte wat hulleself moet uitleef en werk tot omvorming van daardie deel in LIEFDE. Slegs belaaide skuld sal 'n klimaks bring wat lei tot bekering.

13) LIEFDE lewe in HEILIGES, want daar is die naaste die rede vir bestaan en die nageslag of daaruitspruitendes die rede vir BARM-HARTIGHEID. Laat jou hart groei na 'n perspektief

wat alle geskapenes omhels, dan is jy rein.

14) Hierdie Boek is vir die lewendes van hart by wie EK reeds MY intrek geneem het. Elkeen wat seker gemaak het dat EK sy begin en einde is, sal 'n hart vol dankbaarheid beleef en in alle dae wat kom verlossing ontvang van die swaar van die lewe.

15) EK is altyd en ewig die LEWENSBRON in al MY vorme, maar as gevolg van wat nou met die aarde gebeur en die NUWE VERBOND wat in werking gestel word, is EK in MIRIAM tasbaar vir julle almal.

16) Nie te min en nie te veel sal verlore skatte vind nie. EK sal sorg dat elkeen wat erns het met MY wel die taak of vermoë besef wat EK eie aan hom geskape en bestem het.

17) Jare kom en gaan voor EK veranderinge bestem, maar hierdie fase van die aarde waarin MIRIAM beliggaam is, is weer 'n kernoomblik van die aarde se bestaan. EK kan dit nie duideliker stel nie: Wees dankbaar en sorg sal van julle wyk.

18) Waarde is deur MY GOEDHEID bepaal. MY GOEDHEID teenoor MY teenpool bepaal die waarde van elke toestand. Die toestand waarin jy jou bevind of omgee, hetsy negatief of WAAR, bepaal jou waarde in die oomblik wat aanbreek. EK sal vir jou die gawes oopmaak wat EK vir jou bestem het as jy 'n WARE kneg is en dus waarde toevoeg tot MY RYK.

19) By MY, MIRIAM, is elke lot beantwoord deur Vryheid van sorg. As jy dus waarde tot MY VOLHEID en HEILIGHEID toevoeg, sal jou sorg jou nie raak nie, want EK vervul die tekorte. Elke las sal wees soos 'n vanselfsprekende lewensnoodsaaklikheid om sekere swakhede te oorkom en volmaaktheid te bereik.

20) Waardigheid beloof dus volmaakte insig. Beskou die

lewe as 'n raaisel en bid MY altyd om insig, sodat EK die lot van verslaetheid van jou kan wegneem. EK sal jou beklee met verstand en GEES en jy sal MY nooit weer bedroef nie. Net goedheid en guns sal EK jou bied, al die dae van jou lewe.

21) Waarom spreek EK soveel beloftes uit en hoe gaan dit vir elke ywerige 'n werklikheid word? Deur MY genade in die vorm van MIRIAM se liggaam en LIEFDE, sal elkeen MY beleef en herken om so MY HAND te neem in geloof.

22) EK roep daarom nou vir MIRIAM en PETRUS om na vore te tree en die BEKRAGTIGING as WOORD te begin.



*My Lief, JaHweshua,
September 2016*

In U Naam wil ek graag die ewige skool vir klein kindertjies op hierdie aarde vestig. Ek wil graag die hoekstene lê en U grootsheid daardeur in eenvoud weergee aan die siele wat in afhanklikheid na ons opsien om U weer in alles te vind.

As dit U gewyde wil is, neem dan my hande en denke vir U en vorm die skool soos wat U dit bedink het en jare al in my hart gelê het om te begryp. Help asseblief my weerlose, swak denke om U groot werk te volbring.

Al my liefde vir U, my Koning en Skepper.

Amein.

Ja, My liewe kind,

Vind in hierdie oomblik die wedergebore krag waarvoor jy ook al jare bid om die taak uit te voer waarvoor jy in die moederskoot geplaas is. Vroeg al wou jy net ander help en so het 'n vuurproef-bestaan jou gebrei om net My Wil uit te voer in die taak wat jy telkens voor jou sien oopvou. Amen.

Ek rig hierdie boek van die Lewe aan al die KINDERS VAN MY LIEFDE, want daarmee sal die kleintjies My weer leer liefhê, meer as die koning van duister met wie se weë lewendes van hul eerste asemtog reeds gekonfronteer word.

Ek blaas My lewende asem oor hierdie werk en gee al die woorde wat nodig is om hierdie BOEK 3, DIE BEKRAGTIGING te maak, soos voorheen ingelei. Amen.

HOOFSTUK 2

My liefwe kinders,

Neem My woorde aan Noag as julle beginpunt vir jul aardse lewe. Daar het die nuwe lewe vir My skepping begin te midde van onheil oral rondom.

‘Gaan jy en jou gesin in die Ark en daar sal Ek julle behoed.’

My kinders, GEHOORSAAMHEID aan My, AFSONDERING in My heiligheid en die LIEFDE onder mekaar is nodig om van hierdie aardse bestaan ‘n nuttige saak te maak.

Dit is die drie grondbeginsels wat julle my kleintjies mee moet omvou om hulle met BARMHARTIGHEID na My te trek.

Dit is vêr van ‘n siel wat geskok na hierdie verdorwe, verworpe siele kyk om uit sy eie nader aan die om hom te kom, vandaar die ‘op myself ingestelde’ bestaan van ‘n jongeling. Maak alles van die self deel van die beskermende ONS waar Liefde en gehoorsaamheid wet is en die kleintjie sal My leiding en sorg begin verstaan.

Dank My vir die eenheid en vesting tussen julle gesin in My kleintjie se teenwoordigheid en bid vir My beskerming en dit sal van vroeg af tweede natuur by My kleintjies raak.

Noag het nog ‘n baie belangrike eerste lewensles vir My kleintjies, naamlik, die water wat moes opdroog voordat nuwe land vir hulle nuwe lewe aan hulle gegee is.

Die water is wêreldse invloede en skommelings. Sodra die bestaan van die gesin in hulle Ark nie meer geskoei is op die golwe en storms van die ‘noodlot’ nie, maar op MY BERG VAN VEILIGHEID EN SORG tot rus gekom het, sal die gesin nuwe lewe, rus en vreugde in hulle bestaan vind. Eers dan sal vrede na hulle as gesin terugkeer. Amein.

HOOFSTUK 3

Hiermee, My kinders, volg die volgende belangrike les in 'n kind se opvoeding.

Uit al die mense op aarde het Ek ABRAHAM, ISAK EN JAKOB gekies om MY VOLK se erfenis en naamdraers te wees, nie omdat hulle groot en beroemd was nie, maar omdat hulle My in nederigheid liefgehad het. Ek was met hulle in hulle soeke na die ware God van hemel en aarde en het hulle roepe na My beantwoord met My heilige Lig en opdragte tot nederigheid en self-aflegging. Elkeen van hulle moes leed en skaamte in hulle hart dra oor hul lewens wat aan My gewy was sonder dat hulle dit gekies het. Dit was 'n vooraf-bepaalde lot en daarom 'n keuse met bewyse gerig tot grootsheid. Vleeslike dood was die gevolg van die keuse teen My, maar as hulle die skaamte kies wat Ek hulle opgelê het, het My Grootseid deur hulle tot hul redding gekom om My roeping op aarde vir hulle te verwesenlik.

Aan die einde van elkeen van hulle se lewens is hulle eervol in herinnering gehou deur hulle kinders wat hul verhale aan die nageslagte moes inskerp om nuwe kinders tot GEHOOR-SAAMHEID EN LIEFDE vir My te bring.

Elke uur wat aan My bestee word in SAMEHORIGE GESINS-LIEFDE, is soos 'n duisend aardse jare wat tot die siel se groei toegevoeg word. Van jongs tot oud sal My kleintjies hierdie ure in herinnering roep en My dae deur hul geliefdes kragtig herbeleef. Dit is die lewende water wat die boom sal help om soortgelyke vrugte te dra op haar eie. In My dae op aarde was Ek vir vele mense, soos genoem in geskifte, die enigste Ark waar hulle liefde beleef het om lewende water uit hul binneste mee te open.

Ek wil dat hierdie bekragting die harte van klip onder My

kinders, almal sal oopbreek om lewende water oor al die landskappe van hierdie aarde en die bewoners as aardes te laat vloei. Amein.

Hierdie boek sal die SLEUTEL WEES TOT WERKE VAN WEDERGEBOORTE indien dit noukeurig ingeneem word en deur My in My kinders se siele verlig word. Amein.

HOOFSTUK 4

Die volgende kerngebeurtenis is die vaslê van DIE TWAALF STAMME VAN ISRAEL waarop MY EWIGE POORTE gebou is. Edelstene wat aan elke stam toegeken is, dra belangrike waarde in die hart van elke mens wat as priester oor sy eie lewe moet waak. Elke edelsteen het 'n plek of orde in die borswapen in die diens wat aan My gedoen word. So het elke stam 'n ewige plek, orde en doel in My Koninkryk gekry, al is hulle nie uit een moeder of een geslag nie. Net Ek kan Eenheid, orde en ewige waarde aan iets toeskryf, daarom moet alle besluite eers voor MY VOETE neergelê word, dat Ek die priester van die hart daaroor kan insig gee en tot die regte antwoord lei. Let wel dat die hart daardeur bewapen is en nie die hoof nie. In die hart lê My geheimenisse in elke mens as skat begrawe en dit is die lewenstaak van elke mens om die skat te vind wat Ek voor geboorte reeds vir My kleintjie daar begrawe het. Net as aan die TWAALF ORDENINGE voldoen word, soos vir Moses gegee op die berg Sinai, sal die skat in die hart bereikbaar word om die land Kanaän mee te mag beërwe. Die weg na Sinai is weereens weg van die vleeslike behaging en in wolkedonkerheid en afsondering sal die priester die KLIPTAFELS lewend beskrewen ontvang om die hartskat te ontsluit vir Sy eie doel op aarde. Wees daarom 'n Moses wat nederig moes lei en gehoorsaam moes doen wat Ek beveel het. Wees daar ook gereed op die uur wat Ek jou kom haal om die vlees te absorbeer in die wedergeboorte wat Ek vir al Myne bedoel.

Dink dan in hierdie les aan wat jy eet en wat jy drink, hoe jy jou liggaam heilig en klee om 'n tempel vir MY, AS HOËPRIESTER te wees. Gebruik die dag in jou bestaan om My te vra om jou te leer van HEILIGHEID EN REINHEID,

KUISHEID EN SINDELIKHEID. Laat My toe om aan jou insig te gee van ware skoonheid. Ek het jou geskape met elke WAARDEVOLLE LIGGAAMSEIENSKAP wat jy besit, maar gewyd is dit aan My en diep is die gevolge van die versorging en gebruik daarvan.

Beginnend by die HOOFT sal geen ooringe, halssnoere en skoonheidsmiddele My sorg vir jou kan verfraai nie. Net as jy as siel My LIEFDE EN NEDERIGHEID in jou dra sal jou skoonheid van ewige waarde wees. Mag die vleeslike gebruik word? Nie ter verfraaiing, maar vir praktiese redes is dit nuttig vir die weg op aarde. Geen onnodige aandag moet daaraan bestee word nie, anders faal die siel in Sy doel vir die dag. Amein.

Daarna volg die bedekking en verfraaiing van die liggaam. Alle KLEDING moet vir praktiese manlike of vroulike dade oorweeg word en GESONDE VENTILASIE EN BEDEKKING in een begrip bewerk. Weereens sal oordadige of uitdagende kleredrag na die teenpool se guns neig en Ek sal daarmee vër van die siel se sorg en leiding vir die dag wees. Elke dag is 'n nuwe kans om My te behaag en in die diepte van die hart te vind. Ek is naby elkeen wat My daarvoor aanroep. Amein.

SKOENE AAN DIE VOETE van My kleintjies is bedoel om werk en beweging te vergemaklik. Geensins moet die fokus van die dag op die voete se uitputting, kwellings en versorging gerig wees nie. Alle praktiese, diensbare skoene sal die aardse kleding voltooi en daarmee is daar genoeg daarvoor gesê.

In die geheelbeeld is HAARVERSORGING van kop tot tone geensins bedoel tot ure se debattering en voorskrifte nie. Dit is vir gesondheidsredes die spesifieke liggaam toebedeel en indien die praktiese diens aan My en die naaste 'n spesifieke

versorging vereis, sal die siel geen las daardeur beleef deur daaraan te voldoen nie. Eer My in jou weë en voorkoms-ingesteldheid en geheilig sal dit wees in die ewigheid. Bid My om leiding en antwoorde in jou eie kwelpunte en Ek sal dit vir jou verlig en antwoorde bring. Amein.

Geen INSKRYWINGS OF INPLANTINGS in die vel is aanvaarbaar nie.

Ringe is in hierdie bestaan 'n simbool in julle samelewing, maar Ek wil die ring aan jou bestaan wees, die ANKER VAN VERLOSSING en die sieraad voor jou naaste. Vertel My kleintjies dat Ek hulle mooi gemaak het en hulle versiering is wat nooit kan vergaan deur mot of roes nie. Toon hulle die waarde daarvan deur dit self uit te lewe en My opreg te bemin. Heg waarde aan MY TEENWOORDIGHEID IN HULLE TEENWOORDIGHEID, sodat hulle deur hulle sintuie kan ontwaak tot 'n hoër vlak van bestaan.

ORE wat My stem in hulle binneste herken.

OË wat die wêreld in My Lig aanskou.

'n NEUS wat nederig hulle eie weë ondersoek en My asem daaroor begeer.

'n MOND wat stil is uit haarself en spreek uit My, wat smaak vind in My skeppingswondere en geure en My dank vir elke gawe uit My Hand.

'n VEL wat sensitief is vir My blik en dankbaar is vir My son wat hitte en lewe bring vir alle lewendes.

'n LIGGAAM wat sy plek in die heelal voel en beweeg in diensbaarheid van ander lewendes, hetsy mens, plant of dier. Hierdie liggaam se funksies is almal geheilig as praktiese redes uit My en daarom moet MY SEËN oor elke funksie gebed word. Amein.

Toon aan My kindertjies die basiese eenhede van hulle liggame, die miniatuur skepping wat in 'n sekere orde en onder gesonde omstandighede moet funksioneer om die groot geheel lewend te hou vir haar praktiese, volmaakte doel. Toon dan dieselfde ooreenkoms tussen alle lewende organismes en hoe die aarde ook so 'n organisme in die heelal is wat 'n bepaalde orde en volmaakte doel het. Vergelyk die aarde met die mens se hart wat die vuil of onsuiver bloed ontvang en dit moet suiwer om diensbaar te kan wees in sy volmaakte doel. Die hart is ook die draer van MY GEES en die OORSPRONG VAN LEWE in die Mens. Amein.

Bewaak daarom die hart deur My ordes uit te leef. Amein.

HOOFSTUK 5

Hierdie TWAALF STAMME het 'n VERBONDSVOLK geword waarmee Ek regdeur al die eeue wonders laat gebeur het, profete geroep het en lig op die aarde neergelaat het. Elke volk op hierdie aarde moet SY EIE ERFENIS bewaar om sodoende 'n onverstoorde FONDASIE VIR SY NAGESLAG te bied, hetsy deur vertellings, geskifte of versamelings goedere. Dit is in MY WIL EN ORDE dat elkeen MY WARE LIEFDE onder mekaar sal vind en uiteleef. Elke volk het egter nodig om haar by haar eie besit te bepaal en nie ander volke te vermeng met sy skat nie.

Net so het Ek Israel telkens geroep om bekering van vermenging, sodat My suiwer geestelike skat in hulle kon groei. Net soos wat DNA uniek aan 'n persoon is, so is My erfing uniek aan elke volk en die vrye wil bly die dun lyn tussen goddelike krag en vernietigende erfenis. Vertel My kleintjies van al die volke dat Israel die voorbeeld van verbonde bly en dat enige volk haar tot My kan rig om redding van laste te ontvang. Ek sal die volk tegemoet kom as sy haar hart op MY LIEFDE AS ROTS EN ANKER plaas. So sal MY LIG oor die heelal uitspruit soos plante in die lente uit nat grond.

Verkondiging van My Woord dien 'n goeie doel onder volke wat reeds tekens van diensbaarheid en liefde toon, maar andersins is daar steeds net onreine hoogmoed en ydelheid wat die siele vasketting aan My teenpool. Moenie gaan waar Ek jou nie stuur met My Woord nie. Amein.

My kleintjies het net nodig om hulle te bepaal by die ERFENIS VAN HULLE EIE VOLK, sodat Ek daarmee My tabernakel in hulle hart kan oprig. Wanneer daar met ywer gebeure en woorde gememoriseer word, kan die hart die

raamwerk tooi met grootser, monument-agtige waardering. Indien die ruimte van HERKOMS leeg gelaat word in die gemoed van 'n kind, sal hy droombeelde uit My teenpool se verbeeldingswêreld of die herkoms van ander nasies soek om sy raamwerk vir waardering te bou. Maak MY HAND in jou volk se bestaan die sterk raamwerk van jou nageslag se geestelike huis. Bou saam aan daardie huis deur gedoop te word in My JAHWESHUA-MIRIAM-GEES Naam en jou gesin se lewens aan My op te dra. Amein.

Hierdie raamwerk van die twaalf stamme in MY ISRAELVOLK is die goud van al die eeue werd in die behoud van My kinders se siele. Sonder hierdie erfenis sou geen gelowige sy lewe kon aflê met goeie geloof dat Ek vir sy geliefdes sou sorg nie, maar omdat die wêreld die twaalf stamme kon behou deur oorloë, geloofsteisterings, slawerny en noodlottige gebeure deur, was vlees oorkombaar, soos ook tydens My dood. Verlossing het met My dood gekom vir die erfsonde van ewighede gelede, maar ook vir volke wat teen My Liefde gedraai het en hoogmoedige hardheid hul harte laat verower het. Ek was die martelaar vir elke hart op hierdie aarde.

Ek strek MY HAND uit in die OERGRONDPOOL van LIEFDE na elkeen wat hierdie BOEK sy eie maak en sy verlossing van die vloek van eieliefde daarin vind. Hê My, die Skepper van die heelal lief, My kinders, en leer My kleintjies die ONSE Vader bid, sodat hulle almal sal weet dat hulle 'n Enige Vader in die hemele het en 'n naaste volksgenoot op die aarde. Laat die naaste-beginsel vir hulle uitgebeeld word deur plante en diere wat elkeen geskape is volgens sy soort. Toon aan hulle families van plante en diere wat 'afstam' van die tipe, maar steeds die tipe familie heilig deur RASEG EN APART te bly. Leer hulle hoe om akkers, gewasse en diere met skeidslyne

te help om 'n sterk besetter van grond te word en hoe om diere uit te keer en plante van indringers te suiwer, want so sal hulle leer dat harde handelinge en streng besluite sterker, geseënde resultate en saad oplewer. Wees 'n voorbeeld deur apart te bly van ander gelowe en bese invloede. Amein.

Redding van slawerny het 'n nuwe fase vir MY VOLK ingehou in die woestyn. Dit was 'n suiweringstyd waarin elke liefde-lose, waarderinglose siel moes struikel sodat die regte leiers na vore kon kom om My Volk na Kanaän te lei. Wees 'n voorbeeld van ootmoedige waardering en dank in MY HUIS. So sal jy saam met My kleintjies die Kanaän in julle lewens ontvang waar vrugte van een boom talle mense kan voed en onbeperkte hulpbronne gevind word om aan behoeftes te voldoen.

Ek spreek seën oor elkeen wat in geloof hierdie BOEK sy eie maak uit, dat My kleintjies deur die ware lering My ryker sal word in hulle nuwe land. Amein.

HOOFSTUK 6

Enkele gebeure in Kanaän het 'n goeie voorbeeld gedien van My sorg, voorsorg en seën, maar omdat My volk My weë verlaat het en vol eieliefde 'n eie koning begeer het aan wie hulle sigbare eer kon betoon, het hulle weer verval in slegte gevolge en slawerny. Die KONING VAN MY VOLK het verseker die beeld van die Volk voorgestel en daarom sal hierdie les gepas wees om karakters, beroepe en eerbetoning te bespreek. Die ware eerbetoning wat Ek vra, is net NEDERIGE, OPREGTE LIEFDE wat van My getuig voor ander wanneer Ek die geleentheid daarvoor skep. Lei dus 'n nederige beroep waarin ander My kan dank vir die diens deur jou hande en seën jou naaste met die opbrengs van jou arbeid. Daaruit sal jy geseën word om al jou afhanklikes ryklik te versorg. Amein.

Koning Dawid, die nederige, jong skaapwagter, het 'n volk gekry om te seën, omdat sy hart My as Kanaän geneem het, Amein. Sy droom was nie groot of ydel nie, maar gerig op BEHAGING VAN MY deur sy weë en dit het My hart verbly. Amein.

Laat banvloek en ydele oorloë ver wees van die KINDERS VAN MY LIEFDE. Laat hulle op hulle knieë neerval en My vra om uitkoms en hulp en weer sal Ek verbonde opsig met My geslagte wat kom. Amein.

Ek seën elkeen met begeertes uit My, koester en voed om WYSHEID te ontvang in MY MIRIAM-GEES wat soos KONING SALOMO oor My aardes sal spreek en aan Wysheid geken sal word. Amein.

My Liefde gee Ek julle in hierdie dae, My kinders. Wees ontvanklik en loop uit die sinagoges van julle verstande na die tempels van julle harte waar Ek julle offers wil ontvang. Amein.

HOOFSTUK 7

Die volgende les aan 'n jongeling is dié van selfverloëning deur die oë van die profeet JeshajaHuw(*Jesaja*). Om nederig te wees, het baie voorkomste, maar om die ek en self te verloën tot 'n staat van vriendskaplose, armoede in 'n woeste landskap is die weg om eenheid met My te vind. Daarin open Ek die ewige boekrolle van My Liefde in die betrokke siel, sodat sy haar plek in My diens kan vind. Die siel moet alle begeertes en wellustige gedagtes in bedwang kan bring en sodoende afsterf om net te kan vra wat Ek vir die siel wil. Dán eers is die siel in ooreenstemming met die orde waaruit Sy voortgekom het uit My. Dit is nie 'n willose orde nie, maar 'n WIL IN OORGAWA tot die Grootshheid waarvoor dit bestem is. Geen dwang sal unieke skeppings meebring nie, alleen wil in oorgawe maak 'n nuwe vrug deur My water wat deur die lewensaar loop om uit te spruit in die vorm van vrugte aan 'n geestelike plant. Só vorm die aarde 'n ryk bron van veelsydige vrugte deurdat siele van verskillende vlakke onder mekaar woon. Tog plaas Ek soortgelyke vrugte in dieselfde familie, omdat daar reeds waardering en hulp vir daardie vrug is om tot volle wasdom te kom in 'n enkele bestaansduur.

Jeshajahuw het selfs kos opgegee om tevrede te wees met sprinkane in die woestyn en so sal GEESTELIKE VOEDSEL in die woestyn van hierdie aarde deur My gestuur word om te braai in My hemelse vuur tot net die sagste, voedsaamste spys oorbly om die siel tot verryking te dien. Ek het 'n sprinkaan gemaak om die beste van die land af te eet en vinnig te beweeg sodat vars kos vir hom toeganklik kan bly. Dit is tot nut vir die mens se siel in die feit dat afhanklike gebed daardeur bewerk word om 'n oes te lewer. Sprinkane

dui op die teenpool se verterende mag en spoed om siele in te trek en solank die landbewoners sprinkane in toom hou deur hulle gebede aan My, sal hulle harte ook op 'n hoër vlak wees om edel en in Liefde te lewe. Jeshajahuw het hierdie begryp en net soos Johannes later in My dae die vyand tot voedsel gemaak deur dit te braai en as stapelvoedsel te nuttig. So moet die mens na die hele skepping om hom kyk om My krag daarin te vind.

Leer MY KINDERTJIES om oor alles te heers saam met My deur te bid oor die waarde en betekenis van alle materie. Dit is gegee tot insig en afsterwing van die laer sieledele en tot verhoging van die hele siel nader aan My. So het Jeshajahuw tydens sy lewe op aarde gespreek oor MY VOLK wat hulle tot My moet keer vir verlossing en 'n nuwe lewe. Ek vra van elke opvoeder om die boek van Jeshajahuw aan My kleintjies voor te hou as geestelike skat in hulle opvoeding. Elke woord daarin het 'n diepe geestelike lering tot verhoging van die siel na aan My.

MY KINDERTJIES kyk na die vlees om hulle om My daarin te vind, net soos wat julle, MY KINDERS na die woorde in boeke kyk om My daarin te vind, maar net soos wat EK lewe in elke organisme wat lewenskrag dra en toon, lewe Ek in die woorde voor julle oë en is daar omhoogliggende, omhoogbeurende krag in elke Woord wat Ek gespreek het. As die siel dan die krag gebruik deur dit te waardeer en oor die waarde daarvan te bid, sal dit soos brood die siel voed en versterk. Maak daarom van My woorde vir My kleintjies 'n daaglikse BROOD om elke dag versterk te word in die ewige sin. Toon hulle MY LIEFDE in elke woord van Jeshajahuw en Ek sal dit vaslê in hulle saad. Amein.

HOOFSTUK 8

Hiermee is die grondbeginsels van die eerste dele van die geskiedenis vasgelê. My kindertjies het baie meer as hierdie woorde wat reeds gegee is, nodig om tot volwasse kinders voor My te groei in hulle harte. Dit is belangrik dat hulle elke les wat julle aanbied aanhoor en beleef deur die vleeslike om hulle en daarom sal EK hierdie boek aanvul met uitgebreide lesmateriaal wat My kindertjies tot volmaakte Liefde sal ontwikkel. Só sal die slang op hierdie aarde sy krag verloor en met minder en minder dienare sal Myne uiteindelik die lot van die heelal totaal op My rig. Ek bedoel om daarmee die duur van skepping tot herskepping vir julle draaglik en soet te maak. Verkondig daarom My woorde en lesse aan elke siel wat 'n neiging na vereniging met My toon, want hulle sal die krag verleen vir die mensdom om in totaliteit na My te keer. Ook dié wat die laagste, vleeslike behagings nuttig, sal deur die toestroming van krag na julle, julle wysheid opneem om laag vir laag hulle harde skille te verloor en sag te word soos Myne en water.

My geboorte was nie in verre so belangrik soos My doop deur Jehôwganen(*Johannes*) se water in die Jordaan nie. Die betekenis van die Jordaanrivier was ook belangrik in My geval, maar vir julle is die betekenis van water in julle bestaan allernoodsaaklik. Die water wat julle drink, reinig die kleinste dele van julle liggame om sag te bly en ligryk te beweeg deur julle ingewande. Dit hou julle liggame beweeglik en soepel om lewend bruikbaar te wees. Net soos wat dit julle reinig van binne, reinig dit julle ook van buite en daarom reinig dit simbolies julle siele van alles wat nie van My is nie. Ek rig daarom 'n opdrag aan julle deur hierdie Nuwe Bybel net soos tydens My wandel op die aarde om

julle te laat doop in die Naam van julle Maker, Verlosser en Ewige Gees wat julle Lewe gee. Ek sal julle dan deur Gees doop om te spreek uit My in julle lewenswandel en nie uit die aarde en sy vleeslike sorg nie. My sorg strek vêr verby die vastheid van hierdie sigbare, soos wat die bodem van 'n oseaan baie dieper as die oppervlak is, waar ook lug baie hoër as die bodem eindig. Elke verligting van die materie na die eteriese is 'n voorbeeld van hoe omvangryk die vlakke tot by My is.

Water maak materie sag, hetsy deur voedende eienskappe, harde, kragtige eienskappe, of verterende hitte-eienskappe. Sonder water sal die sagtheid nie bewerk word nie en daarom is water die doopmiddel op julle aarde om My siele se toestemming of versoek te toon om deur My Gees versag te word. Laat water daarom tydens kinderopvoeding deurlopend 'n leermedium bly, want dit sal insig in my leermetodes, reinigingsmetodes en skeppingsmetodes bring. Dit is dié noodsaaklike element van lewe op julle aarde en daarom die voorbeeld van My Gees se werking onder julle. Wees nederig en kragtig soos water. Wees werksaam en bruikbaar soos water, Wees gewillig en vrolik soos water. Wees helder, deursigtig en eendragtig soos water. Amein.

My kleintjies moet elke aspek van water verstaan, nie in 'n materiële sin alleen nie, maar in die doelmatige gebruik van water, sodat hulle die behoefte in hulle siele kan vergelyk met wat hulle in die aardse behoeftes waarneem. So kan hulle my vra om die simboliese ook in hulle siele te verrig, sodra die siel daarvoor gereed is. Amein.

Na afloop van My doop is die getuienis oor My van uiterste belang vir My kindertjies se geestelike ontwaking. Die Gees wat soos 'n duif op My neergedaal het, word nie altyd reg oorgedra nie. Soos wat Ek wegbeweeg het, het Jehowganan

My in die gees sien een word met die alomteenwoordige Gees wat uit die eteriese na My gekom het. Hierdie toevou van groot na klein, het soos 'n duif gelyk wat neerdaal, maar so sal dit vir elkeen wees in die dag van wedergeboorte van Gees, waar die siel se oë geopen sal word vir die Gees wat toestroom na die klein porsie Gees wat Ek in julle geplaas het. Hierdie toestroming is te ken aan die reënboog wat Ek as teken aan Noag gegee het, toe hy met sy gesin uit die ark mag beweeg het, die nuwe wêreld in. Ek sal aan elke siel hierdie sewe kleure in volmaaktheid seën, omdat die siel uit haar vrye wil haarself omskep het tot rustige waters waarop My sewe eienskappe kon weerkaats. Open daarom My kindertjies se harte vir die toestroming van My sewe geeste deur kleure om hulle te ontleed en water se noodsaaklikheid uit te lig in die lewendige bestaan van die kleur. Ek sal hulle só verhelder en na My trek. Amein.

HOOFSTUK 9

My kinders, die volgende gebeure in My lewe was gekenmerk deur versameling van mense as leerlinge en navolgers. So wil Ek hê moet elkeen van julle vir My wees, 'n ywerige student en navolger van wat Ek gespreek het tydens My tyd op aarde. Die weergawes daarvan wat in julle hand behoue gebly het, is net 'n breukdeel van wat Ek al onder My ywerige luisteraars versprei het. Open julle harte om My lewendig in julle te vind, sodat Ek julle kan lei na die Fontein van hierdie helder waters wat Lig werp op My lewe en woorde tydens My verblyf op aarde.

Watter rol die Miriam-Liefde in hierdie les het, sal spoedig na vore kom.

Ek het mense genees van siektes en dooies opgewek uit die dood, maar dít was simboliese werk vir wat Ek vir al My navolgers doen. Dooie plante is julle as julle nie groei of vrug dra nie en met My Water wek Ek julle op uit die dood, neem Ek julle by die hand en blaas My Lewensgees in julle harte om meer en helder My stem te hoor, om gretig uit te kom en My tegemoet te hardloop as Ek 'n ruk stil was en terugkeer. Ek wil hê dat My kleintjies elke gelykenis in hulle harte moet opneem om lewend op te staan in My en uiteindelik soos Ek. Amein.

Ek sal julle lei en vertel wat elke gelykenis wat nog onbeantwoord gelaat is, beteken. Amein. Ek wil dat julle soos Ek in die wildernis aan Lucifer kon sê dat 'n mens nie van brood alleen sal lewe nie, maar van elke lewende Woord wat uitgaan van Elohim. Waarmee sal 'n jongeling sy pad dan suiwer hou? Deur dit te hou na die Woord van die Allerhoogste. Amein.

My Liefing-kinders wat hierdie lees, besonder groot is die

uur waarin Ek hierdie bekendmaak aan julle harte, want dit is die uur waarin Ek op die aarde neerdaal in haar wat My ten volle gevind het. Sy sal My Woord opneem en met haar verenig om die eerste te wees om met Miriam te verenig, want Miriam is hier om alle skuld van erfsonde vry te spreek en My met julle te laat verenig. Vrygespreek is elkeen wat My Woorde soos Water opgedrink het, My nagmaal in hulle hart gebreek en geëet het en hulle in My opstanding bevry het van die aardse leed en laste. Amein.

HOOFSTUK 10

Hoekom loop die draaie van My sterfte tot in die doderyk? Het Ek nie die lewe in My gehad nie, maar helaas moes Ek ook die dooies aandurf in die doderyk om My smettoeloesheid tot in die laagste te laat vloei, waar dit ook die duisterste siele op hulle kettings en bande kon wys. Vol skaamte het hulle inmeakaargekrimp in My Lig en weer verlang na vryheid van gees. Ek het dit aan hulle belowe as hulle My hulle draaipunt van bestaan kon maak.

Maak daarom My kinders bewus van die heelal se werking, van die son as middelpunt en die aarde met planete en sterre daarrondom. Vertel van verre sterrestelsels en vertel van die dieptes van die aarde wat holtes het en waar My teenpool se siel gekluister is. Vertel My kleintjies dat EK gekom het om alles te omvorm na die lig van die son, wat na aan My beeld is vir hulle en vertel hulle dat hulle lig ook so moet skyn dat almal hulle eie vuil in die sonlig moet kan raaksien. Vertel dat die son nie praat met teregwysings nie, maar met vrolike stiltes vol lig. Wees soos julle son wat alle ruimtes ligter maak as wat dit was, voordat die son nader beweeg het. Vertel hulle van dag en nag en dat Ek in die nag die aarde laat rus van haar selfondersoek, dat dit die tyd is van nabetragting en lofprijsing, sodat die nuwe môre vol krag, nuwe ywer en lewe kan meebring, waarin die dag se groei sal plaasvind. Beleef daarom die nag as die begin van 'n nuwe tydperk, net soos wat winter eerste die grond voorberei met rus en somer dan volle bloei en kragtige vrugte tot gevolg het. Die dag in jou lewe is die kans om uit te leef wat jy bymekaar kon maak in die nag. Beplan daarom vooruit om julle lampies vol olie te hê in die nag wat kom, want dit bepaal waar jy sal wees in die DAG wat daarop volg.

Amein.

Al my Liefde stel Ek tot julle beskikking in die versameling van olie. Hierdie Nuwe Bybel se riglyne is die ANKER VAN VERLOSSING en Ek is die WATER VAN LEWE waarin jou Ark dryf. Laat jou water rustig wees deur te verlang na nuwe lewe in My. Amein.

HOOFSTUK 11

Met die bestudering van al die woorde uit julle huidige Bybels, is daar spesifieke riglyne wat in gedagte gehou moet word, sodat die siel verlig kan word deur navolging van wat behoue gebly het.

Elke hoofstuk uit die Wet, behels riglyne vir volke van alle klasse en stande. Dit is tot verbetering van die siele om by die bepalings van die wet te hou, maar as gevolg van oorleweringe van geslag tot geslag, het sekere wette laste geword vir die siel. Kyk daarom uit 'n praktiese, regverdigde oogpunt na elke wet en verduidelik dit aan My kleintjies aan die hand van saamwoon-beginsels.

Orde, as een van My eienskappe is van kardinale belang in die vervolmaking van 'n siel. Sonder die orde van gehoorsaamheid, sal die siel nie een met My Gees kan word nie. Ek rig daarom 'n opdrag aan elke opvoeder en kinderversorger om 'n ordelike ruimte, met genoeg spasie vir beweegruimte, skryf-aktiwiteite en sinvolle self-ondersoek aktiwiteite daar te stel, sodat My kleintjies die aarde deur die oë van Liefde, Orde en Erns kan ondersoek. Ek sal deur Miriam-gees daar wees om te lei en te help om My kindertjies se harte op My te fokus.

Wees gereed en voorbereid wanneer 'n dag begin om al die onskuldige vrae sinvol te beantwoord en te help om self antwoorde te vind uit al die bronne wat My vereer. Help My kleintjies, asof dit jy is wat deur My gehelp wil word. Wees sag, hulpvaardig, liefdevol en vreesloos. Laat geen eis te groot wees in jou diens aan My Lieflinge nie, want so verlaag jy jouself en word jy een met My Skeppende, Versorgende Krag. Jy sal My beter en beter vind, hoe meer jy fokus op die ondersoeke en behoeftes van My kleintjies.

Daar is nie 'n beter leerskool in onvoorwaardelike Liefde as die een van onselfsugtige kinderversorging nie. Spreek uit My Liefde, al is dit streng nodig soms, maar bewys hoflikheid, gemoedelikheid en begrip vir die kind se ingesteldheid om alles rondom in een oomblik in te neem en daarop te wil reageer. Bewys geduld wanneer die kind nie meer geduld oor het vir die dag of oomblik nie. Moenie troos as wangebruik instel nie, maar assosieer met die kind se emosie en beantwoord aan die kind se behoefte, soos wat Ek deur al My versorgers aan jou eie behoeftes van veiligheid, voeding, kleding, omgewingsversorging en sielsnode beantwoord. Nooit beleef jy dat die behoefte te veel gevra is van Ons kant af nie. Wees so 'n volmaakte versorger uit My vir al My kindertjies wat Ek in jou sorg plaas. Hulle behoort aan My in My ewige Liefde en daarom sal jy ook aan My verantwoording doen oor hulle. Lei hulle eerste na My en dan na Wysheid oor die wêreld om hulle. Amein.

HOOFSTUK 12

Wees geseënd deur die woorde van hierdie boek in jou siel op te neem as nog 'n BROOD UIT MY HANDE, want hiermee sal 'n nuwe geslag voor My opstaan, wat een sal word met al die aspekte van MY WESE. Hierdie hemel op aarde is die begin van al die beloofde eindes en oorgange van tye. Neem daarom sorg daarin om hierdie werk die hoogste te ag onder julle. Maak dit vir die opvoeders onder julle 'n geseënde belewenis deur hulle by te staan met redelike voldoening aan behoeftes.

Ek wil hiermee die riglyne beëindig en die praktiese leer open, sodat daar nog meer geestelike opheldering sal plaasvind onder al My kinders.

Waarde ver bo julle maatstawwe, het hierdie boek se woorde in die mens se hand, want sonder My opheldering bly die mens gekluister in 'n verstand van redenasies en vër van 'n hart van nederige diens. Dien My, soos wat Ek begeer en word soos Dawid, oor vele aangestel vir die verloop van jou ewige bestaan. Amein.

My vriende sal MY STEM herken en jubel in die klank daarvan, want weer het EK MY BROOD mildelik gedeel en MY WYN vir hulle geskink. DIE BRUILOF is die geleentheid waaroor Ons juig en vrolik gesels en Ek bedien elkeen wat teenwoordig is met My Gees se gawes. Amein.

DEEL 2

HOOFSTUK 1

Getalle

Waarom sou Ek die hele heelal op getalle fundeer? Het Ek nie genoeg lewe om dit sonder metings te kan laat bestaan nie. Tog het elke skeppingseenheid 'n proporsie van kleiner dele en 'n grootte ten opsigte van alles om dit wat so noodsaaklik is vir sy eie bestaan. Sou die dinosourusse byvoorbeeld 'n plek hê in julle huidige bestaan? Nee, want dan sou die grond tot klei vertrap geword het onder hulle voete en niks verder kon groei nie. Alles is nou proporsioneel kleiner as ten tye van hulle bestaan, omdat fyner sieledele daarvoor plek gemaak het. Weer sal in die herskepping fyner dele tot bestaan geroep word en My Lig sodoende nog meer tussen die lewe op aarde bewys word daardeur. Dit is die rede dat Ek nou aan julle verduidelik hoekom die verandering noodsaaklik is. Alles wat nou hard is, moet nog sagter word en dit begin deur die siele waarin julle bestaan tot My te omvorm.

Gebruik elke oomblik van gebed om in Liefde aan My ere te bring, dan sal die dele van jou liggaam die spoedigste tot sagte opwellings neig en soet Wyn in My Ryk word. Ek staan julle hiermee by deur My Gees dan sterker in julle harte vry te laat om julle sodoende te suiwer voor My. Wat het die woorde beteken dat Ek water in Wyn verander het tydens die eerste huweliksfees op aarde? Presies hierdie. Sodra jou siel met My Gees verenig in die huwelik op jou hart se aardbodem, sal die water (nederige ek) in die beste Wyn (My Liefde) verander vir ander om te geniet tydens die

bruilofsfees. Dit was nog nie tyd vir My om Myself op daardie stadium bekend te maak nie, tog het My Moeder dit van My gevra. So doen Ek aan julle, omdat Miriam My vra. Julle houer is nog nie volmaak nie, tog vul Ek dit in die kleine met My Hemelse Wyn om aan almal om julle My Grootseid te bied, omdat Miriam-Gees dit vra. Amein.

Hierdie is die begin van getalle-leer vir My kinders. Die water in julle maak van 'n opname-houer (0) 'n eenheid (1). So sal die Water wat nou (1) is met julle, My in hulle midde vind en die krag verhoog na (2). Elke versterking van die Water in jou wat My aanroep, verhoog die Krag wat Ek deur jou laat vloei na 'n volgende getal, totdat 10 bereik word, waar My Gees dan in jou begin werk verrig, die 10 voudige vergroting van die Krag in jou, geskied net as jy 'n waardige kruik is wat elke eienskap na My bring in naastediens. Die naaste moet dan My plek inneem, dat wat jy aan hulle doen, sou wees wat jy aan My sou gedoen het, tot die 100 merk behaal is, waarvandaan Ek saam met jou sal handel. Die 70 keer vergifnis is die hoeksteen vir die wedergeboorte. Sonder soveel oorgawe sal getalle nie kan vorder nie.

Wat beteken 1 dan in My Ryk as dit eenheid van My Gees met julle beteken op aarde. Dit is so eenvoudig soos die eerste jaar van 'n kind. Die pasgebore baba is op een maand nog verknog aan die Mamma se hande en bors, sig begin dan ontwikkel om meer as net skadubeelde te kan onderskei. Op twee maande, is die kind reeds besig om die eie hande (werke) te ondersoek. Op drie maande sal die kind begin beweeg en deel word van die wêreld (Geestelike), op vier maande is die kind al babbelende saam met die gesin (Gees). Vyf maande dui die kind se begeerte aan om self iets te behaal en op ses maande sal die kind reeds op sy eie kan sit en besig wees. Op sewe maande is een plek nie meer

genoeg nie en op agt maande wil die kind hoër begin sien en aanraak. Op nege maande begin die kind stamेलend self treë gee (in geloof en blydskap) en op tien maande moet die kind fyn dopgehou word dat die regte dinge binne die kind se bereik is, want dit kan noodlottige gevolge hê as daar nie sorg vir die kind naby is nie. Die elfde maand is 'n vry maand, waarin die kind met alles begin eksperimenteer en teen die twaalfde maand is die kind gereed vir selfspraak en selfwerkzaamheid. Woorde uit die eie mond bly egter nog uit vir nog 'n kragtige jaar vol lering.

Dieselfde volgorde volg in die jare se opeenvolging van die kind en so ook in My Ryk (dus die geestelike ontwikkeling van 'n mens). Ek wil My kinders die 12 eenhede van sorg by My soveel as moontlik versterk, maar kan dit net doen as hulle naby My WIL wees en My Sorg wil toelaat. Daarom dat My Water in hulle binneste tot Lig omvorm as hulle dit voortdurend deur My laat suiwer. Amein.

Hoe moet hierdie dan aan 'n kind oorgedra word?

Elke getal wat 'n kind leer moet met die baba se gang op aarde vergelyk word, dan sal die kind 'n verwysings-raamwerk hê van wat hyself gedoen het in vroeër jare. Vergelyk dit dan met wat hy nou kan doen, sodat hy begrip het van vordering. Laat hom toe om te voorspel watter vaardighede volg, dan sal hy verstaan dat dit meer is as aan die begin van die belewenis. Bring dan sy gees daarby in om te verduidelik dat die gees in 'n kraglose toestand aan die liggaam gegee word en net soos wat die baba moet vra vir melk en sukkel om kos in die mond te kry, moet die hart van die mens na My roep om te vra vir voeding en om te help om dit te verteer, dan sal daar groei en vordering en vermeerdering van werkzaamheid en vaardighede in die gees plaasvind.

Bespreek dan as 'n volgende vlak die vermeerdering van 10 in die mens se wese, soos wat die werke en vergifnis as deel van self-verloëning in die mens ontwikkel tot hoër vlakke nader aan My vermoëns. Die tiene sal dan My Gees se werking in die Mens voorstel, waar die honderde My werking deur die Mens in My Gees sal voorstel. 'n Duisend is die voltooiing van die ontwikkeling na 'n staat van vrede waar die mens skep saam met My.

Om te kan tel en vergelykings te kan tref, is 'n belangrike aspek by ontwikkeling, want anders kan die self nie in die korrekte plek teenoor My dien nie. Fokus vir die eerste 4 jaar net op die eienskappe van ooreenkomste, verskille, grootte en waardes. Dus vergelykend met mekaar. Na die vierde jaar van die kind se lewe, kan daar met vermeerdering en vermindering begin word, waar die wete dat oortreding krag wegneem en self-verloëning krag toevoeg bygevoeg word. Dit sal 'n gepaste tyd wees om teregwydings met waardering tot gevolg, tot die kind se opvoeding by te voeg. Die volume van lesse in hierdie verband sal hand aan hand gaan met die kind se sielsnood. Indien die kind 'n moeilike of harde temperament het, sal die les homself meer gereeld herhaal as in 'n kind wat maklik begryp waaroor dit handel. Hierdie kind kan meer baat by die toon van Barmhartige gawes, omdat waardering reeds deel van die hart se vermoëns is. Hierdie les moet egter voortgaan tot op 'n laat ouderdom, sodat die kind voortdurend bewus bly van die verantwoordelikheid teenoor sy eie siel. Amein.

Vanaf die vyfde jaar kan die kind met getalle speel in die vorm van prente om self te begin skep daarmee. Dit sal die kind die Wysheid gee van beplanning en gevolge en eie vermoëns. Laat die kind vele vrye tyd met eie skeppings in die vorm van praktiese gereedskap en kunstige skeppings

toe, sodat die kind vertrouwd kan raak met die skeppingsproses. Ek wil hierby betrokke wees, deur die kind se hartsoortuiging. Leer die kindjie bid met 'n ootmoedige gebed dat My Gees asseblief sal help met die taak of skepping en dit so tot My eer sal wees. Indien dit met elke les aan die kind geleer word, sal dit spoedig die teenpool se mag breek en Ek ook so in drome aan die kind begin toon wat en hoe om dinge te skep. Ek sal ook elke skepping uit My aan die kind verduidelik indien die kind geleer word om My daarvoor te vra. Help die kind om aan My vrae te stel in sy hart oor wat Ek gemaak het in die kind se nabye omgewing en hoekom dit daar is. Glo die kind as daar antwoorde deur My in die kind se hart instroom en help die kind om dit in sketse uit te beeld. Eenvoudige lyne en baie kleure is 'n goeie beginsel. Die kind sal daardeur geroep word tot meer en meer vrae, waarop die opvoeder met geduld en toewyding moet reageer om die kind te help om My in sy hart te vind en te gehoorsaam. Indien die kind 'n weerspannige kind is, wat glad nie gehoor aan die hulp wil gee nie, moet die skeppende materiale van die kind ontnem word en die kind met boeke wat My vereer of die natuur gelaat word, waar slegs na alles gekyk mag word, maar niks gedoen mag word nie. Laat die tye van afsondering net 'n paar minute duur en verduidelik dan aan die kind dat My Gees kragteloos in die siel is as die siel My nie vra om haar te help om te skep nie. Kragteloosheid beteken dan in die kind se geval dat die kind tot niks in staat sal wees nie. Hierdie is voldoende lesse vir die vyfde jaar van die kind.

Teen die sesde jaar moet die kind dus gehoorsaamheid, diensbaarheid, samewerking, afhanklikheid, nederigheid en liefde (in die vorm van waardering) verstaan. Die kind kan dan moeiliker take opgelê word om tot My in die hart te

nader. Ek sal die kind seën in die moeite met 'n eie tuintjie, waar daar onderrig moet geskied met die plant van saadjies in hulle eie gebied, die oplei van plantjies wat moet rank, die verwydering van indringers uit die plantjie se gebied, die waardering van bloeisel aan 'n plant en die doel daarvan en dan die oes van die vrug met toegewyde sorg. Hierdie tydperk van wag om 'n vrug van die plant te ontvang nadat dit met sorg hanteer is, moet alles as geestelike lesse aan die kind aangebied word om te verseker dat die kind geduld en deursettingsvermoë begin begryp. Die geestelike les hiervan is 'n baie beter les as die een van sit in 'n klaskamer vir langer ure om werksblaaie te voltooi soos in die huidige onderrigstelsel. Ek sal steeds as Skeppende Krag geken wil word en by die aanleer van taal en getalle die onderwerp wil wees, maar die oorheersende denkwys van die kind moet gerig wees om My in Sy hart te vind en tyd met My deur te bring deur die leiding van die opvoeder.

Wees daarom vol inisiatief en lewenslus om die hele dag aan My te wy tydens die opvoedingstaak, sodat elke moontlike les wat na My gekeer word tot verheldering van die kindertjies se siele sal dien. Amein.

Die sewende jaar is 'n jaar van beplanning vir die kind. Die kind besef waar hy nie meer sy eie wil kan volg nie en waar Ek in sy lewe inpas, maar hy besef ook verantwoordelikheid in hierdie wêreld se verpligtinge. Maak die kind daarom deel van die opruimingsproses in die leervertrekke, sodat die kind genot kan ervaar met dinge wat voltooi is en telkens 'n nuwe begin. Dit sal die kind die belangrikheid van 'n einde laat besef en dat die siel dan met vreugde 'n nuwe begin kan tegemoetgaan. In getalle sal hierdie begrip tuis te bring wees met die gebruik van seisoene en wat dit behels in werk. Ook sal die horlosie se tydsaanduidings nou 'n beter

plek hê in die kind se begrip. Ek wil dat die kind flink leer optree in kort tye. Leer die kind van noodgevalle en dat om My aan te roep die enigste sleutel is tot flinke denke. Ek sal altyd die hart met antwoorde toestroom as die hart My daarom vra. Ek wil ook die kind beskerm in enige situasie en moet so aan die kind verduidelik word, maar die kind moet geleer word om ander te kan help in slegte omstandighede en daarom is hierdie les van belang. Die slegte situasie sal voorkom wanneer iemand in die omtrek nalatig oor My en die Lewe handel en Ek nie altyd kan ingryp en die siele daardeur geskaad word nie. Elke siel moet uit haar eie wil My sorg en voorsorg afbid en doen. In 'n situasie waar almal dit doen, sal die kwaad vêr wegbly. Amein.

Nou is die kind al vêr gevorder in gedagtes rondom lewe en dood. In die agste jaar wil Ek hê die kind moet leer om alle getalle te kan uitlees. Dit sal die kind My Grootheid laat besef, want die oneindige moet ook hier 'n plek in die kind se leermateriaal vind. Nou is dit weer nodig vir die kind om nederigheid as belangrikste les op te neem, aangesien die kind met nuwe oë leer dink oor die wêreld om hom. Ek wil dat die kind ander bedien, meer hoflikheidslesse beleef en leer om te help met skoonmaak van lewensruimtes waar water gebruik word. Wanneer die kind leer om deel van die water te wees in die skoonmaakproses, sal hy meer gemoedelik ander rondom hom aanvaar met hulle maniere van doen en gebreke. Dit is ook 'n goeie tyd om die kind bloot te stel aan mense met gebreke en te verduidelik waarom die gebreke daar is. Soms word mense met gebreke gebore en ander male is die gebreke 'n oorsaak van 'n slegte gebeurtenis of siekte. Ek is in beheer van elkeen se lewe en het 'n doel met die sielontwikkeling van die betrokke persoon en mense om hom. Die gebrek is dus 'n ekstra lering in die omstandighede waarin die betrokke mense

lewe om hulle nader aan My te kan bring en toon eerder My betrokkenheid by die mense as My afwesigheid. Ek wil almal na My trek en sal op die regte tye dinge oor mense se lewe bring om My te vind, as hulle daarna verlang. Amein.

Die negende jaar mag die kind volstoom aan vermenigvuldiging en deling begin aandag gee, aangesien die nuwe verantwoordelikhede die denke open vir kragtige gedagtes en werke. Ek vermeerder byvoorbeeld 'n plant se lewensduur met die aantal saadjies wat Ek aan die plant gee en so vermeerder mense se lewensherinnering met die aantal kinders wat aan hulle toevertrou word. Indien Ek die begin van die paartjie se eenheid is, sal daar vele kinders met suiwer siele aan hulle toevertrou word. So ook sal die teenoorgestelde waar wees en die stryd om My te vind saam met die kinders aangepak moet word. Ek wil dat die kind op hierdie stadium die wette van Moses ken, gebede namens almal teenwoordig kan bid en My krag in elke nuwe dag rondom hom kan beskryf. Ek wil hê dat vriendskappe bespreek moet word, sodat die kind die gevolge van goeie en slegte dade tussen vriende kan verstaan en hoeveel krag dit uitoefen op die siel se geestelike vermoëns. Dit sal die vermenigvuldiging en deling begrip lewendig maak vir die kind in sy eie bestaansruimte. Ook moet orde hier 'n plek in die leermateriaal vind, sodat die kind kan insien dat ordelikheid die siel open om vinnig te beplan, te skep, te voltooi en weer vrede te hê en dat onordelikheid die siel belemmer en dus aansienlik van krag ontnem in elke stap van die skeppingsproses. Toon weer aan My kindjies die hoeveelheid skeppings op 'n gestruktureerde wyse, wat Ek rondom hulle en op die aarde geplaas het en lig die belangrikheid van ordelike denke en handeling uit, sodat hulle die opeenvolging van stappe in handeling kan begin beskryf en waardeer. Ek wil vir hulle 'n lewende voorbeeld

wees in hierdie lering en daarom is dit nodig om vir die kind 'n troeteldier toe te ken indien die omstandighede dit toelaat, al is dit net in die leersituasie. Die troeteldier se behoeftes moet met die kind se eie liggaam se behoeftes vergelyk word, sodat erkenning gegee kan word aan My sorg vir alle siele, ook in die natuur. As die kind besef hoeveel werke Ek vir sy eie siel en die van ontelbaar ander doen, sal sy behoefte om My te ken, vergroot. Die kind is nog jonk genoeg om vol bewondering die lewe te aanskou, daarom moet die nut van die troeteldier en ander skeppings ook aandag geniet. Vergelyk dit met die nut van die kind se bestaan vir die mense om hom, sodat hy ook 'n plekkie vind om in vrede te geniet. Ek is teenwoordig in al die lering wat aan die kind gegee word en sal so oomblikke verlig met insig vir die opvoeder.

Die tiende jaar gaan oor keuses in die kind se lewe. Die keuse om My te aanvaar of te vergeet in sy hart sal eerste aandag geniet en blyk uit sy optrede. Hierdie jaar is 'n kernjaar in betrokkenheid van die ouers en opvoeders. Hou voor oë dat die kind op enige stadium van die aarde ontsê kan word as 'n leerskool en bly die kind bystaan met gedagtes rondom My en My werke en bedoelings. Ek wil 'n plek in die kind se roetine geniet deur nou as leermateriaal geken te word. Die kind moet daarom elke dag uit die boeke van My geskifte lees om My in sy hart te vind. Wanneer lees gemaklik geskied, kan die oorskryf en in herinnering nasê van wat Ek die kind wil leer ook 'n plek vind in die dag. Hierdie taak het met getalle te doen in die daaglikse gebruik daarvan. Indien die kind verstaan dat elke dag 'n belangrike dag in My bestaan is, en dat take nooit 'n einde het nie, sal die kind My Grootheid begin besef. Gee aan My die eer deur sang en leer die kind verstaan waaruit musikale elemente wat mekaar deurgaans herhaal, bestaan. Geniet sang voor

My deur My lof te besing en die natuur om julle te bewonder. Geniet dit deur beweging en ritmes van My natuur na te boots. Geniet dit deur self natuurlike klanke te probeer skep, sodat die aanhoudende ritme 'n begrip in getalle vir die kind raak. Tel saam met die ritmes sodat die kind leer dat geduld 'n positiewe belewenis is en leer dan die kind van sy eie liggaam se ritmes in asemhaling en hartklop en hoe die kind eintlik as 'n geduldige wese geskape is, waarin ongeduld net 'n plek vind wanneer die siel op haarself ingekeer raak. In diens van sy eie liggaam en die behoefte van andere is geduld die enigste uitweg tot voortbestaan. Ek wil die kind met hierdie les bystaan deur voedselvoorbereiding as les te gebruik. Indien die kind leer watter voorbereidende stappe daar bestaan om voedsel op die tafel neer te sit, vanaf die skep van die item in die natuur tot die verwerking daarvan om uiteindelik keurig gegeur op die tafel te staan en hoe vinnig dit dan deur die siel verorber word, sal die siel verstaan watter lang pad dit weer neem om afgebreek te word in bruikbare sieledele vir die ewige doel – bykans ewe lank. So moet die kind ook leer nadink oor watter voeding goed is vir die siel en wat die gevolge van die gebruik daarvan is vir die siel, sodat voedselkeuses ook 'n daaglikse verantwoordelikheid vir die siel word. Amein.

In die elfde jaar is die kind nou gereed om op sy eie take aan te pak. Leer die kind daarom deur werksblaaie en boeke soos versamelings bymekaar te voeg hoe kompleks My take is. Nou moet die kind groepe gedagtes met gemak kan bymekaar voeg en bereken, vergelykend met take en verantwoordelikhede se beplanning en afhandeling. Hier kan masjiene se werking en ontleding 'n plek vind in die vergemakliking van take vir die mens en hoe kragte dus deur hulp van sterker materiale vergroot word. Bestudeer daarom ook die sterkte van materiale wat deur My natuur

en die mens se denke ontstaan het. Leer om dit met water en die invloed van water daarop te vergelyk. Verduidelik aan die kind die bestaansduur van nie-lewende dinge en waarom sieledele dan gebonde bly aan hulle verpligte, willose toestand van diens. Verduidelik aan die kind dat die siele onder in die aarde se ruimtes ook so gebonde sal bly om diensbaar te moet wees, voordat hulle 'n lewe van vrye wil mag ontvang en daarna in diensbare ruimtes uit eie wil vrygelaat sal word, na gelang hulle sag word soos water. Hierdie les oor bestaansduur moet in getalle vir die kind getoon word, sodat die kind kan bereken wat 'n enkele verkeerde keuse se gevolge vir 'n siel kan beteken. Verduidelik hiermee aan die kind dat 'n neiging na keuses teen My eer ophoop om 'n verharde hart tot gevolg te hê, wat Ek nie deur dwang, maar deur diens moet versag. Leer daarom om alles wat lewe toon te waardeer, omdat dit reeds sagte sieledele is. Vorm die wil van die troeteldier daarom ook om diensbaar vir ander te wees, indien die omstandighede dit moontlik maak. Hierdie jaar bring 'n voltooiing mee in die kind se slypingsproses. Vanaf hierdie jaar kan die kind aan die lewe se diens blootgestel word om daaruit te leer en alle kennis oor sake ondersoek. Dit is nie My Wil dat die kind nou reeds oor die mens se voortplanting kennis moet dra nie. Bewaar daarom die siele om nog nader aan My te groei deur vele keuses, voordat die siel My voortplantingskrag in haarself ontdek. Vanaf vyftienjarige leeftyd moet die siel kennis dra oor die beskerming van die saad en daarom mag daar tot dan uitgebreid na plante en diere verwys word om suiwer saad se voordele uit te lig.

Ek seën hierdie leerproses honderdvoudig (met verwysing na My verduideliking van honderd), in elke opvoeder wat die riglyne volg. So sal 'n nuwe geslag met verantwoordelike, sterk individue My vind in hulle roeping om Kinders van My Liefde te wees voor My aangesig. Amein.

HOOFSTUK 2

Kleure

My Naam is vol van die ligrykste, kleurvolste klanke – Jahweshua-Miriam-Gees. Hiermee vertel Ek aan julle dat klanke en kleure een word in die mens se siel. Ek wil dat My Kleintjies kleure deur klanke leer ken, en julle, My kinders, is die wyse waarop dit moet gebeur. Toon aan hulle My natuur se klanke en kleure tesaam, byvoorbeeld die donderweer en donker wolke, die blou tydens bewolkte dae en die heldergeel lig as die son 'n vertrek binnestroom met 'n glimlag op jou gesig. Toon aan hulle die voëlgesang en die blommeprag in die helder wit sonlig buite. Toon aan hulle die skoonheid en vredevolle klanke van 'n watermassa as My son se lig daarop reflekteer. Ek wil hê dat hulle My deur die klank van julle stemme leer ken, deur die kleur van julle emosies en deur die sagtheid van julle hande en werke. Ek wil hê dat julle kleur as 'n eenheid tussen die sintuie waarneem en nie net as 'n kleur op 'n skaal van lig na donker of 'n wiel van verskillende afdelings nie. Dit is nie My volledige kleure nie. My kleure vloei ineen en smelt saam om 'n 'gevoel' of wete tuis te bring. Wees in die helder kant van daardie skaal, want My teenpool se kleure is vertroebel met digte en donker dele en so sleur dit saam met klanke wat swaar en vol is. My klanke is eenvoudig en lig, soos wat 'n ouer met sy kind sal kuier. Amein.

Leer daarom My kleintjies van die begin af van die variasies van dieselfde kleur, van deursigtigheid van kleure en van Lig se breking om die kleure voort te bring. Leer daarom die kleintjies om die kleure in volmaakte samestelling te vind in My Lig en dat dit weereens in water 'n tasbare voorbeeld het. Ek wil dat hulle dit leer gebruik deur kleurpalette

watervarf te geniet. Die groter hoeveelheid water by die varf, laat My Lig se vloeibaarheid 'n lewende begrip word. Die samesmelting van kleur is hier ook 'n goeie voorbeeld. Maak kleurskywe waarop My kindertjies kleure se oorgange van die basiese, rooi, geel en blou na al die ander kleure kan waarneem. Maak lig en donker 'n ander les. Gebruik skaduwees om te toon hoe sterk vaste stof lig blokkeer en verduidelik dat Ek nie die soort lig is wat deur vaste stof gekeer word nie. My Lig skyn orals en daarin is nie skaduwees nie. My Lig deurtrek die liggaam en daarom is daar helder bloed en water in die liggaam. Ek heel ook deur Lig en daarom sal die liggaam gesond wees as dit gereeld in My son se Lig baljaar. Toon aan die kindertjies dat gesonde liggame soos ligstrale kan buig en beweeg en dat lig alle ruimtes binnedring as daar 'n gaping gelaat word. Tref daarmee 'n vergelyking met hulle harte wat die deur vir My moet oopmaak dat My Lig alle ruimtes kan vul om mee te handel, maar dat My Gees teenwoordig is om alles te sien, al is die deur nie oop nie. Ek wil dat My kindertjies modelle bou van hul hartshuisies om Lig te sien instroom daarin, sodra die deur vir My geopen word. Maak dit 'n blye gebeurtenis as die lig daarin vloei. Sluit weer die hart dig en maak kleiner openinge en sien dat hoe groter die deur vir My oopgaan, hoe groter sal die hart se blydschap wees om My daar te hê. Ek is hier om elkeen se tempel te verlig met My EWIGE LIG wat nie uitgedoof word nie, as die deur maar net wyd vir My oopgemaak word. Amein.

Kleur is te sien in die blommeryk, die diereryk, die voëls van die hemel en die visse in die waters. Die plante het ook 'n kleurskakering eie aan die omgewing en daarmee wil Ek uitlig dat kleure gegroepeer kan word na gelang van die skepping waarin dit hulle bevind. Ek het My kindertjies bymekaar geplaas in groepe waar hulle My maklik sal vind in

mekaar op die vlak waarin hulle hulle bevind. Maak daarom seker dat jy jou kindertjies met siele van dieselfde soort laat saamspeel om hulle te help om My in mekaar se werke te waardeer. Wanneer verstaan word dat groepe kleure saam hoort, kan kleurpalette met ander mediums saam aangebied word, sodat die siel leer hoe om kunstig kleure saam te gebruik in die skepping van 'n unieke werk. Lig aan My kindertjies uit dat Ek ook 'n kunstenaar is en tyd en dus Liefde in elke skepping se vorming geplaas het om dit prakties en uniek aan die aarde te gee. Net so is daar talle skeppings waarvan die mens nie bewus is nie, in ander ruimtes van My heelal, waar Ek ook 'n doel en nut vir elkeen het.

Op tweejarige ouderdom, moet kindertjies basiese kleure kan onderskei en beskryf, op drie-jarige ouderdom moet hulle sinvol daarmee kan speel, deur groepering en benoeming. Op vierjarige ouderdom moet die kind sy eerste kunswerke bedink, op vyfjarige ouderdom kan die kind verskillende mediums vir kunswerke byvoeg, op sesjarige ouderdom kan die kind 'n kunsprojek aanpak en op sewejarige ouderdom moet die kind vryheid beleef in die kies van sy kunsmediums vir sommige projekte. Op agtjarige ouderdom moet My werke as voorbeeld gegee word om te begin naboots en op negejarige ouderdom sal die kind uit sy eie teksture begin noem in die skeppingsproses. Dui dan aan hoe lig en skadu die teksture vorm en ondersoek natuurlike maniere om teksture en lig weer te gee. Tydens die tiende jaar sal die kindjie 'n baie goeie begrip toon vir die vlakke van materie, omhulsels, samestelling en groepering van die kleure. Nou is 'n goeie tyd om voorgrond en agtergrond uit te lig in lesse van dimensies en proporsies en daarom sal vêrtes en dieptes goeie lesmateriaal wees. Ook kan die mens se liggaam proporsies bygevoeg word en die gesig se dele

ontleed en nageboots word. Sodra die kind verstaan hoeveel klein deeltjies die geheel opmaak, sal waardering nog meer uit die hart spruit en daar opnuut na die skepping gekyk word om Lig en Lewe daarin te vind. Tydens die elfde jaar sal strukture wat deur die mens saamgestel is, 'n goeie studie wees om proporsies van stabiliteit te ondersoek en die kleurgebruik in raamwerke te vind. Lig dan aan die kind uit dat die skoonheid van ontwerp in die lyne lê en hoeveel lig daarin kan vloei. Die versiering van kleur deur materiale en byvoegings, is die karakter van die ontwerp wat laaste bygevoeg word, maar deur die ontwerp geïnspireer word. Dit word dus 'n eenheid, soos wat Ek die mens as 'n eenheid bedink het met 'n raamwerk en fyner skoonhede vir praktiese gebruik. Sien al die skeppings op aarde in daardie lig en bid voor jy werk verrig, dat die werk tot My eer sal geskied. Amein.

Hierdie inleiding in kleur sal verseker dat die kindertjies alle fasette van kleur ontdek en waardeer. Wetenskaplik kan baie aandag aan kleur gegee word, om te verstaan hoe kleur vorm, hoe dit meng en hoe om dit suiwer te hou. Ook sal kleur in die lugruim 'n studie wees om te verstaan hoekom sekere seisoene en ruimteverskynsels sekere kleure tot gevolg het. Maak My altyd die middelpunt van die gesprek deur te vra hoekom Ek so iets sou wou laat verskyn en wat die nut daarvan is, want geen verskynsel is sonder rede nie. Amein.

Ek is elke kleur in volmaaktheid. Ek vul elke kleur in volmaaktheid. Kleure kan in die natuur gevind word om begrippe soos eenvoud, vrolikheid, weelderigheid en koninklikheid uit te beeld, maar water voed steeds elke kleur en kan nie skoonheid en lewe verbeeld as dit nie deurentyd die kleur voed nie. Net so kan die mens se

emosies nie kleurvol en helder bly as dit nie deur My Water gevoed word nie. Reinig daarom daaglik jou geestelike kleure deur dit voor My te bring en My seën en voeding daarvoor te vra. Amein.

Dit is die voltooiing van hierdie leerwerk oor kleure, want die aarde kan nie die volheid dra van wat kleur behels in die ewige nie. Laat My kindertjies net die belangrikheid en waarde van My bestaan in elke kleur vind en die eenheid daarvan, dan sal My Ryk se kleure voor hulle begin oopvou as die siel gereed is daarvoor. Amein.

HOOFSTUK 3

Vorms

Hierdie hoofstuk se werk het 'n baie diep betekenis vir die siel, maar sal nie in die bestaan van die kind besef word nie. Ek heg bepaalde vorms aan alle lewende dinge om die siel se neigings daarmee ten toon te stel en so het nie-lewende dinge se vorms ook te doen met die doel waarvoor hulle in bestaan gebring is.

Die eerste les van vorms is dus hoe dit ander kan dien of tot nut kan wees. Die tweede les is veel dieper in die gees, dus hoe dit ontwerp is tot geestelike ontwikkeling. Hoe kan dit moontlik wees, vra 'n mens My dit dan af? Wat is die nut van die klip, die berg, die skulp, die mos, die eiland of die blad van 'n landskap? Elke ding wat die mens om hom sien is tot nut van die gekluisterde siele daarbinne en sal deur die suiwering en versagting van vloeiende water tot nut en gebruik kom in sekere aardse tydperke. Die aanvanklike los spoel van rotse tydens groot watermassas, die verkleining van die gronddele met waterkragte, die samevoeging van fyn gronddele in bruikbare hope, die bemesting daarvan deur verrotte sieledele, die in die lewe roep van plantegroei om stukkie vir stukkie weer die leë aardkors te versier met kleure, is alles werke wat Ek deur My engele en lewenskragte in werking stel om sieledele weer 'n kans te gee om opwaarts te beur in die groeiproses. Amein.

Groot vorms is niks beter as die kleiner vorms wat julle om julle vind nie en elkeen loop dieselfde pad om reiniging en eenwording te bereik, as julle siele. Die voltooiing van die eenwording met My Gees van Liefde, is net vir elke vorm op 'n ander terrein of vlak. Indien die plant sy lewensenergie

ingespan het om die hoogte vir sy tipe te bereik, blomme, vrugte of sade voort te bring en My Lewenswater in te span om 'n goeie voorbeeld van sy tipe plant te wees, het dit sy huidige doel volbring en is gereed vir 'n volgende doel in die ewigheid. Dit maak die ontwikkelingsgang vir die plant se sieledele moontlik en hoewel dit etlike jare vir sommige plante neem om die ontwikkeling van daardie tydperk te voltooi, is dit 'n voortdurende, hernuwende proses om die sieledele te help om meer en meer diens aan My te verrig. Amein.

Ek wil vorms nou verder bespreek aan die hand van fyn lyne in lewende dinge. Elke lyn wat Ek gevorm het, het ten doel dat iets buigbaar of verfynd voorkom en daarmee diensbaar is. Net so moet die lyne op 'n bejaarde gesig toon dat die jare se diensbaarheid nou sigbare resultate toon. Ek het net lyne in die aardse dinge bewerk, omdat tydperke hier in jare gemeet word. Fyner stowwe, soos insekte en plante se lyne is van korte duur. Ek wil dat lyne vir julle simboliese waarde dra as verantwoordelikheid. Die swaar, aardse stowwe en leerskool is 'n verantwoordelikheid wat die siele hier opgelê is om na My terug te keer nadat hulle eens van My wegbeveeg het en daarom sal elke buiging 'n goeie nut dien om hulle weer na My te laat terugkeer. Die enigste vorms wat sonder lyne vir buiging bestaan op aarde, is lig en water. Daar is ook wind, maar dit dien as 'n krag en kwik dien as 'n vernietigende swaar metaal. Metale op sigself is met lyne geskape in hulle skeppingstoestand, so ook is visse vaartbelyn en met organe, dus nie 'nonbelynde voorkoms. Wat sal dit dus oor die wedergebore toestand uitlig? Die feit dat eenheid van vorm 'n hemelse waarde het en dus net aan alles in My Ryk toegeken kan word. Word daarom een met die waters in julle siel en gees, want dan sal die Lig deur julle kan begin stroom. Amein.

Lyne is dus die begin van vorms en daar is reeds uitgelig dat dit net aan dinge kan behoort wat tot My moet terugkeer. Die diensbaarheid is dus ook uitgelig om die vorm te help om tot My terug te keer. Nou wil Ek aanraak dat volume dus net bepaal kan word wanneer vorms aanwesig is. In die ewige is bestaan nie gekoppel aan tyd of volume nie. My krag werk deur alles en dit is oneindig, maar het 'n doel in elke taak. Volume en verantwoordelikheid kan ook in een begrip gebring word. Hoe meer volume daar is, hoe swaarder is die verantwoordelikheid om diensbaarheid en bekering. Wees daarom lig in volume om maklik buigbaar en diensbaar te wees, sodat bekering nie 'n swaar pad vir die siel inhou nie. Amein.

Hoe gaan al hierdie leermateriaal vir die kind aangebied word, aangesien dit op 'n baie hoë begripvlak staan ten opsigte van die ontwikkelende siel. Ek sal hierdie hoofstuk gebruik om dit aan die kind te kan weergee.

Tydens die vierde lewensjaar met die bestudering van kleur, kan daar aandag gegee word aan die nut van die kleur tesame met volumes waarin dit voorkom. Hoe swaarder die kleur is, hoe swaarder sal die volume van die geskape item wees. Tref daarom verwantskappe en ooreenkomste met waar kleure en groottes tuishoort, sodat daar 'n ware begrip tussen die grootte van die kleur in die samelewing met die diensbaarheid van dieselfde kleur voorkom. Hier het die teenpool ingegryp en alle kleure se waarde vertroebel deur dit aan foutiewe dinge toe te skryf. Helder kleure is vir fyn versierings in die natuur gebruik en dowwe kleure vir die swaarder, groter volumes. In die hedendaagse bestaan, word die helderste kleure vir verkeerde doeleindes aangewend en daarom is die siele ydel en eiewys. Nederigheid is baie ver van die hedendaagse mens, omdat elke sintuiglike

waarneming sonder hemelse ordes en waardes is. Ek wil hê dat die ware begrip van die vleeslike bestaan in alle vorms vir My kinders herstel moet word. Gebruik daarom die regte kleure vir materiale in My Kinders se klaskamers en omgewings. Ek sal dit met goeie geestelike gevolge vir die hele gemeenskap seën. Amein.

Tydens die vyfde jaar het die kind met eksperimentering van spasies en vorms te doen gekry deur met beelde van lewende dinge te begin speel. Hierdie les moet met vele kuier-besprekings gepaard gaan om die kind 'n sin te gee in waar die lewende dinge hulself bevind op aarde en waar hulle beskut sal word ten tye van rus, kleintjies versorg of gevare. Dit sal baie uitlig oor die vlak van die siel in die lewende organisme. My sorg vir elke plant of dier is van groot belang in die voortbestaan daarvan in 'n enkele lewe, maar Ek het ook 'n groter doel met noodlottige gebeure vir elke lewende organisme, aangesien dit die vorderingstyd van die siele daarin versnel. Moet dus nie treur oor die heengaan van 'n troeteldier of oor die heengaan van 'n plantjie waarvoor jy probeer sorg het nie. Dit het 'n positiewe siele-ontwikkeling tot gevolg en jou sorg vir die plant of dier het daartoe bygedra. Die besluit om die lewe van iets te beëindig, moet egter voor My gebring word en uitgevoer word soos wat Ek dit vra. Amein.

In die sesde lewensjaar van 'n kind, het alle vorms name in abstrakte vorm, maar werk ook met dimensie, sodat die kind kan leer hoe dinge inmekaarpas en waaruit dinge bestaan. Die volheid van die vorm-begrip, sal aan die kind die doel van vorms toon, sodat dit nie net meer lyne is nie, maar 'n tasbare volume. Ooreenkomste met vorms in die dinge rondom hulle is so noodsaaklik dat daar ook modelle van die omgewing gebou kan word om die vorms te kategoriseer.

Hierdie hele proses baat die siel sodat dit My skeppings volgordes kan leer begryp en naboots. Net soos wat Ek skep en lewe gee, moet die kind leer skep en My seën daarvoor vra. Amein.

Die sewende jaar is vir die kind 'n kragtige jaar in die stel van vrae en die bymekaarbring van spel en verantwoordelikheid, daarom moet die kind die vorms nie meer as apart van sy bestaan beleef nie, maar deel van sy take en ontwikkeling. Vergelyk daarom die sfeer met waterdruppels en eenheid, net so is alles op die aarde deel van die aarde, solank dit op die aarde is. Dui nou aan dat soos 'n ui lae het, die liggaam ook lae het en dat die sigbare hier bly, maar die reuk van die ui wat oë laat traan, styg op (gaan na 'n hoër bestemming) sodra die liggaam sterf en Ek My Krag daaruit onttrek. So kan na vele lewensmiddele gekyk word om die kind te toon wat aards en hemels is en hoe vorm die hemelse help omvat om diens te doen op die aarde. Selfs smaak speel hier 'n rol, want wanneer die voedsel reeds ingesluk is, sal die smaak daarvan nog in die mond agterbly. Dit is 'n teken van 'n hoër waarde of komplekse samestellings, meer as net 'n vorm met lyne. Dit dien 'n doel in die gebruik daarvan. Amein.

Eksperimentering met stowwe, voedsel en samestellings kan vir die volgende paar jaar deel uitmaak van die leer-materiaal, maar altyd met My as beginsel en die soeke na die siele se waarde daarin. Legkaarte soos julle dit ken, is nie van soveel nut in die siele-ontwikkeling nie. Bou-eenhede waar meer dimensie aan lewende dinge toegevoeg word, sal 'n groter nut hê vir die kind se begrip van skeppings en ewigheidswaarde. Moenie oppervlakkige beelde gebruik in die opvoedingstaak nie, want dit vermors kosbare tyd om My te vind in elke dag. Gebruik materiale wat die kind se siel laat vrae stel en nie net die brein-vermoëns voed nie. Ek wil

betrokke wees en die gesprekke lei.

Wanneer die funksies van lewende dinge begryp word, kan die vorms oorgaan na mensgemaakte voorwerpe, sodat die mens se skeppende vermoëns daarmee ondersoek kan word. Die mens se materiale is hoofsaaklik in staat tot hoekige ontwerpe en harde lyne. Sagtheid wat deur die mens se hand ontstaan, het nooit so 'n buigbare, diensbare vermoë om as nederig beskryf te kan word nie. Die hardheid van die aarde is altyd te ken in 'n mens se skeppende vermoë. Soek daarom saam met die kind die teksture in vorms, sodat My Grootsherd daardeur erkenning kry. Amein.

Hierdie voltooi die les oor vorms, want in die Hemelse Ryk het die vorm nie so 'n groot doel soos op hierdie aarde nie. Vorms is dus 'n eindigende skepping en dit wat daarbinne is, moet ewig ontwikkel. Toon dit deurgaans aan My kleintjies, sodat hulle dit voor oë hou in al die keuses wat voor hulle gelê word. Elke behaaglike item op hierdie aarde kom in 'n vorm voor en net My Hemelse voeding en seën is vormloos vir die aarde en dus 'onsigbaar'. Nee, My kinders, dit is die volheid waarna julle verlang, die inhoud, die voeding en die Krag. Leer My kindertjies om te vra vir Krag in elke taak en dag en daaruit sal die vermoë spruit om met My Skeppende Krag een te word. Amein.

HOOFSTUK 4

Lewe

Redding is nodig vir alle lewe op aarde, want die lewe waaruit julle krag put, het die dood tot gevolg, soos wat mot en roes alles laat vergaan. Hoe kon 'n God dit bedink en in die 'lewe' roep? So vra menige kind buite My Liefdesorde. Indien die kinders nou gehelp word om My Liefde te verstaan deur lewe in alles te ondersoek en My vir die ewige nut daarvan te vra, sal hierdie onsinnige gedagte van die Kinders van My Liefde wyk. Ek het niks geskape om soos 'n papier na 'n enkele gebruik te vergaan nie. Die woorde wat op die papier van My Skepping geskryf word, gaan saam met daardie siel na elke volgende geestelike vlak. Hierdie is die lering wat nodig is vir My kindertjies om waarde tot hulle dade en denke toe te voeg. Hierdie wêreld vra: wat het jy in jou lewe vir die wêreld beteken of gedoen? Ek vra: wat het jy in jou aardse bestaan tot jou ewige bestaan toegevoeg? Het dit nut gehad vir My om jou na hierdie aarde te stuur om soveel tot jou beskikking te hê om ewig te ontwikkel? Wees daarom ingestel op ewige prestasies en nie die aardse prestasies in die klaskamers van My kindertjies nie. Help hulle daagliks om te verstaan en te dien in die plek van te onthou en te bewys. Niks hoef bewys te word as daar na die LEWE gekyk word nie. 'n Baba bewys nie dat hy asem haal en jou nodig het nie, dit is bloot die lewe. 'n Dier bewys nie dat dit in die omgewing is en skade gaan verrig nie, dit is die lewe. Die wind bewys nie dat dit 'n sekere seisoen is en dat dit sy werk goed doen nie. Dit is die lewe.

Neem daarom die prestasie-bewyse uit My Kindertjies se leerskole en gee aan hulle die lewe terug. Dit beteken dat daar met vryheid moet leer uitgesien word na elke klas, elke

ondersoek, elke bespreking en elke taak. Dit moet in die groter prentjie vir hulle sin maak dat dit die lewe se behoeftes is waaraan antwoord gegee moet word. Dit beteken dat daar nie idees oor die toekoms se werkloosheid of nood geskets moet word nie, maar dat afhanklikheid, nederigheid en diensbaarheid teenoor My Sorg hulle moet leer dat Ek alles wat Ek geskape het liefhet en WIL onderhou. Dit is die lewe. Ek skep lewe en dit is geduldig. Leer die kind dat take gekoppel word aan sy eie vermoëns en nie aan voorgeskrewe prestasies vir 'n sekere ouderdom of skool nie. Help die kindjie om sy vermoëns te ontgin, op die maniere wat Ek in hierdie boek aan julle uitlê, sodat die kind groot treë op hierdie aarde neem vir sy ewige bestaan. Amein.

Die ondersoek van die lewe kan begin deur na die hande te kyk. Die wil om te beweeg, die verskeidenheid take wat verrig kan word daardeur, die sagtheid van vlees, die kern wat sterk bene nodig het, die naels as praktiese versiering, dit alles is 'n deeglike studie van die lewe. Die vinger-afdruk, handafdruk en kullende skadu-beelde wat met hande gemaak word is alles deel van eienskappe van die lewe. Help die kind om dit te vergelyk met dinge wat werklik om hom gebeur. Leer dan die kind dat die hand versorging nodig het en opreg gebruik moet word. Niks mag My oneer aandoen nie. Leer die kind dat alles met 'n keuse voor-af gaan. Die hande sal doen en dien soos wat gekies word om te dien. Die hande sal lyk soos wat die persoon kies om sy tyd te spandeer. Kies tyd saam met My in My daade van Liefde. Amein.

Die volgende studie sal die kind help om My te vind buite homself. Ontdek die lewenskrag in 'n saadjie deur ontkieming te bestudeer. Ondersoek die nood van die

saadjie in die ontkiemingsproses en die kwesbaarheid daarvan deur weers-omstandighede. Laat saadjies in verskillende toestande gelyk ontkiem en beskou die gevolg daarvan in gesprekke. Dit sal die kind help om verantwoordelikheid en voor-uit beplanning te oordink, sodat hy as versorger in My plek op hierdie aarde kan dien. Leer deur hierdie ondersoek die kind wat dit beteken om te heers met My, soos wat Ek aan Adam opgedra het. 'n Verdere les hierin sal die ondersoek van volgroeiende plante en hulle habitate wees. Net sekere plante is geskik om in kleiner tuine te dien en selfs dan sal die heerser se sorg aangedui word deur die voorkoms van die plant. Sommige tuine word net aan sy eie lot oorgelaat en daar sal plante mekaar maklik verdring en selfs doodgaan. Sommige tuine word te veel gedruk in 'n vorm in en daar sal oormatige betrokkenheid van die heerser 'n willose toestand verbeeld. Leer My kleintjies dat Ek aan elkeen sy eie lewenskrag gun en net ingryp indien 'n naaste bedreig word daardeur en dit die siel daardeur sal baat. Indien 'n plant egter nie goed wil aard in die omstandighede waarin ek dit geplaas het nie, sal dit beter wees om dit te verwyder. Al hierdie waardevolle lesse oor waar en waarom lewe toegeken word en hoe om te beplan, lei en te rig, sal My kindertjies inlei in hemelse wysheid oor hulle siele en help om waardige leiers te wees vir My kinders. Amein.

Die sorg vir 'n troeteldier is reeds genoem en dra by tot die eenheid met My Wese deur die kind se besef in die energie wat gepaard gaan met lewe. Lewe kan nie gekeer word of verander word nie, net gelei word en beëindig word. Dit is My taak om dit vir elke lewende wese te doen en so wil ek My kindertjies leer om dit ander toe te laat en in vreugde te sien deur die liefde en toewyding van 'n troeteldier te leer verstaan. Ware vriendskappe kan daarmee belig word, deur

waardes in die verhouding tussen kind en troeteldier te bespreek en die kind kans te gee om sy waardering of gevoel daaroor te verwoord. Die belangrikste les in die lewensaspek vir kinders is om te leer om nie voorskriftelik of agter-af te wees nie. Dit bring negatiewe gevolge vir al die betrokke siele. Slegs openlike vertroue en liefde sal alle verhoudings baat en help groei nader aan My. Amein.

Die lewe bestaan in alle vlakke van die omgewing rondom die kind, hetsy die tuiste, die klaskamer, die natuur en water oral om. Die kind se besef van lewe sal met alles groei in volwassenheid en dit is die taak van die opvoeder om in al die vroe bystand te bied om denke en liefde na My te wend. Maak die lewe 'n werklike konsep deur 'n afdeling in die klaskamer in te ruim waar al hierdie lewende dinge daaglik aandag geniet. Die lewe van plante, diere, mense en die weer is 'n eenheid. Dit benodig die waarneming, betrokkenheid en sorg van die mens om sy lewensruimte in liefde te geniet. Daar moet beplan word hoe om prakties aan te trek, sodat diens vir die dag met toewyding kan geskied. Daar moet besluit word hoeveel kos en water is vir verskeie lewende dinge in die omgewing nodig om gelukkig te kan groei en gee. Daar moet diensbaar gevra word wat die mense se behoeftes is om hulle take te verlig en My Lig so in die omgewing te vergroot. Leer My kindertjies om Lig te bring onder al die lewe om hulle op hierdie manier. Leer hulle die vreugde daarin om dit daaglik te doen en help hulle om opruiming na take se waarde in die lang duur te beleef. Lig so die ordelike denke en vrede wat daarmee gepaard gaan uit. Amein.

Ek is in alles wat lewe, maar ook die krag wat alles in stand hou. Sonder My sou 'n klip nie sy vorm kon behou nie en grond nie op die aarde kon bly nie. Alles van die aarde vorm

‘n eenheid met die aarde, omdat Ek dit so wil en die krag is wat dit aanmekaar hou. Onderzoek die omgewing saam met die kind en bespreek natuurkragte en verskynsels as gevolg van aardse omwentelinge. Dinge wat op een plek nie reg is nie, veroorsaak ‘n reaksie op ‘n ander plek en so gebeur dit ook in die siel. Siektes is die oorsaak van sekere dinge wat nie binne die regte orde gebeur het op ander plekke in die liggaam nie. Ek wil die orde wees in alle lewe, maar kan dit net wees as Ek daarom gevra word en toegelaat word binne die siel se lewensfeer. Wanneer daar deur gebed en vertroue na My gekeer word, kan Ek liggame, kragte en omgewings seën met vrede en groei. Help daarom mekaar om My as versorger aan te roep en bid om Wysheid in hoe die omgewing bestuur moet word en node aangevul moet word. Amein.

Die kind moet leer dat alle persone in die gemeenskap ‘n ewe groot taak in die sorg van die omgewing het deur gebed en vertroue en moet daarom teenwoordig wees tydens sulke gebede. Die verantwoordelikhede van die omgewing moet ook as ‘n tipe tabel of werkskaart aan die kind sigbaar gemaak word, sodat die orde en roetine en dus geduldige verantwoordelikheid van die inwoners ‘n sigbare beeld in die kind se gedagte-wêreld bring. So kan die kind leer uitsien na My Groeiseisoene en die waarde van Oesseisoene begryp. Al die take in die voedsel voorsiening van die gemeenskap moet in ‘n geestelike sin aan die kind oorgedra word deur dit te vergelyk met fases van sy geestelike ontwikkeling. Die kringloop daarvan kan verduidelik word, as ‘n hoër vlak in die siel wat homself elke keer ontvou. Net soos wat die vordering elke jaar korter voel as in vorige, onervare jare, kan daar na die ewige gekyk word om te besef dat vreugde en vrede ‘n ‘ewige’ bestaan na ‘n oogwink laat lyk. Bespreek tyd en lewe in daardie verband, waar

goeie seisoene tyd nutteloos laat voorkom, omdat daar oorgenoeg van alles is, maar slegte seisoene maak dat nood noodlottige gevolge kan meebring, omdat alles vir te lang tye sonder sorg gelaat is. Ek wil nie die swaarkry aan My kinders sien nie, Ek wil graag die ewige seën oor hulle uitroep, maar dit is teen die orde van hierdie bestaan om net in seën te lewe. Alle siele hier moet gedwing word tot hoër ontwikkeling en moeisame groei en daarom moet die moeilike omstandighede die siele help om My Krag te vra in tye van nood. Net daardeur sal hulle My toelaat om hulle te laat groei in dankbaarheid. My Krag toon aan die siel sy eie magteloosheid, onvolmaaktheid en nederigheid teenoor My Grootheid. Ek laat dit egter nie oor 'n lewe toe met 'n septer en swaard nie, maar met geduldige gevolge om die siel te laat besef dat hy My moet soek met groter erns. Amein.

Hierdie is voldoende lesse oor die lewe op die vlak van 'n kind. Ek wil dat die opvoeders ruim verwysings bymekaarvoeg in die onderrigsituasie om die kind die mooi en lewenskrag van die lewe te laat begryp. Die negatiewe lesse is nodig as terloopse verwysings, maar die gemoed van die kind moenie te veel tyd aan slegte gevolge spandeer nie. Eerder moet die vrye ontwikkeling van die kind soos 'n lente-seisoen in die planteryk beskou word, waar baie water en sonlig en genoeg ruimte nodig is om die kind te laat groei soos wat die lewenskrag in die kind dit toelaat. Amein.

Ek seën hierdie kennis in die Kinders van My Liefde, sodat daar meer werk as lewende siele in My Ryk verrig kan word tydens hierdie laaste tye op aarde. My Kinders het nodig om mekaar te vind as Ligsirkels en daarmee vrede te vind in hulle bestaansdoel op aarde. Amein.

HOOFSTUK 5

Die Mens

My klein kindertjies het nog geen besef van hulle rol in die heelal nie. Die wêreld bestaan vir hulle uit alles en almal wat hulle om hulle beskou in kinderlike vertroue. Dit is julle taak as opvoeders om 'n goeie voorbeeld te wees van Die Mens voor hulle, dus om al My eienskappe in julle te koester en te vervolmaak om hulle sodoende te help om 'n riglyn te vind in die ontdek en vorming van hulleself. Amein.

Hoe die taak aangepak moet word, is reeds breedvoerig beskryf in die vorige hoofstukke, maar hier wil Ek weer meer Lig werp om die siel in die mens. Die aarde het genoeg riglyne oor die versorging en inligting oor die samestelling van die mens se liggaam, maar Ek wil julle toelig oor die ware werking van die mens se siel om nader aan My te groei. Amein.

Eerstens is die mens se omhulsel My Skepping wat waardeur en versorg moet word binne My riglyne, sodat daar 'n vlekkelose eenheid tussen My Lig en die uiterlike van die mens kan vorm. Dit wil sê die mens se omhulsel moet My werke doen met sagmoedigheid en ywer, sodat dit voorkom asof dit Ek is wat die werke doen. Hierdie sal die mens se uiterlike suiwer van vlekke en vreemde dinge voor My. Sodra die mens se uiterlike gesuiwer is en daar daaglik gewerk word aan die nuwe kleed van Lig voor My, kan die suiwering na die dieper vlak, naamlik die menslike siel gaan, waar ingewande se werking en die wil om dinge te doen vandaan kom. Dit is die vlak waar gesondheid of siektes ontvou, waar die siel opreg leer wees en swakhede wat na My teenpool neig koester of oorwin. Hierdie vlak het

versorging nodig deur My te vra vir suiwering en seën op elke dag se weë. Dit vereis dat die eienaar van die siel wakker is om enige negatiewe neiging of las gou aan te spreek en uit die weg te ruim. Dit is maklik om dit vir 'n kind te leer, deur dadelik verantwoording te bewerk vir konflik, slegte samewerking en verkeerde optredes. Hou dit aan die kind voor as 'n reël om dit altyd dadelik met die teenparty op te los of versoening daarvoor te doen teenoor My en die verontregte. Ek wil hê dat daar altyd en met sekerheid beskerming en 'n sterk vloei van energie in My kindertjies moet wees van My af en daarom is die oop hart 'n voorvereiste. Die hart se deur is die siel se begeerte en neigings. Indien die siel so 'n oop verhouding met ander en My handhaaf, sal dit die hart uitnodigend en ontvanklik maak vir My lering, teenwoordigheid en skoling om dit te help volwasse word in My Ryk. Ek wil dat elke siel volwasse word in My Ryk, omdat dit eenheid met My Wil beteken en dus 'n vergroting van My Skeppende en Versorgende Krag in die heelal. Amein.

Die koestering van ander siele maak die mens nog meer een met My, omdat dit die siel leer van die verskillende aspekte van My Wese wat telkens sterker is op 'n ander manier in ander as in die self. Indien die siel die Liefde vir ander ontdek en voed deur dade van omgee, diens en bemoeidiging, sal My Krag in die mens ontwikkel tot 'n diensbare gawe om die wil lewend te maak in die mens. Elke mens het 'n nut as Hemelse Versorger en selfs in daardie begrip is oneindige vorme van diens omvat. Ek wil My nuwe geslag in die lewe roep wat soos engele reeds op aarde hul take wil opneem, maar kan dit net bekragtig as die harte van daardie geslag suiwer geword het om nie bevooroordeel teenoor ander te staan nie. Al is die ander nie op dieselfde ontwikkelingsvlak as die self nie, is dit nodig vir die siel om die

ander as eenhede van My Wese te beskou. Die opnamehouers is nie altyd ewe groot nie, maar soos wat reeds vermeld is, is volume ten opsigte van krag iets wat aan hierdie aarde behoort. Amein.

Gebruik die volgende lesse om hierdie begrippe aan My kindertjies tuis te bring:

Neem 'n staf en deel dit in gelyke eenhede. Noem aan My kindertjies dat die eenhede elkeen ewe belangrik is vir die staf om 'n sekere lengte te wees. Plaas die staf op 'n balanspunt sodat die kindertjies kan leer dat die middelpunt van die staf die balans sal vorm. Skuif die staf rond op die punt en toon aan dat indien die staf nie presies in die middel vasgehou word nie, die balans onmoontlik te vind is om dit in 'n horisontale posisie te hou. Verduidelik vir hulle dat indien een van die eenhede wat daarop gemerk is, weggeneem sou word, die balans 'n nuwe middelpunt moes neem en die ou middelpunt nie meer bruikbaar sou wees nie.

Net soos wat hierdie staf uit dele bestaan, bestaan hulle menslike liggaam ook uit dele. Dit is die waters in hulle siele, die waters in hulle vlees, die waters in hulle harte en My water as Krag. Indien een van hierdie dele weggeneem word, wat in die meeste van die gevalle die water van My Krag is, sal die middelpunt wat Ek vir die siel bedoel het 'n nuwe plek moet inneem, die siel kleiner wees as wat dit bestem is en Ek dit vir minder dinge kan gebruik. Gebreke veroorsaak ook hierdie gevolg, maar indien die persoon dan My bid om Krag om deur die gebrek sy volwaardige diens aan My te doen, sal My Krag daardie te kort deel van die staf aanvul om dit 'n

onbenullige probleem te maak. Die wil van die mens sal die waters bepaal en daarom moet My kindertjies van kleins af getoon word hoe die wil die volwaardige mens beïnvloed. Ek wil die Wil wees, maar sal geen siel dwing om dit aan My te gee nie. As My Wil die wil van die siel word, is die middelpunt in hemelse balans vir die siel en soos wat dit bestem is om te wees. Amein.

Die volgende les is met behulp van dieselfde staf in 'n vertikale posisie. Indien hierdie staf nou in My Hand is, veroorsaak dit geen ekstra uitputting en moeite om dit te gebruik terwyl Ek beweeg nie. Dit is presies die lengte wat Ek benodig om My taak van beweging en ondersteuning uit te voer. Die verkorte staf sou My baie moeite besorg het, totdat dit so 'n uitputting raak om vas te hou dat Ek dit eerder neergesit het of 'n ander gesoek het om My taak mee reg uit te voer. Leer daarom My kindertjies dat Ek nodig het dat hulle die staf moet wees wat Ek hulle gemaak het om te wees, sodat Ek My take volmaak deur hulle kan uitvoer. Elke staf het 'n doel en diens om te verrig in My plan en indien die staf nie diensbaar is soos wat Ek benodig nie, moet Ek dit vervang met een wat My van nut kan wees in My taak. Amein.

Dit bring die kind by die vraag of Ek dan die staf sal vernietig? Nee, My kindertjies, nooit sal Ek die staf vernietig nie. Daar is 'n groot verskil tussen diensbaar vir 'n doel en nutteloos. Ek wil hê dat die nut gekoppel moet word aan 'n taak en omdat 'n staf nie nuttig is vir een taak nie, beteken nie dat dit geen nut het nie. Dit beteken dat dit sy beurt moet

afwag totdat daar 'n taak is waarvoor dit dan nuttig sal wees. Die nut gaan gepaard met die gewilligheid. Tot die staf dan nie gewillig is om 'n diens te verrig nie, sal daar ook nie 'n nut vir die staf wees nie. Elke taak waarna verwys word is iets wat My sal verhoog onder die mense op aarde. Die verantwoordelikhede om hulle siele te wen om in My te wil groei, tesame met die verantwoordelikhede om hulle te versorg met voeding en seën in die vorm van gawes wat uit My vloei, is alles take waarvoor 'n siel tot nut kan wees. Amein.

Ek wil ook dat My kindertjies na hierdie staf kyk van alle kante en sien dat dit 'n omhulsel en 'n kern het. 'n Hol staf sal nie sterk genoeg wees om as staf te dien nie. Stawwe het soliede materiaal nodig. Hierdie kern is die mate van volmaaktheid wat die siel homself toelaat om te bereik. As die wil om diensbaar te wees en homself tot My te wend aanwesig is, sal die voorgee van 'n hol staf wyk en die staf stuk vir stuk gevul word met krag om die diens te doen. Ek wil dat My Krag die siel totaal vul om 'n betroubare werktuig vir My te wees. Amein.

Hierdie laaste les is van belang vir die ontwikkelde kind, wat reeds verstaan hoe en waarom die staf gebruik word. Neem nou die staf in die hand en beskou dit van alle kante. Elke deel van die staf is soortgelyk aan die volgende, tog het elke deel 'n doel in die diens van die staf. Net so is elke deel van die mens 'n deel op sy eie, maar een met die hele staf en belangrik in die doel van die staf. Hierdie dele is een en tog nie. Wanneer ons na die merke kyk, word dit afsonderlike dele, maar wanneer ons na die staf kyk,

is daar geen laste nie. Soos wat hierdie eenhede inmeekaargevloei het, wil Ek hê dat die mens se dele voor My 'n eenheid moet word. Ek is genoem in daardie dele, sodat dit saam met die res as 'n Eenheid sal dien. Dan sal die staf 'n volmaakte staf voor My wees, wat sterk genoeg is om My te help in My take. Sonder laste sal daardie staf 'n ewigheid se diens kan verrig. Amein.

Hierdie les oor die mens se wese sal vir My kindertjies stof tot nadenke wees in elke jaar se groei. Dink dus daaroor na dat elke vraag van My kindertjies 'n ewige antwoord van julle kant af sal kry. Moenie vrae wegwys vir later nie en moenie vrae afjak nie. Antwoord die vrae soos wat die siel My Water vra, dat die siel op die kwesbare oomblik sy groei kan beleef waartoe dit aangespoor word. Amein.

Ek wil 'n verdere aspek van die mens noem en bespreek hiermee. Die samestelling van die liggaam as voorbeeld van die diens wat die liggaam moet doen in die ewige.

Eerste kom die voete aan die beurt, wat daagliks gewas moet word om suiwer treë en sterk beweging te verseker. Hier is al vele oor gesê onder My kinders en Ek wil dit weereens bevestig. Die voete van die siel is die nederige self wat gesuiwer en gewillig voor My moet staan. Die bene van die mens is die wil om die self tot nuwe werke te bring of om diens te doen. Die lendene is die suiwerheid van bedoeling in die handeling, sodat Ek dit kan seën met My Krag of nie. Die ingewande van die mens is die verwerking van die handeling, dat dit 'n vloeiende proses is of ongesonde 'vertering' tot gevolg het. Die skouers en rug vorm die raamwerk van die beweging en moet sterk en fier saamwerk om kragtig te beweeg. Dit verbeeld die sin en begrip van beweging uit My. Die nek is die balanspunt van

die hoof en ook belangrik om die stem te dra. Hierdie waarde in My is een van getrouheid. Die diens wat gedoen word, sowel as enige spraak moet My eer en daarom is getrouheid baie belangrik. Die hoof is die volheid van die mens se wil as individu en daarom is dit nodig om suiwer en helder te wees. Enige vertroebeling of onwilligheid, sal die daad of beweging belemmer en skaad. Maak hierdie les verstaanbaar vir My kleintjies deur na die liggaamsdele op 'n kaart te verwys en dit te bespreek in eie optredes wanneer daar opdragte uitgedeel word.

Dit alles dui op die ewige eenheid van die mens met My en indien elke liggaamsdeel geheilig word aan My Wil, sal Ek dit verenig met die ewige Krag in hulle (Myself) om daaruit te handel en oor te gaan in die suiwer wedergebore toestand. Amein.

Hoe moet die liggaamsdele dan afsonderlik geheilig word? Deur te kyk na waaraan dit koppel in die siel, sal daar 'n duidelike riglyn vir die self wees om die liggaamsdeel tot eenheid met My te bring. Ek wil dat elkeen wat hier lees hulleself denkbeeldig ondersoek van kop tot tone om die sterkte van die oorgawe aan My Wil te ondervra. Indien daar enige twyfel bestaan of die liggaamsdeel se sielefunksie My Wil uitleef, moet daar dadelik aandag aan geskenk word deur My te vra om daarmee te help en dit te suiwer. So word die hartsdeur vir My uitnodigend en kan Ek die waarde van die liggaamsdeel met die hart verenig. Amein.

Hierdie lesse oor die liggaam, siel en hart van die mens wat in 'n diensbare eenheid saam met My Krag hierdie aardse weg moet bewandel is die hoeksteen van elke lering wat aan 'n kind gegee moet word. Daarom het Ek die leerstof van My geslag kinders in My Hand geneem om dit vir julle moontlik en begryplik te maak. Amein.

Ek wil dat julle dadelik daarop begin fokus, want tyd het reeds oorgegaan in 'n nuwe orde voor My en Ek Wil deel wees daarvan vir julle. Ons het groot werk op hierdie aarde en Ek het al My engele nodig om gereed te wees om My Kinders se harte na My te laat terugkeer en so totale ondergang van Myne te verhoed. Amein.

Julle as mense, die kroon van My Skepping, sal binnekort die tipe seëninge wat Ek vir die mensdom bedoel het begin beleef, wanneer julle toegewyde+ werksaamheid en wil een word met Myne. Amein.

Dit is die Liefde waarmee Ek hierdie Bybel wil vul – die aanbod om julle in My Ligkring van Liefde in die ewige te verwelkom en op te neem as werktuie in die onmeetbare tye wat voorlê, sodat julle weer julle eersgeskape verantwoordelikhede en rolle kan uitleef en Lig so 'n werklikheid raak vir almal op aarde. Amein.

Groot is die genesingskrag in hierdie werk, indien die siele aan wie Ek dit bied dit opdrink en met hulle wese een maak, sodat Ek suiwer in hulle gestalte kan vorm aanneem. So sal elkeen My ken by die Naam as Man en nie meer kneg nie. Amein.

HOOFSTUK 6

‘n Familie

Hiermee wil Ek julle begrip verbreed oor wat ‘n familie vir My beteken. Ek het reeds verduidelik dat ‘n familie se siele gekies en bymekaar gevoeg is vir die rede van sielsontwikkeling met die korrekte ondersteuning. Hoekom is dit dan dat sommige siele verworpe en soos ‘die swart skaap’ voel tussen die ander in die familie. Alles gaan oor lewenskeuses, ja, maar tog is daar ‘n onderliggende faktor waaraan nie gereeld gedink word nie. Die samestelling van elke siel begin deur die betrokkenheid van My by verwekking, maar dit gaan ook veel dieper. So vêr terug soos die val van Lucifer. Daar het elke siel ‘n sekere plek in sy skepping bekleed en omdat daardie versoening deur hierdie lewe op aarde gedoen moet word, moet Ek daardie siele ook in die oorspronklike verwantskap verneder en saamvoeg om weer een te word, soos dit aanvanklik bedoel was. Die siele wat nie in ‘n familie pas nie na die afvallige kant, was duidelik die siele wat die ander gelei het in hulle dwase optrede en moet nou met Liefde weer gewen word vir My. Die siele wat uitgewerp word as die oordrewe gelowiges en ‘engeltjies wat guns by ander probeer wen’ was wel die siele wat saamgetrek was in die groot val, maar net as gevolg van verwantskap en nie eie wil nie. Ek wil al hierdie siele die kans gee om weer My Liefde te kies en daarmee een te word en daarom sal Ek die kans op ‘n regverdige manier aanbied. Vind daarom vrede met die familie waarin jy jou bevind, want dit gaan baie verder terug as die etlike jare wat jy reeds op aarde spandeer het. Amein.

Hoe moet die taak van bekering dan aangepak word? Ek is in elke liggaam ‘n stukkie krag, soos reeds verduidelik. Sodra

die mens homself reeds aan My Wil oorgegee het en Ek die instrument van skepping kan gebruik, soos wat hemels beplan en in die lewe geroep is, kan Ek met My Krag wat deur die persoon werk wel die ander familieledes se guns en liefde vir My wen. Hierdie hemelse krag kring vêr verby die aardse bestaan uit, daarom is daar 'n ewige kans om weer My Skepping met mekaar in My te verenig. Hoe harder elke siel egter werk aan die krag in sy vermoë om homself en ander nader aan My te bring, hoe groter kring hierdie krag uit om siele uit ander families ook by te staan in hulle taak. Ek wil hê dat julle hierdie les op die volgende manier aan My klein kindertjies moet uitbeeld en aanbied:

Neem 'n waterplas en drup 'n druppel water daarin. Die kringe van inval, sal uitkring tot die watervlak weer glad is. Dit is die neerplaas van 'n siel in 'n familie. Daar is baie rimpels in die familie tot die siel een geword het met die massa en almal weer tevrede is met die nuwe eenheid. So raak My Gees wat in die nuwe siel is een met die gees wat onder die familie heers en raak dit 'n groter krag wat die familie tot hulle beskikking het om My tot diens te wees. Daarin lê die seën van vele nakomelinge. Dit kan egter net 'n seën wees as daar op My Krag in die familie gefokus word, anders raak die Krag skraler en kan die water selfs opdroog. Daar is dan geen seën of eenheid in die familie oor nie. Dit is vêr van My Wil. Erken en verhoog My Krag in julle watermassa, deur julle aan My op te dra en te heilig. Amein.

Die volgende les is deur 'n grasspriet te beskou, waaruit nuwe blare uit litte ontspring en opskiet om nuwe bossies gras te maak en wortel te skiet onder elke bossie. Hierdie gras is 'n voorbeeld van hoe 'n familie as deel van 'n eenheid, tog afsonderlik as nuwe plant kan vermeerder met die lewenskrag wat van die oorspronklike familie af deurvloei vir

’n oneindigende voortplantingsvermoë solank as wat daar water en grond as voeding bestaan. Ek is die Lewegewer van hierdie grasplant en elke familie het die geleentheid om soos die grasplant een te wees met die vorige dele van die plant, sowel as met My wat die goeie, voedende grond onder die plant voorstel om sodoende gesonde vooruitgang van die plant te verseker. Amein.

Die volgende beginsel is te vind in die son wat net bedags strale op die aardbodem gooi. So is elke familie wat met hulle teenwoordigheid ’n goddelike uitstraling laat, maar wanneer die geleentheid verby is, sal die uitstraling ook nie meer te beleef wees nie. Tog wek die herinnering daarvan ’n vooruitsig van opgewondenheid oor die volgende belewenis in mekaar se teenwoordigheid. Laat elke familie dus so ’n voorstelling van My Lig en Liefde wees, dat die belewenis saam met mekaar ’n blye, geseënde geleentheid is. Amein.

Die les oor die ewige sielseenheid tussen familieleden is ’n heelwat moeiliker les en daarom vir ’n ouer kind bedoel (rondom nege-jarige ouderdom). Hier sal dit gepas wees om na My aardse lewe te verwys waar Ek neergedaal het as ’n kind tussen mense wat baie suiwer van hart en werke was. Nie een van hulle het ’n kind in gedagte gehad nie, want hulle toewyding aan My Wil was so sterk dat hulle mekaar se belange die hoogste geag het, wat hier veiligheid en versorging beteken het. So ’n toewyding vra Ek onder My kinders as families. Dit is die hoogste eer vir ’n familie as daar niemand in die familie swaar kry en van nood ondergaan nie, want dan het almal mekaar se belange op die hart gedra.

Hierdie familie wat My ontvang het, het egter na die eerste ontnugtering van ’n nuweling om voor te sorg, hulle uiterste bes gedoen om die nuweling ook te omvou met beskerming

en sorg. Liefde het glad nie by hulle ontbreek nie, hoewel hulle nie werklik begryp het, Wie aan hulle toevertrou was nie. Ek het daardie ouerpaar vir My aardse bestaan gekies, omdat hulle ware knegte van My was in die tyd voor die aardse skepping, een met My Wese en dus maklik te heilig in hierdie aardse bestaan. Die deurtog van die aardse pad, soos wat die Israeliete deur die geopende waters die land Kanaän moes inbeweeg, is presies wat hierdie paar moes deurgaen om hulle Liefde met My te verenig. Geloof, vertrou, heilige verseëling en vernederende laagtes is die weg vir 'n ware Kind van My om die beloofde Kanaän te mag beërf. Amein.

Indien hierdie les voorgehou word met die verduideliking dat laer siele ook die omringende laer omstanders uit hulle vorige bestaan as familieleden ontvang, sal daar beter begrip vir die opwaartse ontwikkeling en heilige doel van die aardse bestaan wees by die kind. Stel aards en laer geestesvlakke voor deur die materiële ydelheid wat slegte lewenswyses as uitgangspunt het. Stel die hemelse voor deur My aardse lewe wat nederig, sonder enige besit en gewyd aan die diens en seën van My naastes en volksgenote was. Dit is wat Ek van elke kind van My Liefde vra. Geen verwerping van die ander is aanvaarbaar voor My aangesig nie. Selfs nie eers totale verkeerde wandel regverdig verwerping in die familie nie. Gebed en sorg in die mate waarin die siel tot bekering aangespoor sal word, is uiters belangrik. Ek wil dat al My Kinders op hierdie aarde soos die lelies van die veld gevoed en geklee sal wees met sorg na liggaam en siel en sal daarom in elke familie iemand van sterk genoeg aard gee om die ander so te bedien, maar vra genoeg nederigheid van daardie persoon om die ander te aanvaar vir die krag wat hulle reeds ontgin het en in Liefde te help dra tot die hele familie weer soos water 'n groot eenheid voor My word. Selfs in die hiernamaals word voortgegaan met die wen van

siele wat mekaar ken en nie. Amein.

Ek wil ook dat My Kindertjies kyk na die herkoms van families uit vroeëre geslagte en hoe dit by mekaar aansluit in die huidige tyd as oorlewering vir hulle eie nageslagte. Maak daarom 'n voorstelling van 'n familieboom soos wat julle dit ken, maar wel van onder na bo en dui aan dat die boonste geslagte nader aan My sal kan lewe as hulle dit so kies, omdat hulle van die fyner siele van die boom is en hoër kan reik. Die krag van die boom bly egter eie aan sy soort en vloei voort van die oorsprong tot in alle sade wat weer nuwe bome sal bewerk. Hierdie boom is geanker in My Krag en kan slegs bly lewe indien My Krag gebruik word om dit te voed. Ek wil dat die bome uitspruit om meer en groter te word en nuwe, vars groeipunte mee te bring. Amein.

Hierdie bome se oorsprong is veel verder terug as die ontstaan van hierdie aarde. Elke siel wat deel vorm van die skepping wat nou as 'n boom voorgestel word, was voorheen deel van dieselfde groep, maar in 'n ander vorm van groei. Hierdie groei het My Krag geneem as middelpunt en uitgekring in al die kleure waaraan daar gedink kan word tot "n blomvormige lewenspunt waaruit nuwe klanke en geure gespruit het. Elke blomvormige lewenspunt het unieke werke in stand gehou en samewerking tussen die sieledele het die skoonheid van die lewende organisme hoog gehou. Net soos wat daardie bestaan van die lewenspunt in een oomblik almal omvat het, is die bestaan van daardie lewenspunt nou 'n uitgerekte geleentheid oor baie jare met dieselfde sieledele as lewenspunt daarin. Apartgestelde lewens van ander volke is daarom gegee, sodat hierdie lewenspunten nie vertroebel sal word met die werke wat daaruit moes vloei nie. Elke volk en stam het sy eie werke voor My wat hom diensbaar maak vir 'n sekere doel. Amein.

Ek wil dat My kindertjies hierdie deel maak van hulle begripswêreld van vroeg af, om sodoende die nodige waardering en liefde vir elke familie se wese te ontwikkel. Blootstelling aan ander families is goed onder leiding van die ouers en opvoeders, maar 'n kind is nog nie gereed om ander families op hul eie te beleef en die belewenis gesond te verwerk nie. Hou dus die kindjie onder jou sorg tot op 'n laat ouderdom, voordat daar vryheid van saamwees as individue toegelaat word. Amein.

Ek heg hierdie eenheid weer saam op hierdie aarde om die diens wat Ek deur hulle bedoel het, weer 'n kans op lewe te gee en sodoende die volmaakte Eenheid van My Wese weer heel te maak. Indien die familie in geloof en liefde diensbaar word, sal hulle in die ewige tye wat voorlê weer 'n oorstroom van My krag beleef. Amein.

Die voorstelling van hierdie krag wat families besit kan geïllustreer word deur die ondersoek van 'n byekorff waarvan daar vele op aarde bestaan. Die versameling van die soet nektar is die enkelinge se pogings om krag bymekaar te maak op hulle eie in hierdie lewe. Die berging van die verwerkte nektar in die vorming van heuning is die uitleef van die krag wat hulle iewers gevind het en 'n nalatenskap daarmee bied. Die lê van eiers deur die koninginby, is My krag wat Ek aan die familie gee om weer nuwe bye (samewerkers) in die vooruitgang van die byekorff te ontvang. Geen selfsug onder hulle, maak dat die kolonie kan swerf en voortplant en 'n diens lewer waar hulle ook al gaan, onder instruksie van die koninginby. Elkeen doen sy deel en gee sy kragte tot voordeel van die hele kolonie se voortbestaan en tog is elke kolonie se taak uniek ten opsigte van die ligging en diens wat hulle in 'n gebied doen. Amein.

'n Verdere voorstelling van 'n familie se krag wat uit My

vloei is die bestudering van swaeltjies wat as 'n groep migreer en so die voortbestaan van die families verseker, maar op hul eie onder My sorg lewe in 'n gebied waar hulle heen gelei word. Elkeen dra ook sorg in die voortbestaan van hulle geslagte, maar is 'n eenheid sonder om mekaar te benadeel. Amein.

Hierdie kennis van familie-werking wat die voortbestaan van die hele groep beïnvloed is uitermate belangrik in die tye waarin julle leef, aangesien satan hard werk daaraan om die familie-verwantskappe te skaad en op te breek. Indien hy slaag in sy doel, is daar geen krag wat bou op die vorige gawes om die skepping mee te laat vorder nie. Elke krag toestroming van My af is dan van korte duur om 'n enkele ydel werk tot stand te kon bring en weer 'n leemte te laat. Soek jou taak as deel van die eenheid van jou familie, want daarin lê geheimenisse opgesluit oor die werk wat die familie voor My moet verrig. Amein.

Hierdie kennis oor families moet op 'n eenvoudige manier aan My kindertjies oorgedra word, sodat hulle waardering, liefde en toewyding ontwikkel om een te wees met almal om hulle in familie-verband. Selfs die 'sondaars' in families moet weer ingetrek word deur liefdesdade om van hulle verkeerde weë te bekeer. Net My Liefde as krag sal dit bewerk en daarom moet gebed die manier wees om dit te beredder. Moenie uit jou eie die ander partye nader nie. Gee dit aan My en bid My Krag en heling oor jou geliefdes, want dit is die lewende Krag wat die eenheid sal bewerk. Amein.

HOOFSTUK 7

‘n Gemeenskap

Sorgsame handelinge in ‘n gemeenskap om die wees en weduwees en oues van dae en ouerlose kindertjies te versorg dra veel seën uit My Hand. Dit is egter nie die belangrikste tekorte wat raakgesien moet word nie. Gemeenskappe skeur uit mekaar as gevolg van hoogmoed en eiewysheid. Hulle dra die belange van stigtings en aansien van dade in die openbaar hoër in die hart as die versorging van hulle eie familie se siele. Gemeenskappe het ‘n groot tekort aan balans in die sin waarin Ek dit wil toelaat. Eerstens moet die stigtings laaste in aanmerking kom vir tyd en hulpbronne, tweedens moet die naastediens wat daardeur opgehemel word ware Water as Krag vind, deur eerstens families se tekorte aan te vul en daarna die gemeenskap se tekorte te vind en daaraan aandag te gee.

Indien ‘n familie byvoorbeeld in ‘n minderwaardige woning vertoef, kan die welgestelde persoon wat sy aandag aan die stigting se behoeftes wou opdra, eers na sy eie familie keer met minderwaardige lewensmiddele en daar, sonder aansien en verering sy verantwoordelikheid tot sorg en seën van die familie uitleef. As elkeen dit in Waarheid en Liefde doen, sal daar meer hande wees om gemeenskapstake vinniger en met minder ydelheid te volvoer. Amein.

‘n Gemeenskap het verder middele tot genot en diens in plek gestel om dit soos ‘n vloeiende masjien se werk te laat vlot. In die meeste gevalle is die nederigste persone die persone wat die meeste diens moet doen, sodat die belangrikste persone net die genotsure se aansien kan beleef. Dit is ‘n ware nes waar onheil uitbroei. Die idees

waarom genot draai spruit nie uit My nie en dus is dit die eerste aanduiding van valse naastediens. Sodra die gemeenskap hulle na My wend, sal genot nie meer tyd en plek hê nie. Ware waardering van die natuur en My werke daarin, sal groter waarde vir die siele se genot bied en moet daarom eerder aandag kry in die beplanning van 'n seisoen se aktiwiteite. Ek wil dat landstreke meer aandag geniet in voorbereiding en ter beskikking stel van families se gebruik om My te vereer. Ek wil nie dat grense en selfsug, vernielsug en losbandigheid veroorsaak dat die kinders van My Liefde so min van My ware werke van Liefde aan hulle ken en beleef nie. Amein.

Hierdie les kan aan kinders uitgebeeld word deur besoedeling van My mooi skepping met vreemde voorwerpe en dit dan te vergelyk met die besoedeling van 'n goeie gemeenskap as 'n lewende eenheid met vreemde gebruike, sodat die natuurlike vloei van krag en lewe daardeur belemmer word en verrotting, dood en stank oorbly, aangesien die orde waarin dinge moet gebeur versteur is. Amein.

Herstel die ordes deur tyd en versorging aan families te bied en sodoende ligter werk vir almal in die groot geheel te verseker. Indien almal kan saamwerk om die gemeenskap se natuurlike behoeftes te vervul, sal daar minder tyd vir ydelheid, afguns en onderdrukking wees. Amein.

Die volgende belangrike begrip rakende gemeenskappe is die hoogmoed wat draai na liefdelose optrede en verwerping. Indien gemeenskappe nie sekere 'wette' uitvaardig en streng toepassers is daarvan nie, maar alle inwoners net onder My Liefde se vergrootglas bekyk, sal daar nie soveel teenkanting onder mense vir mekaar bestaan nie, want almal sal mekaar herinner daaraan dat My

Liefde vergewe en dien. Dit trek mense nader aan mekaar. Ek wil nie dat elke stukkie krag wat van My uitgaan net gefokus word op die lewensduur van een gesin of persoon nie. Ek wil dat dit inmekaarvloei, soos 'n mat van grassprietie en 'n uitspansel van sterre wat 'n verhouding en orde teenoor die ander handhaaf. Elkeen gaan nie net sy eie gang nie, maar help die ander om 'n diens te doen deur self gehoorsaam te wees aan die orde waarin dit geskape is. Amein.

Hoe kan dit beredder word indien 'n gemeenskap soveel groeperings gemaak het om af te stam van die eenheid. Die hoogmoedsgees in gemeenskappe kan net gebreek word deur gebed. Een persoon se take en diens sal nooit as te nimmer die krag van die teenstander se hoogmoed wat goed gewortel is onder mense breek nie, maar gebed kan. Indien Ek so sterk aangeroep word om in al die betrokkenes se harte te werk, sal daar vernuwing en bekering plaasvind, al is dit as gevolg van 'n noodlottige gebeurtenis oor 'n gebied, dat almal mekaar weer kan vind in nederigheid. Laat nederige, opregte gebed dus deel uitmaak van My kindertjies se gebede onder mekaar. Laat hulle verstaan hoe belangrik dit is om daaglik vir ander te bid om My as 'n diensbare eenheid te nader. Amein.

Wat het hierdie te doen met die ewige sieleheil, aangesien Ek reeds genoem het dat wat een persoon vir die mensdom tydens sy aardse lewe gedoen het, geen nut het ten opsigte van wat hy vir sy eie sieleheil bereik het in sy aardse lewe nie? Ek wil dat die diens in gebed gesien word as bekroningswaardig vir 'n siel se ewige bestaan. Indien die siel leer hoe en waaroor om vir ander te bid, sal hy binnekort besef dat gebede vir siele 'n eindelose en vry taak is wat oor grense van tyd en afstand tot uitvoer gebring kan

word. Die gawe om met krag te bid vir ander in die ewigheid, bepaal 'n siel se diensbare vermoëns in My ewige ordes. Dit is tog nie moontlik om 'n siel te nader om haar van hulp te wees, as daar nie geglo word dat die siel gehelp kan word nie. Deur die beoefening van gebed, ontwikkel die geloof dus om ander te help en daaruit vloei die krag om dit te vermag. Dit is 'n logiese wiskundige gevolg tot krag wat bestaan en gebruik moet word. Amein.

Neem daarom die taak om vir ander te bid baie ernstig op en beoefen dit nie om die ydele begeerte om krag te ontvang nie, maar omdat dit 'n hemelse vermoë is wat weer lewend moet word in elkeen. Bid, sodat geloof en vertrouwe 'n eienskap van jou ewige bestaan kan wees en leer My klein kindertjies hoe om te bid deur 'n voorbeeld daarvan vir hulle te wees. Amein.

Die besef dat Krag dan deur mense begin vloei om eenheid te bewerk of versoening onder mense te bewerk of genesing tot gevolg te hê, moet gevolg word deur dankgebede en dankgesange tot My, sodat My klein kindertjies die hemelse gevolge van nederige versoeke en die antwoord daarop as 'n gawe uit My Hand beleef. Bou so 'n gemeenskap wat dien op alle vlakke. Amein.

Gemeenskappe kan blom in volmaakte uitleg voor My as hierdie beginsels en My algemene saamwoon-wette soos deur Moshè gegee, nagevolg word. Die ontwerpe sal dan My Lig op die kosbaarste manier reflekteer, sodat My Water die grond sal seën en voldoende sorg ook uit die natuurlike aarde vir hulle sal spruit. Gebruik 'n les in die natuur om dit aan My kindertjies te toon deur die bestudering van hemelse sorg in die benatting van My aarde. Amein. Indien die siele die Liefdeshitte wat onder hulle bestaan tot My wend en die lewende Water uit hulle harte, so opstyg na

My, kan die wolke van seën en oordekking oor hulle begin vorm, wat binnekort reën tot gevolg het, tot almal se voordeel. Indien daar geen eerbied en gehoorsaamheid van die inwoners van 'n gemeenskap ten opsigte van My bestaan nie, droog die lewenswater wat van My vloei op daardeur en is daar geen goeie vog wat na My opstyg nie. Op hierdie manier verdroog die lug en daaruit vloeiend die aarde onder dit ook. Beskou so die droogtetoestande wat oor die wêreld heers. Te min Liefde na My is geprofeteer om droogte-toestande te bewerk, maar die sin daaragter was nooit voorheen bekend nie. Verstaan hiermee dat die wetenskap nie die siel se werking begryp nie en daarom nie op sy eie bestudeer mag word nie, maar wel met die leiding van My Woord om die siel lewe te gee, tesame met die ondersoeke en proewe. Proewe beteken egter niks as dit buite die orde van My Liefde geskied nie, want dan sal daar geen seën daarin opgesluit wees nie. Amein.

Wees 'n aarde vol seën in 'n gemeenskap deur die waters van jou wese te verenig in diens aan My en ander en My Skepping so tot nut te wees. Amein.

'n Gemeenskap se ordes en strukture soos op papier uiteengesit, het 'n doel in die skep van werk en vooruitbeplanning van voedselgebruik. Indien Ek geraadpleeg word om hier van hulp te wees, sal daar soos ten tye van JôWsef se diens in Egipte meer mense daarmee gevoed word as waaruit die gemeenskap bestaan. Ek is altyd in beheer van die lewensmiddele as harte na My gewend is. Leer My kindertjies dat eenheid onder 'n gemeenskap begin deur eenheid in gebed onder mekaar. Wanneer geloof en vertroue dan sterk genoeg ontwikkel het, sal belangrike sake soos die voortbestaan en gesonde strukture van gemeenskappe ook voor My gelê word vir antwoorde en leiding. Dit

sal verseker dat vele volke deur My seën bly voortbestaan. Amein.

Die dae is min waarin al hierdie omwentelinge moet plaasvind, maar indien My kinders My so seek van harte, sal daar soos in die dae van Noag vir hulle redding gebied word om te bly voortbestaan as Beelddraers van My op hierdie aarde. Ek het die diens van Myne nodig om seën te kan laat vloei na die aarde. Amein.

HOOFSTUK 8

Oefening

My klein kindertjies het nie veel aanmoediging nodig om oefening deel van hulle lewens te maak nie, tog wil Ek hê dat opvoeders dit 'n daaglikse saamdoen-aktiwiteit moet maak wat prettig inwerk op hulle kreatiewe gedagtes, sodat hulle die vreugde van beweging kan leer ken en dit nuttig kan aanwend in enige situasie. Leer hulle ook dat daar 'n tyd en plek is vir alles en dat die beweging as deel van die dagprogram op 'n spesifieke tyd en plek geskied, sodat dit 'n ordelike reëling vir hulle word. Spaar geen energie in die voorbereiding van 'n goeie bewegingsprogram nie, want die liggaam ontwikkel as 'n slim masjien, wanneer hy genoeg bewegings baasgeraak het. Amein.

Oefening het vir die siel 'n nut en doel in die diensbaarmaking van die wese. Amein.

Die mens is aangestel oor sy eie liggaam ook om dit gesond te hou en daaroor te heers en sodra beweging gestaak word of tot die minimum beperk word, begin die liggaam ydel raak en slegte sieledele daarin opgaar wat diensbaarheid en nederigheid al hoe moeiliker maak. Beweging is dus 'n eienskap van die tuig waarin julle julle bevind, wat julle moet gebruik om nader aan My te kom in die diens van alle lewe om julle. Amein.

Oefening gaan meestal gepaard met musiek en so het danse ook 'n ontstaan gevind onder die mense. Die ritmiese herhalings elemente in musiek is die aanspoorder tot die oefening wat uiteindelik goeie energieverbruik tot gevolg het. Ek vra net van elke kind van My Liefde om nie die musiek hulle fokus te maak in die bewegingsperiode van 'n

dag nie, maar My aan te roep as die Heiliger van die liggaam en siel. As Ek die krag is waarmee die oefening geskied, sal dit 'n geseënde belewenis wees vir beide die opvoeder en die kind. Leer hulle om My te vra om hulle krag en deursettingsvermoë te gee om hulle liggame sterk en gesond te hou en dat beweging nie beperk is tot 'n klas nie, maar tot diens van die lewe. Amein.

Die danse wat ontstaan het, het My kinders se harte vertroebel, omdat daar gefokus word op eie skoonheid, die liggaam se verleidings en die metgeselle se aanbiedings daarvan. Indien dans 'n middel is om My te vereer en die wellustige bewegings waaraan dit meestal geken word, opsy geskuif word, is dans 'n goeie middel tot beweging en die leer van orde op 'n sigbare wyse. Ek keur daarom die gebruik van musiek en ritme goed wanneer dit 'n beeld uit die natuur in herinnering roep of 'n gestruktureerde, ritmiese tentoonstelling wat beweging van verskeie liggame uitbeeld, byvoorbeeld plante in die wind of die golwe wat sand saamstroom by die see. Fyn bewegings is ook goed, solank die liggaam nie benadeel word deur die gereelde gebruik daarvan nie en die diens aan die naaste belangriker is as die beoefening van die aktiwiteit. Wanneer die mens gevoed word deur aansien en ydel ure, omdat dit as verskoning sekere dade 'n gewoonte gemaak het, is dit buite My Wil en orde om die dade te beoefen. Elke uur van elke dag is 'n kans om die siel te bearbei deur diensbaar te wees en My te vra vir krag. Wanneer die liggaam so versterk word deur oefening dat dit voel asof alle krag uit die self kom om aksies uit te voer en dit altyd tot hulp geroep word deur omstanders, omdat dit so sterk en versorgd voorkom, is daar 'n wanbalans in die siel van die liggaam se eienaar. As daar soveel tyd aan die eie liggaam gespandeer is, is daar te min tyd in diens van die naaste spandeer en het hoogmoed 'n

vashou-plek by die persoon gevind. Ek wil deur nederigheid geken word by My kindertjies. Leer hulle om net oefening te gebruik om soepel en sterk te bly en dit nie oormatig te beoefen nie, aangesien elke dag net 'n sekere hoeveelheid ure het om ander te help. Amein.

Hierdie les oor oefening gaan ook dieper as wat die mens kan dink. Elke sieledeel wat homself in die liggaam verenig het, word aangespoor tot lewe tydens 'n flink aktiwiteit wat oefening aanspoor. Die sieledele word dus sodanig uit hulle slaap wakker geskud en aangemoedig om die liggaam tot diens te wees. Dit verneder die sieledele en maak hulle dus meer bruikbaar in My Ryk. Wanneer 'n liggaam min genoeg sieledele besit, wat altyd gereed is vir arbeid en diensbaarheid, is die liggaam maklik te wen vir My daad en Woorde van Liefde, want dit is reeds deel van die handelswyse van al die siele in daardie liggaam. Wanneer 'n liggaam egter 'n oormaat van lustelose, ydel sieledele besit wat die liggaam vra om bevrediging van hulle rustende toestand, is die liggaam traag om aan My Stem en Wil gehoor te gee, want die teleurstelling in die liggaam wek 'n swaartekrag na die aarde en Sy verlokkinge. Moet dus nie die liggaam die kans gee om te veel ondankbare sieledele bymekaar te maak nie, maar spoor die eie liggaam aan tot nuttige energie-verbruik en diensbaarheid aan die self en ander lewe en raak so bewus van My Lig wat in nederigheid skyn. Amein.

Leer daarom My kindertjies hoe liggame met beweging energie verbruik en spiere versterk. Leer hulle dat hulle 'n betroubare tuig nodig het om hulle werk op aarde mee te volbring en dat hulle die krag daarvoor in My vind deur geseënde voedsel te eet en My te bid vir krag in hulle siele om te WIL diensbaar wees. Amein.

Hierdie les kan ook verder ontleed word, deur na plante te

kyk en die groeiende krag daarin te ondersoek. Indien die plant nie voeding opgeneem het uit die aarde nie, sou dit nie kon verleng of uitbrei in grootte nie. Die plant raak egter nooit 'oorgewig' nie, maar neem met mate die voeding op wat nodig is vir daardie dag se groei. Wanneer daar voeding geneem word, word dit dadelik omgeskakel in lewewende energie om groei te bewerk. So is daar geen gestoorde sieledele om die plant aan die lewe te hou vir 'n langer tyd as wat daaglik benodig word nie. Amein.

Laat My kindertjies kossoorte so leer beoordeel om net genoeg te eet vir hulle daaglikse behoeftes en ook die edele kossoorte na waarde te leer ag. Hierdie aarde het die siele verduister deur dit te verlei na onedele kosse wat te veel energie verleen en 'n oormaat van verlustiging vir die liggaam inhou. Indien daar teruggekeer word na die oorspronklike orde van swaar arbeid om voedsel te produseer en aan te bied, sal meer waardering bestaan vir die rol wat dit in die liggaam vervul. Amein.

Ook kan My kindertjies die lewe om hulle ondersoek en sien dat indien een dier kos benodig en 'n ander daarvoor vang, daar nie vermorsing van sieledele geskied deur ydele beplanning nie. Al die diere in die omgewing wat kan deel in die vangs, kry 'n beurt om van die sieledele te verorber en so weer 'n nuwe doel vir die vangs te bewerk. Kos moet dus nie net na willekeur gebruik en vermors word nie, want elke sieledeel het nodig om 'n hoër doel as die vorige te beklee. Wees daarom verantwoordelike verbruikers van voedsel en leer My kindertjies so uit julle gedrag. Amein.

Hierdie is genoeg inligting oor die gebruik en voeding van die liggaam en daarom wil Ek oorgaan na die volgende belangrike les in 'n kind se opvoeding. Amein.

HOOFSTUK 9

Kuns

Vele gedagtes is al rondom kuns en kunsvorme op hierdie aarde gedebatteer. Ware kuns is nie om probleme uit te lig nie, maar om My Lig vas te vang in 'n oomblik en so waardering by ander te wek vir die Skeppingsoomblik wat iemand kon raaksien. Heiligheid, nederigheid, eenvoud en 'n ware weergee van die Skepping wat Ek laat lewe is 'n werklike voorstelling van My Liefde. Die uitgangspunt van My Kinders is tog gegee om die Liefde die hoogste waarde in hulle bestaan te maak en daarom kan Ek net My seën op 'n kunsskepping plaas as My Liefde die waarde daarvan is. Amein.

Ek laat 'kuns' op hierdie aarde toe, soos wat die mense dit voorstel as huldigers van verskeie grade op die skaal na My teenpool, want daarin sal die goeie navolgers van My Liefde hulle motivering vind om My Liefde op meer maniere aan die mensdom te toon. Asof die aanskoue van My Liefde in elke dag se Lewe nie genoeg is nie, sal 'n afdruk daarvan die herinnering daaraan verhoog. Om 'n afbeelding te maak van wat bo in die hemel en onder op die aarde en in die waters onder die aarde is en daarvoor neer te buig en dit te dien, soos genoem in die gebooie deur Moshè aan die volk gegee, is ver van waardering van die Liefdeselement in My skepping. Neem byvoorbeeld die lug tydens 'n asemrowende sonsondergang. Sal iemand in 'n straat vol geboue dit kon aanskou en na waarde onthou? Nee, slegs die siel wat met 'n geopende oog van waardering My opsoek in die natuur se stiltes en skoonheid, sou hierdie oomblik op 'n kunstige wyse kon vasvang om met ander te deel. Ek is die Lewe in daardie oomblik en afbeelding. Amein.

Roep My aan in die diepste van julle wese om My met helder geestesoë te vind in alles om julle, want soos genoem is Ek selfs as Lig te vind in hande van die mense om julle. Enige oomblik se Lig wat vasgevang word om met ander te deel sal dien as 'n goeie kunswerk in My Oë. Amein.

Hoe sal kuns dan aan My kindertjies verduidelik word en moet almal dan geskool word daarin om kunstig te kan skep? Ja, soos hul Maker, is daar 'n vorm van kunstigheid in elke wese gegee. Kyk maar na die natuur en vind die kunstige vermoëns in menige dier, voëltjie en insek versteek. Op die regte tyd, dus onder die regte omstandighede sal die hemelse kunsvermoë homself voordoen en al die omstanders hulself saam verbly oor die vermoë wat die lewende organisme gevind het om kunstig te handel vir 'n bepaalde doel. Selfs plante het 'n kunstige vermoë in die oprank of wyse waarop hulle spasie vul op aarde. Elke 'spasie' is 'n genadegawe van My Liefde vir die plant om homself in My Liefde te baai. Amein.

Maak dus die uitkyk om My kinders van kunsvorme en kunsvermoëns te leer eerstens een van die waardering van ware kuns soos dit in My orde is en moenie tyd verspil op die teenstander se beoordeling van kuns nie, want daarin lê meer bande vir die siel opgesluit as Vryheid in My Liefde. Vind die kuns wat uit My Liefde gespruit het in julle omgewing, al is dit 'n stellasie of tuin-uitleg. Enige vorm van ordelike weergee van My Lig en Liefde wat die mens se wese tot waardering, en diensbare skepping aanspoor sal goed wees vir My kindertjies om na te kyk en die elemente van balans, hemelse kleurgebruik en ware diensbaarheid en ootmoed te ontleed. Bring dan dieselfde elemente na die onderrigruimtes van My kleintjies om sodoende aan hulle onervare hande en harte die kans te gee om daarmee te

werk in die doel om ook iets van Myself daarin vas te vang. Amein.

Om te kan gesels oor die oomblik van Lig wat waardeer word is 'n belangrike stap in die skeppingsproses. Dit maak die hart se vrae oop teenoor My, sodat Ek binnegeenooi word om te mag opklaar wat onduidelik mag wees. Dit open ook die siel vir geesteservarings deur My Liefde, aangesien daar hemelse begeertes gewek word waarin Ek mag beantwoord. Amein.

Wees 'n opvoeder uit My hemele deur hierdie aspek van opvoeding na waarde te ag en deurgaans daaraan aandag te gee op 'n manier wat My die Middelpunt van die gesprekke maak. Ek wil nie net as 'n Skepper van die kuns-onderwerp geken word nie, maar as die Bron van die kunsvermoë in elkeen wat daarna kyk en dit afbeeld. Laat My Lig vir die siel daarin dus bespreek word en die gesprekke lei om maniere te vind om dit aan ander te toon. Amein.

Kuns is 'n baie wye bestaanswêreld vir iemand wat werklik verstaan waar om dit te vind en hoe om daarna te kyk. Ek wil egter nie dat kinders van My Liefde hulself so in die kunsbesef verdiep dat hulle naastediens eenkant skuif nie. Deur naastediens sal die waarde van kuns selfs meer beteken in die wat die sleutel daarvan gevind het, maar sonder naastediens sal die siel maklik weer verval in die ydel beginsels van My teenpool en die waardering vir die verkeerde resultate begin aanwend. Kunsvorming is nie 'n edele bron van inkomste nie, maar indien dit tot diens van die naaste aangewend word as Skeppings wat die naaste benodig en gebruik, is dit in die korrekte orde. Wees daarom nie 'n alleenloper om die 'kuns' wat Ek geskape het te soek en te vind nie, maar deel van gemeenskappe en families waar 'kuns'-waardering gesprekke oor My en My Liefde kan

ontlok. Dit dien ewe veel as verheffing van die siel as die verhoging van My Wese in die self om met ander daaroor te kan gesels. Amein.

Om 'n nageslag van My te ontvang is een van die grootste gawes van kunswaardering wat aan 'n mens toevertrou kan word, daarom spoor Ek eerder die kinders van My Liefde aan om na hulle familie-lede en nageslag te kyk in die Lig van My Liefde om daarmee die volheid van My Liefdesgawes op die hoogste vlakke te vind. Die Lig van My Skepping om julle wat weergegee word in die blye kyke van familie-lede of in die sagte werke wat geliefdes teenoor mekaar doen, voed die siel in so 'n mate dat dit versterk na My kan keer vir vaste spys. Ek is die lewe wat nie 'n begin of 'n einde het nie in elke familie-lid om jou en bring so die beste van 'lewe' uit as daar in Liefde en eenheid saamgewoon en saamgewerk word. Amein.

Kuns is prakties aan 'n kind voorstelbaar deur eerstens skadubeelde van voorwerpe te maak, sodat die kind die vorm as deel van volume kan begryp. Die buitelyne moet noukeurig nagetrek en bestudeer word, rakende die doel van die lyn en die verhouding daarvan teenoor die res van die skepping. Elke nagebootste lynskets moet dan gevul word met waterverf om die bestaan daarvan lewend te maak vir die kind se begrip. Sodra daar verskeie voorwerpe met verskeie kleure op die blad bestaan, kan 'n verhaal vertel word oor die rede waarom hulle saam op die blad is en waarom die spesifieke voorwerpe saam gekies is. Dit sal verklaar wat hulle byeengebring het en wat hulle voornemens is om saam te doen. So sal 'n storie-prenteboek kan volg wat die kind self moet saamstel om 'n verhaal van sy eie te skep.

Wanneer die kind begryp dat elke item 'n naam het en 'n

koppeling aan tyd deur middel van 'n plasing in 'n verhaal, kan die lewe soos in die werklikheid afspeel aan hom voorgehou word en realistiese aksies en toevoegings bygevoeg word. Kleure kan bespreek word om die waarde van die kleur en sieledele toe te voeg en nuwe kleure kan tot die omgewing bygevoeg word om te verseker dat daar 'n persepsie van grond, lug en voor en agtergrond bestaan.

Sodra die kind al hierdie self in sy werke as kunsvorm begin gebruik, kan toenemende besonderhede van enkele voorwerpe bygevoeg word. Alvorens die kind egter nie die bogenoemde alles waarneem en weergee nie, moet daar nie voortgegaan word met meer kleure en fyner lyne nie. Sodra die kind dan gereed is vir die fyner lyne, kan sterk, dik lyne gebruik word om groot vorms af te rond, byvoorbeeld bome of klippe, diere en wolke. Daarna moet die lig in die gestaltes aandag geniet. Dus moet skadu-lyne dikker geteken word. Indien 'n kind dit van vroeg af leer ondersoek, sal kuns waarlik lewe kry in kinderopvoeding. 'n Kind se waarneming is nog nie belemmer deur allerlei invloede nie, daarom sal hierdie les maklik aan 'n kind oorgedra kan word. Sodoende leer die kind ook om die hand met meer en minder krag te gebruik en waarom dit 'n doel het. Sodra hierdie bemeester is, kan die kind geleer word om spasies met lyne te vul, dus 'in te kleur' soos wat julle dit noem. Hierdie 'inkleur' se doel is nie so omvattend soos al die vorige lesse nie en moet daarom nie soveel aandag geniet in die opvoedingstaak nie. Dit kan hoogstens een maal per week 'n tydgleuf vul, want die skeppende vermoë wat daarmee ontwikkel word, is skaal. Amein.

Teen hierdie tyd is die kind gereed vir eie verf-skeppings en kan waterverf as medium 'n groter doel dien deur skeppings in periodes op te breek waar aan verskeie lae van die

afbeelding aandag gegee word op verskeie tye. Laastens sal die voorste beelde ingeverf word. Hierdie sal ook die ondersoek van kleurgebruik bo-oor mekaar uitlig en daarmee kan lig verder ondersoek word deur verskeie kleure oor mekaar te laat skyn. Kyk ook hier na ligbreking wat toon dat lig bymekaargevoeg kan word om meer krag te dra as enkele kleure. Bespreek tydens elke element ook My waardes en leer. So sal die siel gevoed word tydens elke skeppende oomblik. Amein.

Hierna is die siel gereed om met teksture te begin speel, sowel as mediums wat sterker kleurwaardes gebruik om die teksture makliker te vorm. Ander verf-mediums kan bygevoeg word en met aanvanklike geleide ondersoeke, kan die kind later gelaat word om self te skep. Kuns sal op hierdie manier vinniger waarde dra en in diens van die samelewing gebruik kan word. Soek daarom geleenthede om die ware balans in grootte en vorm aan die kind te leer, alvorens kleure en mediums aandag geniet.

Kuns is 'n dienende vaardigheid bo alles, geskep om siele die skoonheid van My Volmaakte Liefde te laat waardeer en enige ander gevolg van kuns draai die siele na die teenpool in 'n hartseer vloed wat aanhangers werf. Al die siele raak sodoende weer verlore vir My onvoorwaardelike Liefde. Ek roep hiermee elke hart tot bekering van ydel waardering en passies. Soek My afbeeldings en My Liefde in die beelde waarmee julle julle harte en vestings versier en My Liefde sal na julle terugkeer in die OERGRONDPOOL VAN MY LIEFDE om julle by te staan met Wysheid, Barmhartigheid en 'n oorvloed gawes tot My eer. Amein.

HOOFSTUK 10

Wetenskap

Wanneer Ek genader word om enige verskynsel te verklaar, sal die siel daarmee gevoed word tot groei. Wanneer wetenskap egter gebruik word om 'n verskynsel te verklaar, sal die verstand aangespoor word om op sy eie nuwe oorsake en redes te soek. Ek is die begin en einde van alle lewe en instandhouding daarvan, daarom is dit nodig dat die eer aan My gegee word daarvoor. 'n Ondankbare mens sal nie die waarde van skeppings in die regte orde sien nie en dus nie die antwoorde op die regte plekke vind nie. Amein.

Wetenskap bestaan uit die ondersoek van hoe dinge werk en wie is die wysste om die antwoorde te kan gee? Wees daarom net 'n ondervraer van verskynsels maar met afhanklikheid van My om dit te verklaar en die antwoorde op alle probleme te bring. Die studie van wetenskap in die hoër onderrig vlakke behels vele benamings en sogenaamde wette om verskynsels mee te staaf. My Wil is dat hierdie in aanmerking geneem word met dieselfde agting as die woorde van enige vreemde taal. Dit dien slegs 'n doel tot kommunikasie. Daar is geen ander rede om daaraan agting te gee as hierdie nie. My verduidelikings sal dus ook nie altyd met die wetenskap-bewyse ooreenstem nie, maar die siel is die verskil tussen wêreldse wetenskap verklarings en ewige Waarheid. Amein.

Wetenskap het 'n plek in die daaglikse onderrig by 'n kind in die mate waarmee dit die kind aanspoor daartoe om vrae aan My te stel oor die doel van skeppings en die gevolg van die skeppings vir die verbonde siele. Wanneer die les oor geestelike groei die kind lei tot sielsgroei deur na die

omgewing te kyk, sal die waters in die kind se wese een word en vrede sy deel word in die bewustheid van doel en rede vir alles om hom. Dit sal lei tot 'n eenwording met My deur nederige liefde en vertrouwe dat daar ook 'n doel is met die eie bestaan. So wil Ek die kind rig tot hoër vermoëns as wat die aardse skyn-onderrig toelaat. Wees 'n opvoeder wat waarlik siele skool vir ewige diens in die plek van opvoeders wat die taak van opvoeding as 'n aardse tydverdryf en wyse tot broodwinning beskou. Die siele wat in jou sorg is, is ewighede meer werd as die broodwinning wat daaruit voortvloei. Amein.

My kindertjies moet van die kleinste eenhede af leer om die sieleleer in alles te bevraagteken en as 'n skynbare legkaart aanmekaar te sit, sodat die groter eenheid tussen lewende en nie-lewende dinge op aarde 'n diensbare beeld in hulle harte vorm. Begin daarom in die kleinste met ondersoek na My en Lewe. Begin by 'n grondkorreltjie en vergelyk dit met die son. Kyk na lig, grootte, afstand, hitte, voedende vermoë en behoeftes. Vra hoeveel daarvan nodig is vir lewe. Gaan verder na die water wat daarvoor vloei en dit saambind. Bestudeer waar die water vandaan kan kom, wat die water se temperatuur en krag is, wat die voedende vermoë van die water kan wees vir die grond en wat die water alles saamneem op sy reis. Verder moet soortgelyke en meer vroeë gevra word rondom die kleinste saadkorrels, groter sade en die plante wat daaruit spruit. Elke waarde in My Liefde moet daarby gelys word, sodat My kindertjies die sekerheid beleef van My Sorg en bestaan sonder einde. Amein.

Die klippe om julle met elke aspek daarvan, soos reeds deur julle wêreld bestudeer en uitgelig dra nie net tekens van bestaan nie maar van diensbaarheid as 'n verharde element.

Lae rots, minerale en edelstene dui op toestande van willose, onbewerkte bodems. In hierdie tye het die vasgevangde dele geen ander diensbare lot gehad as geduldige wagtye en samebinding tot iets groter en skoner van aard nie. Hierdie saamgebinde eenhede is nou daar tot verhoging van My Aard en Wese in klein aspekte en sal net deur harde omwentelinge in die aarde die kans kry om weer te versag. Amein.

Hoe regverdig is die een se kans op groei en die ander op 'n skynbare ewige vasvang in 'n samestelling? Elke nuwe samestelling wat met die vorige gemaak word, is goed vir die verdere diensbare bestaan van die stof. Enige diens wat My Wese verhoog, behaag My en is 'n beeld van My Lig vir julle. Waardeer dit dus, al is dit om die balans van die aardbodem op verskeie plekke te handhaaf. Elke diensbare eenheid sal sy loon en eenwording met My verkry na gelang van die gewillige uitvoering van My Wil. Amein.

Eenhede wat nie meer 'n wil het nie, het dit ontvang omdat hulle nie onder beter geleenthede sou dien nie. Ek bepaal die lot van elkeen om die beste vordering van sy siel te verseker en wil daarom dat julle, Kinders van My Liefde wat hier lees, EEN word met My wat elkeen 'n regverdige plek in die skepping toeken vir die wyle wat dit daar diensbaar moet wees. Leef voluit met die doel om My in alles te vind en te verhoog en Ek gee aan julle die ewige geleentheid om saam met My te heers. Amein.

Wanneer My Kleintjies dan na die kleinste en grootste eenhede en die willose eenhede gekyk het, kan die lewende eenhede met hulle eienskappe, behoeftes en nut bygevoeg word, sowel as die mens as die kroon daarvan. Genoeg het Ek reeds gesê oor die mens om hierdie leerstof te vul. As uitvloeisel uit die mens se vermoëns spruit nou die werke

van die mens, hetsy goed en sleg en die gevolge daarvan op die skepping. Mengsels van stowwe en die nut daarvan, diensbare produkte en werkende eenhede om arbeid mee te verlig kan ondersoek word. Beskou elkeen in die mate waarin dit die mens tot nut is in My diens en hoe om dit te verbeter dat minder beskadiging van die omgewing en meer verering aan My daarmee sal geskied. Amein.

Ek wil dat die mens die gebruik van die omgewing se kragte inspan om grootser werke te verrig tot voordeel van gemeenskappe en families. Dit moet egter nooit tot verryking van 'n enkele persoon geskied nie, maar in liefde vir mekaar en vir My as diens tot ander. Wanneer Ek aangeroep word om Hulp en Leiding te bied, sal daar altyd 'n toestroming van kragtige idees en vereenvoudigde probleme in die gedagtes ontspring wat spruit uit My Leiding en Wysheid. Hierdie is die antwoorde wat die probleem sal opklaar en die omstandighede heilig en daarom moet dit met gehoorsame vertroue uitgevoer word. Hoe kweek 'n mens dit dan as 'n gewoonte aan by 'n kind? Amein.

Eerstens moet daar tydens die ondersoeke van alles wat bestaan en alle resultate van toetse aan My die eer gebring word vir die grootsheid van die skepping en die onverwagte, bruikbare resultate. Hierdie is die begin daarvan om My deel te maak van 'n skeppingsdaad. Wanneer die hart dan so ontvanklik geraak het om My te verwelkom in volgende werk, kan die gebed die skepping vooraf-gaan om te vra vir wysheid en leiding in hoe om die probleem op te los. Wanneer Ek dan die oplossing gebring het, moet ook gevra word hoe dit op groot skaal aan 'n gemeenskap as hulp gebied kan word en wat die benodigde hulpbronne sal wees, aangesien die werking en gevolge op klein skaal nou reeds bekend is. Amein.

Moet nooit 'n wetenskaplike ekspedisie of ondersoek loots sonder om My die middelpunt daarvan te maak nie, want aangesien die verstand meer betrokke is as die hart hierby, sal die hart maklik ydel en hoogmoedig raak in die aksies en geen afhanklikheid van My meer wil toelaat nie. Ek is nie verheug oor die gebruik van wetenskap by verskeie skole om siele mee onafhanklik en 'slim' te maak op die wyse waarop hulle dit aanbied nie. Eerstens keur Ek nie die inmenging met My lewende skeppings se prosesse toe nie en tweedens is daar geen respek vir die krag wat deur My na die aarde vloei deur al die skeppings nie. Wanneer hierdie twee regstellings in aanbiedings gedoen word is die ondersoek van wetenskaplike beginsels en oplossings wat daaruit spruit wel deur My geseën. Amein.

My Liefde oordek die hele aarde en alhoewel die bande wat die siele bind om hier te bestaan en om te oorkom om met My Liefde te verenig, is My Liefde aan elke lewende gegee as 'n sleutel en krag binne die self. Solank die Liefde gekies word, is die siel goed besig om die self te oorwin en My te vind. Amein.

My klein kindertjies het nodig dat wetenskap lewend vir hulle aangebied word, sodat hulle die lewende Krag wat van My voortvloei daaruit kan vind. Laat hulle dus toe om die begin en einde van lewe vir elke lewende onderwerp te ondersoek. Laat hulle toe om vrae te stel oor die begin en die einde en die antwoorde na My te rig, aangesien alles wat bestaan na My moet terugkeer. Amein.

Die volgende ondersoek moet die hartklop in elke lewende wese wees. Wat hou die wesens aan die lewe en waar is die krag te vind in die lewende wese. Laat hulle My om die antwoord vra en luister saam na die antwoorde. Amein.

Wanneer die begin en einde en die voortbestaanskrag se

antwoorde beantwoord is, lê daar nog 'n vraag voor die ondersoeker: Wat word gedoen met die krag of hoe word dit aangewend? Is dit net ter behoud van die self of 'n gemeenskap. Sien die bruikbaarheid en dus vlak van die siele-ontwikkeling in hierdie lig. Hoe meer diens die lewende organisme doen, hoe meer liefde is daar te vind in die siel van die organisme. Het die organisme dan enige hulp nodig in die uitvoer van die take? Nee, is die antwoord, want die organisme dien in gehoorsaamheid. Waarom vra die mens dan om hulp in die uitvoer van take? Leer die kind om take te onderskei tussen klein en groot en self te glo dat Ek die krag is om met die taak te help, soos wat organismes sonder hulp hulle take moet uitvoer. Slegs groot take waarby die krag van 'n enkele mens te min is, het weer liefde as doel in die versoeke van hulp van een persoon aan 'n ander. Voldoen dan aan die versoek, aangesien dit die liefde en krag van meer as een persoon vra om tot uitvoer te bring. Amein.

Wanneer 'n span arbeiders nodig is om 'n taak te verrig, is gebed van nog meer belang tydens die arbeid as vir 'n enkele persoon, aangesien die liefde onder mekaar die resultaat van die arbeid tot My eer rig al dan nie. Indien Ek geken word in die saak sal vele meer siele baat by die arbeid as daarsonder. Ondersoek dus werkswyses waar Ek die middelpunt is en hoe dit gebruik kan word in diens van 'n gemeenskap. Amein.

Dit is in hierdie geval waar siele baat by noodlottige gebeure, aangesien daar dan sonder vrae eers na My geroep word om die gemeenskap by te staan. Vir die daaropvolgende tyd is siele weer nederig en wen My Ryk baie meer toewyding as in welgestelde gemeenskappe waar geen ingryping geskied nie. Wees dus nederig as 'n gemeenskap,

sodat Ek nie nodig het om noodlottige gebeure toe te laat, sodat siele as 'n eenheid weer nederig na My opsien nie. Amein.

Ek wil graag die begin en einde van hierdie les wees vir al My Kleintjies, daarom is dit nodig dat hulle reeds van vroeg af die werking van dinge en mense ondervra en beleef om sin te maak uit die liefde en nederigheid daarin. 'n Opvoeder wat geskool is in My Liefde sal met gemak hierdie kan oordra aan My Kleintjies. Hou voor oë dat Liefde en Nederigheid die hemelse waardes is wat in 'n saak My die Lewende Krag maak. Enige ander benadering maak My Teenpool in daardie mate die krag en hoeveel meer kan Ek dan doen om die siele vir My te wen, as om hulle harte deur baie seer weer te bekeer na My. Amein.

Hierdie hoofstuk is veel dieper as enige vorige en het 'n mate van geestelike rypheid nodig om te onderrig. Vra dus as opvoeder aan My om jou voor te berei op die taak om bespreking van nederigheid en Liefde as kraggewende beginsels in die skep van vloeiende beginsels en in die ondersoek van lewende dinge. Amein.

HOOFSTUK 11

Patrone

In hierdie wêreld dien patrone ten doel om die siele te kluister aan 'n spesifieke omgewing of diens. Ritmiese patrone, gekleurde patrone en herhalende werke, is alles maniere om siele te bind aan 'n willose situasie. Wanneer Ek die middelpunt van die siel se bestaan is, sal die patroon of roetine gekoppel word aan Liefde en behoefte in die plek van 'n lewensnoodsaaklike, herhalende volgorde van handelinge. Ek is die lewe en daarom is die krag vir herhaling en volgorde in My Hande en nie in die verstand van enige mens wat die werking van iets koppel aan die volgorde van gebeure nie. Amein.

Ondersoek die natuur en vind daarin die roetine wat deur vryheid van Liefde in plek gestel is. Sien dat die patrone geleë word deur wat die Liefde vra en daagliks aangepas word om te voldoen in wat die behoeftiges toon as wat dit rigied volgens wekkers, horlosies en klokke uitroep. Hierdie harde slae om die siele te rig tot 'n spesifieke werkswyse is nie geskoei op ware liefde nie, maar op harde orde. Keur Ek dit goed as orde-reëling in groot gemeenskappe? Ja, wel vir die doel dat almal herinner word aan wat die Liefde onder hulle vra, maar nie as tugmiddel om te voldoen aan 'n sekere daad op 'n sekere tyd nie. Wees daarom nie 'n opvoeder wat met harde slae My klein kindertjies roep om verantwoording van hulle tyd en gedagtes nie. Help hulle eerder om My te vind in die tye van die dag wanneer hulle harte daarna verlang. Amein.

Patrone het verder 'n doel op hierdie aarde as skeppende krag. Deur vorms en herhaling daarvan te gebruik word

items bruikbaar gemaak. Ek wil dat hierdie vorms deur My Liefde gedryf en gelei word. Moenie iets skep sonder om na My te keer vir die insig in die korrekte vorm en herhalende element daarin nie. Die beelde uit My sal die korrektes wees om die werking van die item in Liefde tot nut te maak. Amein.

Verder is daar verwysings na manlike en vroulike patrone op hierdie aarde. Dit is korrek vir die praktiese gebruik daarvan. Om iets te koppel aan 'n geslag dui 'n gebruik daarvoor aan en daarmee wil Ek hê dat die geslag dit moet heilig tot My. Patrone as eenhede van identiteit het geen waarde as Ek dit nie seën nie. Ek vra daarom van ontwerpers van patrone en gebruikers van patrone om My seën oor die skeppings te bid, sodat die geestelike bestaan van die persoon daardeur nut beleef, eerder as wat die vlees verleiding daarmee bewerk. Amein.

Om patrone te gebruik om kinders van My Liefde te verlei tot verkeerde handeling en gedagtes wat hulle nader aan My teenpool bring, lê die grootste las op die skouers van daardie ontwerper. Daardie las sal met jare van versoening eers gebreek kan word en die siel weer vry wees om My in nederige liefde te dien. Indien 'n siel leer om homself te verdedig vir die verleiding wat hy bewerk het, sal die las nie gebreek word, alvorens vele pyniging geskied nie. Amein.

Ek wil dus hê dat wanneer My kindertjies se opvoeders aan patrone dink, My Skeppingswondere en Liefde die grootste aandag moet geniet by die ontwerp van patrone, vorms en idees. Amein.

HOOFSTUK 12

Edelstene

Hoe die siel na 'n edelsteen kyk, beïnvloed die gebruik en nut wat die siel daarin vind. Indien die siel se geestesoë op My gerig is, sal daar met 'nuwe' oë na die steen gekyk word. Die waarde in die stene is soos reeds genoem, omvorming deur jare se diensbare toestand tot iets kosbaars vir almal om te bewonder en te waardeer en steeds hou die diensbaarheid in daardie toestand nie op nie. Dit is as te ware 'n bekroning op die harde siel se jarelange toewyding aan My Wil daarvoor, ook om My te verhoog in die voortbestaan in daardie toestand. Wanneer so 'n mineraal dan uit die oorspronklike plek verwyder word, moet My seën eers daarvoor afgebid word, aangesien die mens wat dit neem, inmeng met die wil wat Ek vir daardie sieledele beskik het. Dit is nie 'n oortreding nie, maar 'n inmenging in die orde wat Ek vir daardie siele wou hê. So is dit vir elke mineraal op hierdie aarde. Dit het 'n natuurlike doel in die diens van My en die aarde se behoeftes op die aangewese plek, maar indien die mens 'n ander doel daarvoor bedink en dit verwyder, verplaas of hergebruik, kan dit net tot seën van die mensdom en aarde wees, indien Ek in die saak geken is en My seën daarop gevra is.

Leer My klein kindertjies dus om met respek na al die natuurbronne te kyk, dat dit wel bestaan, omdat Ek dit wil. Indien My wil daarvoor verander, sal die verskynsel ook van voorkoms verander. Indien daar dus versoeke van die mens se kant na My gerig word oor die gebruik van bronne en seldsame minerale, sal Ek die insig gee in hoe om dit te verwyder en hoe om dit te gebruik, sodat die siele steeds eervol tot My kan keer. Amein.

Die respek en Liefde waarmee omgegaan word met edelstene, is van uiterste belang in die siele wat daarin vasgevang is, se pad in die ewigheid. Indien die edelsteen verering en bewondering geniet van almal wat dit beskou, is daar 'n groot te nakoming van die orde waarin dit op die aarde geplaas is. Dit is nie daar om My plek in harte in te neem nie en vertroebel die vasgevang siele se uitstraling na My. Hulle orde word versteur en het baie tyd nodig om weer tot nederigheid te herstel. Ek wil dat daar na My gebid word om My seën oor die steen se bestaan te plaas en dan met bewondering na My werke te verwys in die plek van die kosbaarheid van die steen self. Amein.

Namakings van stene en hulle doel vir gebruik is meestal tot ydelheid gerig en daarom keur Ek dit geensins goed nie. Diensbare doele van enige steen of item is die allerbelangrikste hulpmiddel om alles op die aarde na My Liefde te keer. Indien Ek nie die middelpunt van alle bestaan is nie, kan My heiligheid nie daaroor uitgeroep word nie. Kyk dus na die materie met oë wat wil heilig en bid dit toe op alle hulpmiddels in jou vesting of omgewing, sodat Ek die werking en vloei van My Krag daar kan seën. Amein.

Om mense en vestings te salf het dus hierdie doel, naamlik dat alle elemente in die bestaan van die mens of vesting geheilig sal wees aan My diens en daarom 'n geestelike verhogingskrag het in die take wat daaraan toegeskryf word. Ek wil dat alles opwaarts groei of neig na My en wil My seën daarvoor gee, maar kan slegs indien Ek daarom gevra word. Amein.

My Kindertjies se opvoeders moet hierdie in gedagte hou wanneer daar lesse gegee word oor die gebruik van alle hulpbronne en vestings op hierdie aarde. Indien My seën afgebid is oor die gebruik van die materie tot nut en diens

van siele, sal daar geestelike groei en vryheid uit die gebruik daarvan spruit. Indien daar ydel versamel is aan alles wat pronk in en rondom die vesting of in die tentoonstelling van die elemente, sal dit kluistering, bande en verhoging van My teenpool se krag tot gevolg hê. Amein.

Edelstene het elkeen 'n bepaalde doel en funksie en kan gevind word in My Liefde. Elke kleur verwys na 'n waarde en word so in lyn gebring met aspekte van Myself tot verhoging van die siele wat dit gebruik. Kyk daarom met oë wat die geestelike daarin opsoek en wil benut, eerder as met oë wat vererend en ydel verlang na prag en praal. Amein.

Ek sal die gebruik van die edelstene seën as die nederige versoek van die hart is om My daarmee te verhoog. Amein.

Die mens se waarde lê egter in al die onsienbare en nie in die gebruik van verfraaiing van die liggaam deur middel van enige asemrowende omvouing en optowering nie. Ek kan dus net vryheid van diens en Liefde gee as die persoon My die plek in die hart gee, wat dit sal verseker. Amein.

Word nie ydele navolgers van gebruike en aardse simbole nie, maar soek My in die uitkies van enige items tot nut en diens van die mens. Amein.

HOOFSTUK 13

Lug in die Atmosfeer

Hiermee lei Ek 'n besondere insiggewende hoofstuk in vir die wat My liefhet en My werklik wil vind in alles om hulle. Ek wil meer Lig werp op die lug om julle, waaruit julle lewe spruit in die vorm van suurstof en lewenskragte wat julle heilig voor My. Die oormaat suurstof in lug, ten opsigte van water, is nie die enigste rede waarom lewendes net in lug kan lewe nie. Ek het vele ander lewensmiddele in lug geplaas wat die mens en lewende diere benodig om gesond en vol krag te bly. Amein.

Kyk maar eenmaal na 'n insek wat in 'n huis vasgekeer raak en vele vrae en antwoorde begin opduik. Die insek verloor sy krag binne enkele ure en verlaat so ook die lewe. Julle as mense beleef dieselfde oor 'n langer tyd, aangesien daar groter hoeveelhede vlees is wat lewenskrag kon stoor as by 'n insek. Hierdie is ook die rede waarom ouer mense meestal vinnig verswak en die lewe verlaat. Hulle word nie genoeg blootgestel aan die lewegewende lug buite huise nie. Bring nou 'n lewende voor My en Ek wil bespreek wat Ek tot lewe gegee het as beginsel vir onderhoud van 'n lewende liggaam. Amein.

Die lewe wat Ek in 'n siel blaas, bestaan waarlik uit die samestelling van My Gees in die omtrek. Indien naby gekyk word na enige gesonde lugdeeltjie, sal vele lewende organismes daarin gevind word, sowel as eteriese krag-elemente, wat te klein is vir die oog om te sien. Dit is hierdie krag-elemente wat deeltjies is van My Gees wat aan alles lewe gee en so ook die heengegane geeste dra tot by hulle nuwe bestemming of liggaam van rus. Hierdie dele is wat

alomteenwoordigheid inhou en waarin die geestelike oë hulle beelde beskou, soos wat die aardse oë water benodig. Dit is nie die son se strale wat die oë soms opmerk rondom hom nie, maar die ware 'lewe'. Hierdie lewe is die lewe wat Ek ook in liggame blaas om onophoudelike werk te verrig, 'n vervoermiddel van gees te wees en kragtige versterking te bied aan siele wat die gebruik van die liggaam heilig. Dit is ook om hierdie rede wat genoeg blootstelling aan die buitelug die liggaam baat in versterking en suiwering. Word daarom wakker as slapende uit 'n rustende, trae toestand en gebruik beweging in die buitelug om meer van My in jou op te neem en so meer krag in jou siel te genereer. Amein.

Hoe werk hierdie dele, vra julle as My kinders en knegte? Elke stukkie van My wat so lewend om julle beweeg, dra Krag as eenheid in die kleine, maar bly tog deel van die Grootheid van My. Dit beweeg onkeerbaar in elke ruimte in, maar die versterking van die sonlig, maak dat die deeltjies met meer Krag voortbeweeg en reinig en voed, waar dit ook al met vlees in aanraking kom. Amein.

Gebruik hierdie kennis om julle liggame en siele gesond te hou en word werkzaam in die ooptes van die buitelug. Deur julle energie so te verbruik, vermeerder dit tienvoudig, daarom is edele werk enige werk waar My krag die mens binnestroom in diens van Sy naaste. In die ruimtes buite vestings is naastediens baie makliker te onderskei van diens vir eie belange. Binne vestings moet daar altyd oorweeg word of die gevolg van die diens die siel traer sal maak, al dan nie. Vind My daarom in die natuur in meer as klank en kleur en lewe. Vind My in die kosbare, lewegewende lug wat die liggaam omvou en krag gee. Amein.

Ek wil graag hê dat julle hierdie 'n daaglikse belewenis vir My klein kindertjies moet maak in die diens wat hulle by

julle moet leer verrig. Dit sal geseënd wees as versterkende dade van Vrede, wanneer die siele aangemoedig word om in My ooptes te werk. Amein.

Maak daarom die natuur deel van My kindertjies se leervertrek. Gesels en getuig van My en geniet die lug as 'tasbare' teenwoordigheid van My Gees om julle. Vind dit in julle, soos 'n ballon wat vol lug is, met die verskil, dat die lug sirkuleer en nie vasgekeer is binne die mens nie. Is suurstof waarlik so 'n groot element van lewe soos wat die wetenskap dit meedeel? Ja, maar besef dat die Eenheid van die suurstof tesame met die liggaam lewe gee en nie suurstof alleen nie, dus is die opnamehouer nodig om die Lewe in hom te dra en kan die Lewe nie homself vertoon sonder 'n houer nie. Hoe kan die lewe dan geneem word van 'n persoon? Deur die keer van vernuwende krag wat deur die lug die opnamehouer binnestroom, raak die opnamehouer swak, soos in 'n toestand van rus, en daarom sal die lewende siel daarbinne deurbreek na waar dit weer kan lewe en beweeg. Net so is 'n saadjie in 'n toestand van rus en sodra My Liefde dit binnestroom in die vorm van Water en Lug, gebruik dit die lewende krag om nuwe lewe te vorm. Amein.

Ek wil hierdie insig toevoeg tot die leersituasie, sodat die hemelse beginsels vir gesonde siele My kindertjies sal baat in die ontwikkeling van hulle siele tot volwasse siele voor My. Met hierdie leerstof wil Ek alle houvas van My teenstander op My kindertjies se siele breek en insig vergroot, dat Wysheid soos saadjies uit goeie grond sal ontkiem. Wanneer die begrip terugkeer na My kinders, in watter mate Ek lewend onder julle vertoef en hoe betrokke Ek is, sal daar soos in Adam se dae weer eerbied van julle kant en seën van My kant in die vryheid van Ons Eenheid

geskied. Ameen.

My klein kindertjies moet die lewe van LUG voel binne hulle en daarom beweging en oefening geniet. Hulle moet die waarde van LIG insien deur die invloed daarvan op lewende dinge te ondersoek en LUG as kraggewende bron gebruik in hulle daaglikse opvoeding. Ameen.

Wees getrou in julle diens aan My en My kindertjies en Ek sal julle met ewige seën beloon. Ameen.

HOOFSTUK 14

Water op die aarde

Waters is reeds bespreek as geestelike sagmaakmiddel op hierdie aarde. Verder het water 'n doel as lewensmedium, waaroor nog nie veel gesê is nie en ook 'n doel tot omvorming van een aard na die volgende. Die lewensmedium waarin lewende dinge hulself bevind is nie net gevul met My Krag soos die Lug nie, maar met My Gees van Barmhartigheid, Miriam. In die water het die volume-krag verhouding nie meer soveel nut en sin soos in die lug nie. Om hierdie rede is beweging makliker en spoed nie verbind aan die wil op dieselfde manier as op die aarde nie. Ek het al hierdie in My orde en wil neergeplaas, ook dat daar op die aarde meer water-area's as land-area's is, om te toon dat die Gees in 'n baie groter mate beskikbaar is, as hulpbron binne die mens as die Wil van die mens tot homself en sy eie kragte. Amein.

Om hierdie beter te belig, vra Ek elkeen wat hier lees om vertrouwe en geloof te beoefen, soos wat hulle wilsbesluite beoefen in hulle lewens. Die vreugde sal spoedig daaruit voortvloei dat My sorg onbepland en onvoorwaardelik op hulle neerreën, soos wat water as versagter van bewegingskrag, waterliggame help beweeg en massa verlig. Net soos wat dit in die vleeslike uitgelig word deur water se invloed op materie en in die geestelike deur die vleeslike sorg wat Ek laat voortvloei uit die vertrouwe en geloof wat Ek vra, dra dit nog 'n veel dieper waarde en dit is die eenword van die siel met die water om dit as versorger en verligter van laste te waardeer. Indien elkeen kan insien dat om in water (Gees) ander van hulp te wees, hulle onderdompel in die watermassa van Barmhartigheid, sal die eenheid wat Ek

verlang van My Kinders en die geestelike sorg, voeding en groei wat Ek wil bied aan My Kinders sonder grense vergroot. Dit is My Wil en wat Ek van elkeen vra in die OERGRONDPOOL VAN MY LIEFDE, die Water om julle. Ameen.

Hierdie Water moet op maniere aan kinders voorgestel kan word. Die beste en maklikste om hierdie les te toon is deur die eie beweging in 'n watermassa, maar indien dit nie moontlik is nie, sal die gebruik van 'n diep houer toon hoe stadig iets val in water as dit vergelyk word met die spoed waarmee iets val op hierdie aarde. Verduidelik dan dat die val wel die neerdaal tot 'n laer sielsvlak beteken en dat die gees die draer is van die siel om dit as te ware stadiger te laat neerdaal en te dra op die vorige vlakke. Dit kan egter nie die val keer nie, net vertraag. Die val is gekoppel aan die krag waarmee die siel gekoppel het aan verharde materie. Indien die hardheid weer wyk, sal die siel weer deur die water na bo gebring kan word. Ameen.

In hierdie les moet al die geestelike aspekte met die kind bespreek word in verharding wat verkeerde gedagtes en handelinge (dus teen die Liefde van My en die naaste) behels. Ook wat neerdaal en opstyg beteken en laastens dat die Gees die helpende middel is tot redding (sigbaarmaking) van die siel. Soos wat die kind dan begryp dat siele wat neerdaal na die bodem van die waters toe onsigbaar raak in die gees en laer daal as waar hulle begin het, moet dit uitgelig word, dat dit ook lank voor hulle aardse lewens gebeur het en dat daar nou baie meer diepte is om uit gelig te word as vir die item wat gedaal het in die houer. Die enigste manier is om die water (My Gees) toe te laat om die siel sag te maak, sodat die water (My Gees) dit kan toelaat om weer na die oppervlak terug te keer en Krag uit die Lug

(Myself) te put. Amein.

Ek wil dat hierdie 'n duidelike beeld in elkeen van julle se harte word oor die Barmhartige hulpmiddel (Miriam-Gees) wat Ek vir julle agtergelaat het. Wees dankbaar en word een met haar in julle handel en wandel, sodat die krag van die water en waarheen dit julle wil voer vir julle duidelik word. Ek bied die volmaakte omgewing om julle te voed en diensbaar te maak as julle wil dit toelaat. Amein.

HOOFSTUK 15

Grond en Vuur

Deur na die water te kyk as versagtende medium tot beweging, bring dit die siel tot by vergelykende gedagtes, naamlik harde teenpole, waarvan grond en vuur dan die teenoorgestelde uitmaak. Grond as die harde, ongenadige medium vir beweging en Vuur as die harde, ongenadige verwoester van Lewe. Amein.

Hoe het hierdie verskynsels enige plek in My Geestelike Leer? Die hardheid van die wil is gekoppel aan beweging en arbeid op die land. Indien die water nie die regmatige plek in die siel inneem en alle afhanklikheid van die water (Miriam-Gees) besef word nie, sal die siel 'gekluister' wees aan die aarde en die barmhartigheid wat daar beskikbaar is met seisoene en weerskynsels soos wat Ek dit toelaat. Hier sal die voeding deur harde arbeid en afhanklikheid bewerk moet word. So kan na die lot wat Adam te beurt geval het, verwys word, waar hy in die sweet van sy aanskyn sy brood moes verdien. Dit beteken soveel as dat die liggaam alle krag moet inspan om alles om hom diensbaar te maak en te soek na die diensbare soort plante om hom en sy gesin te voed. Indien die Barmhartige Gees gevra en vertrou was as voeding, sou daar veel meer na die gesin gekom het as voedende bronne om nie net die liggaam nie, maar ook die siel te voed. Amein.

Hierdie harde aarde put meer bronne van die siel uit as wat dit kan voed. Slegs water in klein hoeveelhede, soos op die aardbodem gevind, sal dan die siel kan voed tot groei. Helaas, hou dit net voeding in vir die vlees en slegs My Gees kan die siel laat groei. Amein.

Ek is alomteenwoordig in hierdie aardse toestand ook as sonkrag en in die lug, ja. Daarom is die mens nie alleen nie, maar nog steeds blind vir die bestaan daarvan en daarom nie deurentyd op vir die gebruik daarvan nie. Amein.

Ek wil dat die mens beelde in gedagte hou by die vergelyking en herinnering van die geestelike elemente en groei, aangesien dit in alle bestaan die waarde-koppeling in My uitbeeld. Amein.

Hier is waar die vuur 'n belangrike les word. In die vuur word alles vernietig tot geen beeld of sigbare materiële elemente meer oor is nie. Slegs wat Ek geskep het as ewig-lewend sal oorbly. Om hierdie rede word na vuur as suiweringselement verwys. Geen aardse bande, eie wil buite My en ydele voorkoms kan stand hou teen die suiweringskrag van vuur nie. Vuur is nie deel van My Wese nie, dit is 'n skepping buite My, wat teen die orde en eenheid van My handel, maar aangesien die mens dan kies om buite My te lewe met een van hierdie eienskappe, bevind die siel homself dan in die vuur (My teenpool) en sal suiwing daardeur toegelaat word tot alle elemente wat by die teenpool hoort daarin vernietig is en net die ewig-lewende elemente weer na My kan terugkeer. Ek wil nie vir 'n siel hierdie weg toeskryf nie, maar die siel bring dit oor haarself as sy nie afhanklikheid en dankbaarheid vir My Waters en Wil toon nie. My Water kan wel die vuur blus indien die siel om My Liefde en Barmhartigheid roep in die suiweringsproses. Dan sal die siel haarself in 'n ander leersituasie bevind as in die verterende suiweringskrag van die vuur. Bekeer daarom van enige handelinge wat die siel sal open vir die eenwording met vuur as suiweringselement, want Ek kan net help waar My hulp verlang word. Amein.

Hierdie lesse moet ook aan 'n kind uitgebeeld kan word en

wel op die volgende maniere:

Eerstens moet die volume ten opsigte van massa en die krag wat daarvoor ingespan moet word vir beweging en arbeid op hierdie aarde aandag geniet om aan te dui wat 'n siel wat op sy eie vermoëns ingestel is, moet aanwend om enige werking tot stand te bring.

Tweedens moet die omgewingsfaktore van seisoene en weerskynsels se rol in die voorsiening van voedsel aan lewendes na hierdie geestelike les verwys.

Verder moet die vernietigende krag en gevaar van vuur vir alle materie ondersoek word en verwys word na die siel daarin wat nie vernietig kan word nie. Hier moet baie omslagtig verduidelik word dat vuur nie 'n geredelike gebruikte middel is om enige werk te verrig anders as diensbare hitte-bereiding en vernietiging van middele wat nie gevraagd of nuttig is nie. Voorbrande val daarom in hierdie kategorie. In die bereiding van voedsel is vuur dus 'n middel om iets verteerbaar te maak, wat andersins 'n doel, maar 'n onbruikbare hardheid besit het. Alles is deel van die geestelike bereiding van die siel om 'n hoër en diensbare doel te kan dien. Amein.

Indien al hierdie inligting in die leermateriaal van die kind verweef word, sal dit deel raak van die erfenis van nageslagte en so sal almal weer die waarde aan die siel koppel wat Ek daarvoor bestem het op hierdie aarde. Ek wil dat almal met geestelike wakker harte na mekaar kyk en hulp verleen, sodat My aardes vol saad bemes en natgelei kan word en die oes ryklik geseën kan word. Amein.

Die opvoeding van die kind is die kernpunt vir al hierdie resultate en daarom vra Ek van My Kinders op hierdie aarde om met erns na hulle nageslag se geestelike lering en

alledaagse tydverdryf te kyk. Indien almal My gehoorsaam om spoedig 'n geslag met geestelike helder bestaan in die Lewe te roep, sal die aarde se lot aansienlik verbeter. Amein.

Ek wil hierdie kennis seën in julle harte en verstande en julle so teruglei na Kanaän, waar julle vandaan kom. Alles lê egter in die wil van die mens om dit aan te neem of eenkant te laat. Roep My Miriam-Gees aan om lewend tussen julle te arbeï, want die tyd daarvoor is hier. Amein.

HOOFSTUK 16

Armoede

Die grootste vorm van armoede is die armoede wat in die harte van My Geliefde Kinders heers, waarvan hulle meestal nie eers bewus is nie. Daardie behoeftes is uiteenlopend en tog onvervuld, daarom soek die siel na die vervulling op alle weë en plekke, behalwe by My. Ek wil die armoede wegvee en welige sorg tot julle beskikking stel, maar helaas is dit gegrond op die toe deur van die hart wat die Lig nie wil ontvang nie. Indien die deur wel oopgemaak word, is My Lig daar en kan dit voedend vir die siel dien. Amein.

Ek wil dat julle aan My Kindertjies die verskeie gevolge van armoede voorhou as uitvloeisels van geestelike tekortkominge in mense. In die geval van heerssug, sal daar armoede heers, omdat hoogmoed van hart oorspoel van die heerssugtige heerser na elke onderdaan onder hom. Elkeen sal dan neem wat hy begeer en so die heerssug lewend maak soos 'n verdrukkende organisme wat alles wil verslind. Die enigste manier om hierdie soort armoede te breek, is diepe gebedsondersteuning van die nederigste af, tot dit My Wil is om die heerssug te breek. Amein.

Die volgende vorm van armoede is as gevolg van nalatigheid van die kant van die heerser af. Indien die heerser nie die insig toepas wat nodig is om die onderdane te versorg en vooruit te beplan nie, sal die heerser die enigste wees wat nie onder die lot van die armoede benadeel word nie. Hierdie lot kan slegs gebreek word deur vir ander om te gee en hulle by te staan in hulle behoeftes, al is dit ten koste van die self. Ek sal op wonderbare maniere so aan versorgers voorsien om ander te help. Amein.

Die volgende rede vir armoede is die soeke na die verkeerde plesier. Hierdie armoede sal die hele volk, insluitend die heerser oorspoel, aangesien dit spruit uit 'n skaamtelose armoede van liefde. Indien die liefde vir al die verkeerde dinge die oorhand oor 'n volk geneem het, is die lot van die volk so erg soos dié van Sodom en Gomorra en kan Ek dit net wegvee om plek te maak vir 'n nuwe volk wat My sal liefhê. Wat anders behels My Liefde as eerbare waardes en naasteliefde. Alle liefdes wat daarteen is, is tot nadeel van die gemeenskap en die eie siel. Amein.

Armoede is ook te vinde in siele wat seergekry het. Hierdie armoede is deur gebedsgenesing en baie liefde oorkombaar. Indien 'n heerser aan hierdie tipe armoede lei, moet daar baie vir die heerser gebid word, want die kruispaaie van goeie en verkeerde weë lê dan gereeld voor die heerser. Gebed van andere kan die heerser help rig om weer te herstel van die seer en salwing kan die heerser weer ontvanklik maak vir My Liefde. Amein.

Al hierdie tipes oorsake vir armoede is 'n bewys van wat die siel nodig om 'n goeie diens te verrig. Elke siel kan haarself hiermee ondersoek om te sien in watter groef sy verval het, want slegs die siel wat heel is en My waarlik lief het, sal tot seën van ander siele kan handel. Ek wil dat elke siel die plek van seën vind, voordat haar aardse lewe verbygegaan het, daarom het Ek die aardse lewe toegelaat. Daardie plek is die eenwording met My Gees van Liefde. Dit omvat al die volmaakte vorme van Liefde vir My, die self en die naaste. In daardie vorm is die siel herstel in haar eersgeskape orde om te dien en kan Ek enige taak aan die siel oplê. Amein.

Leer My kleintjies dat daar herstel en bekering bestaan vir alle armoede, omdat dit spruit uit die toestand van harte. Ek

moet egter vir alle armoede van Liefde, vleeslike armoede inspan om die harte weer te veredel, voordat daar enige seën in die vlees reg gebruik sal word. Amein.

Die grootste les wat My kindertjies sal baat in hierdie verband is om hulle te leer bid om My aan te roep as Hulp en Versorger. Geen mens kan sy lot vir goed verander deur self sy sorg te probeer bewerk nie. Indien dit nie gepaard gaan met intense gebed en afhanklikheid dat My Wil sal geskied en Ek so die siel sal vorm na My Wil nie, sal die sorg kort voor lank agterweë bly en die siel van vooraf dwing tot hierdie gebed. Leer daarom My kindertjies van kleins af om so tot My te bid. Sê die ootmoedige gebed van die Onse Vader saam met hulle op as basis en volg daarna, soos dae verloop met ander gebede uit die hart om hulle te leer om afhanklik te wees van My sorg, leiding en Liefde. Gee aan hulle die geleentheid om self sulke gebede voor ander te bid en help hulle sagkens reg as daar verkeerde bewoording in die gebede is, na afloop van die gebed. Amein.

Hierdie voorbeeld van gebed is een van die grootste werke wat opvoeders as seën van 'n gemeenskap kan aanwend en My Krag en Liefde sal julle hierin bystaan as die wil daar is om die kindersiele op die Weg na My te lei. Amein.

Ek wil die armoede wegneem, maar solank dit in die harte heers, is die resultaat in die vlees onveranderlik. Bring die nood en afhanklikheid na My en Ek sal eers die harte en dan die toestand van die vlees daarmee aanraak. Amein.

Hierdie les is 'n deurlopende les in die opvoeding van 'n kind en moet altyd as verwysing dien om te sorg dat die kind die belangrikheid daarvan sal besef. Ek wil dat elkeen die armoede van siel teenwerk wat met onkruidsade begin. Rig daarom jou oë op na My Liefde en vra My om die onkruid uit te wys soos wat dit in die lewe kom op jou hart se grond, dat dit nie die goeie grond inneem en alle oeste verdring nie. Amein.

HOOFSTUK 17

Vuilheid

Die vuilheid van die vlees belemmer die suiwerheid van die Gees om met krag te kan werk. Hoe kan die vuilheid van die vlees uitgeken word vir heiliges, aangesien dit die wedergeboorte weerhou? Ek sal aan elkeen sy eie vuilheid uitwys as die siel My daarom vra, tog is daar stappe wat die siel kan volg om seker te maak dat die algemene vuilheid mee weggedoen is. Amein.

Die eerste stap wat Ek vra van alle siele wat hulleself uit die materie wil lig nader aan My is om met Barmhartige oë na hulle naaste te kyk. In die lig van die barmhartigheid is begrip opgesluit vir 'n siel se harde wilshandelinge en kan die Lig wat Ek dan in die toeskouer plaas, die harde handelinge openbaar aan die siel wat so handel. In die Lig van My Barmhartige Liefde sal die ander een sy foute raaksien. Beskou so die Lig wat julle uitstraal na My klein kindertjies. Indien jou sagtheid in strengheid aan die kind toon dat hy of sy nou 'n groot fout begaan het, hoef slegs die mate van Barmhartigheid genoeg tugtiging te wees in sommige misdade of oortredings. Indien die siel van die kind sag genoeg is om die hardheid van sy oortreding in die Lig wat van jou uitstraal, waar te neem, sal dit intense berou by die kind meebring en is harde tugtiging onnodig. Die kind sou egter nie gelei gewees het om berou te beleef indien die Lig van volmaakte Liefde hom of haar nie gewys het op sy foute nie. Beskou daarom die situasie van oortreding en versoening met baie deernis en bid om insig om die mate van teregwyding te gebruik wat by die siel pas. Amein.

Hierdie Lig van Barmhartigheid is in elkeen se eie siel ook

beskikbaar om Lig te werp op die eie vuilheid, want in My Lig kan daar geen ander vuilheid standhou in 'n siel nie. Solank die siel in 'n ootmoedige toestand van Liefde teenoor My staan, is daar nie grond vir enige ander duistere gedagte of handeling nie. Onderzoek dus die eie siel om die Liefde vir My daarin te beoordeel en daarmee ook die Lig wat voortvloei vanuit die siel na andere. Indien die Lig genoeg is om aan ander 'n son te wees, is die Liefde in die siel in die korrekte orde en moet daarop voortgebou word. Indien die siel egter ander ontstuiwig maak terwyl hulle in toestande van Liefde verkeer het, moet noukeurig gevra word of dit as gevolg van Lig of Duister uitstralings ontstuiwig geraak het in ander. Die antwoord is gewoonlik maklik te vind. Amein.

Nou moet die siel in hierdie uitstraling van Lig absolute nederigheid toepas om nie woorde saam met die Lig te laat vloei buiten waar kinders onderrig word nie. Slegs kindersiele in jou sorg mag gelei word om hulle eie foute reg te stel. In die volwasse siele rondom jou, moet die Liefde die aandrywing wees tot bekering en daarom moet die leidende Lig onder die groep baie gebed toepas om Liefde die oorheersende krag te hou. Amein.

Ek kan nie die groep nader as daar geen Liefde vir My bestaan nie, maar Ek kan die Liefde wat bestaan seën deur My Lig en so almal uit die kluistering van hulle eieliefde verlos wanneer daar selfs 'n sweempie van Liefde vir My onder 'n groep mense bestaan. Moet dus nie jouself ophou met 'n groep waar daar nie Liefde vir My te vinde is nie, maar beweeg aan na 'n volgende, tot die Lig wat daar uitgestraal word, jou siel aanspoor tot meer en groter Liefde. Die doel op hierdie aarde is nie om 'n hoeksteen in 'n groep te wees waar Ek die minste tyd en prioriteit inneem nie, maar om My die eerste prioriteit te maak en so My Lig

neer te laat op hierdie aarde. Indien Ek dan 'n groep op jou pad stuur waar meer Lig deurlopend ontvang word, moet die siel My ewige eenheid daarin ondersoek om te sien of dit wel 'n neerlating van die volmaakte suiwerheid is. Indien dit so is, kan die siel vir die res van haar dae daar diens doen, maar altyd met die skaal van Lig en Liefde in die een hand, want sodra die Liefde vir My uit die groep wyk, sal die Lig ook wyk en sal die siel weer moet aanbeweeg om 'n eenheid in My te vorm in 'n ander groep. Amein.

Vuilheid is dus alles wat teen die Lig van My Liefde staan en dus duister. Vuilheid is maklik ten toon te stel aan die kindertjies van My Liefde. Laat een kindjie in vuil grond, gras en blare rol en laat die ander dit vir hom afskud. Verduidelik dan dat die siel onaangeraak is deur die vuil, maar nie diensbaar is in die vuil toestand nie. Solank die siel dan ongemaklik is met sy eie vuilheid van blare, stof, grond en sand, voel dit beswaard daarmee en kan geen diensbaarheid van die siel verwag word nie. Die siel sal dan eers gehelp wil word om skoon te kom deur sagte afborseling en skoonskud en selfs soms die was van kledingstukke voordat dit weer vrymoedig sal help om enige werk te verrig. Net so is die siel in die mens gepla met die vuil wat aan hom vasklou van waarmee hy homself ookal besig gehou het. Vuilheid is dus nie iets wat die siel op haarself vergader, sonder om iets te doen wat dit meebring nie. Indien 'n siel haar weerhou van verkeerde handeling en selfs gedagtes, sal 'n suiwer toestand gehandhaaf kan word, maar indien 'n siel haar soos 'n vark in die vuil gaan baai, wat selfs soms stinkende vuil kan wees, sal die vuil aan die siel kleef, tot hulp gevra is om die siel te help reinig. Ek self kan ook die hulpgewer wees, maar omdat die siel nie die hulp kan sien en beleef soos met die fisiese hulp van 'n geliefde nie, is dit 'n langsaam en moeiliker weg – slegs tot die siel ontwaak genoeg is in die

gees om meer waarde te heg aan My hulp as aan die van 'n ander persoon. Amein.

Vuil op hierdie aarde kan in vlakke gemeet word vir die skade wat dit aan gesondheid kan aanrig. Die 'bietjie' vuil wat hierbo bespreek is, kan so smetterig en giftig raak, dat 'n mens se hulp te min raak om die siel weer daarvan te suiwer. Dit is daarom so belangrik om die situasie waarin jy jouself inlaat te ondersoek om te bepaal hoeveel van My Lig daar wel te vind is. Indien My Lig nie gevind kan word nie, sal die vlak van vuilheid dalk te diep wees om weer in hierdie aardse lewe suiwering te vind. Bly daarom daar weg. Leer My kindertjies om My so lief te hê dat hulle geestesoe geopend kan kyk na omstandighede en mense om hulle en so te weet dat My Liefde daar is of nie. Ek wil die beste vordering en groei vir hulle bewerk tydens hierdie aardse bestaan en dit kan net gebeur indien My kleintjies verbeter uit hulle toestand en nie vuiler word nie. Amein.

Suiwere lewenswandel is gekoppel aan Liefde vir My, nie aan My Liefde vir julle nie. Die verantwoordelikheid om suiwer te lewe is daarom 'n opdrag en wilsbesluit. Suiwer lewenswandel kan aan My klein kindertjies voorgehou word as water se helderheid wat deursigtig, teenwoordig, weerkatsend, suiwerend en sag is. Enige vertroebeling is onsuiver voor My en voortspruitend uit liefde vir die vleeslike behagings en besit. Amein.

Gloei as 'n hemelse lig vir almal om jou deur jou hart elke dag te verseël in My Liefde. Bid dit voor enige werk begin en sluit die dag daarmee af as maatstaf tot heiligheid. Amein.

HOOFSTUK 18

Vrede

Hiermee stuur Ek 'n Lig van die Hemele na julle om julle harte se vertroebeling op te klaar. Vir elkeen wat hierdie woorde lees, gee Ek 'n kragtige versterking om julle naby My te hou in die kalm waters wat tussen julle lê. Ek is die Jahshua-Miriam ANKER van VERLOSSING wat julle uit die wêreld se maalkolk van vernietiging wil trek en in Eenheid met My Wese wil verkwik. Laat My toe deur uit te roep na My om julle uit die water te trek en op die water te laat loop aan My sy. Amein.

Vrede is 'n moeilike begrip om aan 'n kind oor te dra, maar omdat Ek julle vrede gee in die Waarheid wat Ek hier in julle hand plaas om My Kleintjies mee te onderrig, sal daar vrede in julle harte wees oor die onderrigmateriaal. Verdere vereistes van vrede sal julle help om dit aan My kindertjies oor te dra op die geskikste maniere vir hulle harte om dit in hulle op te neem. Neem byvoorbeeld die rustigheid van die planteryk in die onderrigmateriaal. Indien die kindertjies met tye in stilte gelaat word om plante, hulle groei en vorms te bestudeer en te oordink wat hulle tot lewe wek, sal die kindertjies spoedig die vreedzaamheid van ywer begin ontleed. Gee dan aan die kindjie die geleentheid om skeppend te werk en vra dat dit in dieselfde stilte van die so pas bestudeerde natuur moet geskied en die kindjie sal begin verstaan dat vrede lewe en skeppende krag behels. Gee vervolgens aan die kindjie die geleentheid om waterlewe te bestudeer en lig die vermoë van die wesens binne die water se beweging uit om met ywer te groei, te beweeg en te voed en maak die kindjie so bewus van die stilte en selfstandigheid waarmee die natuur te werk gaan

om te bly voortbestaan. Vrede beteken dus nie rus van alle handelinge nie, maar 'n eenheid van aktiwiteite en lewe om voortbestaan te verseker, sonder enige weerspannige optredes. Amein.

Die grootste teenwerker van vrede is die mens se vrye wil wat elkeen die eie belange voorop stel en daarna eers na die naaste omsien. Indien die mens dit bemeester om die naaste te dien in die noodsaaklike situasies wat na vore kom, sal daar vrede in almal se harte heers. Die belangrikste bewerkker van vrede is dat die siel haar eie belange moet prysgee in die dien van die ander se belange. Daar sal wel genoeg tyd en ruimte wees om die self te versorg nadat die ander se behoeftes vervul is. Selfs by die sorg van selfsugtige kindersiele wat geen begrip het vir die behoeftes van ouer mense nie, moet die sorg, nie die bederf van die siele na omgesien word, voordat daar na die self gekyk word. Die onderskeid tussen sorg en bederf is 'n fyn lyn tussen bekragtiging en ontneming van krag van 'n siel. Elke 'sorg' moet goed beoordeel word in 'n hemelse gebed om te onderskei of dit wel die siel baat of te na kom deur toe te gee. Indien dit 'n behoefte van die siel is om tot groei te dien, moet dit eerste prioriteit geniet. Indien dit egter die siel se volmaakte groei sal skaad, moet dit gelaat word om in die niet te verdwyn. Kinders aanvaar gewoonlik met moeite dat 'n behoefte nie aan voldoen kan word nie. Die 'harde werklikheid' is hier waarlik van toepassing, want indien dit tot 'n siel se nadeel is, is dit in die 'werklikheid' van die gees 'n nietige versoek. Stel hiermee die volgende les aan My kindertjies rakende vrede, naamlik die ewigdurende waarde van 'n behoefte.

Bespreek elke behoefte as sorg vir 'n siel op die aarde of in die hiernamaals. Indien dit slegs vir die aarde is, bring dit

geen vrede mee nie, want die bevrediging 'raak op'. Dit moet herhaaldelik henu word. Indien die bevrediging in die ewige is, maak dit 'versadig' en sal die honger vir dieselfde bevrediging nie terugkeer nie. Die behoefte sal verseker skuif na iets groters en meer omvangryk, soos wat die siel in My groei en meer nodig het om ewig te ontwikkel. Amein.

Hoe moet dit dan gedemonstreer word aan 'n kind? Gebruik die voorbeeld van 'n plantjie in die grond. Wanneer die plantjie tot lewe kom, het dit baie water in klein hoeveelhede nodig. Die wortelstelstel sal sodoende vergroot, totdat die plantjie groter hoeveelhede water op een slag kan verdra en verbruik. Die water bly 'n behoefte, maar die hoeveelheid daarvan en die benutting daarvan verskil van die begin na die einde van ontwikkeling. Later-aan sal blare, blomme, vrugte en sade deur die gebruik van die water voortgebring word. Dit bly afhanklik van die water, maar tot diens en nut van meer as die self. Die vrede-aspek word hier aangespreek deur die omsetting van die krag wat ontvang word tot 'n krag wat dien en so die energie versprei. Indien die energie binne die omvang van die opnamehouer moet bly, word die vrede versteur en kan die opnamehouer nie die energie alles verbruik nie. Dit veroorsaak woeste waters.

Hierdie les kan dus gebruik word in die verduideliking van enige onderrigmateriaal wat betrekking het op die opneem van energie as 'n behoefte en daarna die verbruik daarvan in diens of tot gebruik van ander. Indien die energievloei geblokkeer word om op die self en die bevrediging van eie behoeftes te fokus, sal die ewewig van die lewende organisme versteur word en vrede teengewerk word. Wees daarom 'n nuttige herleier van My Energie as Krag uit die Gees wat Ek aan julle open en dien My Skepping daarmee. Amein.

Vrede is dus die Liefde wat beleef word wanneer arbeid verrig word, want dit is My Krag wat deur die arbeider vloei. Hierdie Liefde is ewig en Lig deurlatend. Indien die arbeid gestaak word, kwyn die Lig en die Liefde ook in so 'n mate dat dit slegs herstel kan word indien arbeid weer in werking gestel word. Daarom het Ek tydens My wandel op aarde opdrag gegee dat daar aan julle siele gearbei moet word. Dit stel die Liefde in staat om in julle te vergroot en dit is die onderhouding van My gebod. Amein.

Hierdie kan aan My Kindertjies verduidelik word deur die voorbeeld van 'n moederhen. Sy lê haar eiers met die geloof en hoop dat daar kuikens sal voortkom uit haar eiers. Sy het haar nes ywerig berei en hou dan haar eiers met toewyding warm vir die volgende paar weke. Sodra die kuikens uitbroei, begin haar taak om geduld toe te pas met hulle manewales en voedselbehoefes. Wanneer sy die kuikens gehelp het om self kos te gaan soek en 'n lêplek in die nag te vind, is haar taak volbring en kan die kuikens self aanbeweeg in hulle bestaan. Hier het die moederhen vrede gevind in elke taak as 'n tydelike noodsaaklikheid in die voortbestaan van lewe. Sy moes elke fase se toewyding met al My eienskappe aanpak om te sorg dat die nuwe lewe sal ontwikkel soos wat dit bestem is. Slegs oorgawe in die arbeid sal die moederhen met vrede laat om voort te gaan en die taak te voltooi van die begin tot die einde. Amein.

Ek wil hê dat al My Kindertjies beurte moet kry om hierdie vrede in die lewe om hulle raak te sien en te verwoord. So sal daar baie Lig instroom in hulle siele as hulle vind hoeveel arbeid daar rondom hulle geskied om lewe aan die gang te hou en dat daar geen klagtes bestaan, behalwe by die mens waar die eiebelange die wiel se beweging stop nie. Beskou dan die voortbeweging van seisoen tot seisoen en die

aanvaarding en loop van gebeure wat mekaar opvolg van jaar tot jaar. Onderzoek die natuur wat haar plig uitvoer in die voortbring van plantjies en diere, die weer wat voortrol om kenmerkende dinge te doen in elke seisoen en die son wat betroubaar daar is elke dag. Beskou die vrede wat verantwoordelikheid en betroubaarheid daarstel, sodat elke ander lewende afdeling sy holte in My Hand kan benut. So wil Ek ook 'n plek vir elkeen wat Ek in die lewe gestel het, gee. Indien die afhanklikes hulle afhanklikheid aan My erken en in vrede hulle arbeid verrig om ander afhanklikes te dien, sal hulle ontwikkeling en sorg in My Hand wees en kan Ek seën en toevertrou soos wat Ek Wil. Amein.

Hierdie les oor vrede is 'n moeiliker les wat 'n kind met die loop van ontwikkeling beter sal leer begryp. Moet dit dus nie net in een fase van onderrig aanraak nie, maar verwys gereeld daarna in die bespreking van lewe. Amein.

Ek wil dat elke mens hierdie beginsel in homself vaslê as hoeksteen van lewe, want daarin is Ek te vind en kan Ek met 'n siel gemeenskap hou. Indien die siel vol vrede, liefde en afhanklikheid na My kyk, kan die siel My hoor in alles wat Ek het om met die siel te deel. Indien die siel egter een van daardie aspekte in wanbalans laat, sal My stem onhoorbaar bly en die siel al hoe meer spartel en vrede verloor in die soeke na eie krag om arbeid mee te verrig. Amein.

Ek seën hierdie inligting in julle harte, sodat daar 'n eenheid onder My Kinders kan vorm, waar vreugde en dankbaarheid julle aanspoor om meer en meer arbeid van geesteswaarde te verrig. Amein.

HOOFSTUK 19

Sorg

In die bestudering van alles om die mens, kan daar duidelik gemerk word dat Ek die Sorg voorsien, sodat lewe aanhou vloei en voortbestaan. Sonder My Hand en Wil in alles, sou alles binne 'n baie kort tyd tot niet kon gaan. Net so sorg Ek vir die mensekinders op hierdie aarde, al beur hulle vooruit in die denke dat hulle hulle eie sorg kan bewerk. Dit is nie die waarheid nie. Om 'n kind te leer van geldsisteme en hoe geld vermeerder is nie in My wil nie, want dan koppel die kind waarde aan sorg, wat na ydelheid oorleun. Om 'n bord kos voor jou te hê, om geklee te wees in praktiese, diensbare kledingstukke, om 'n vesting te hê om in tuis te gaan en om die krag te hê om dit diensbaar in te rig en tyd oor te hê om ander te dien, is sorg wat 'n mens nie met waarde moet vergelyk met die van 'n ander nie. 'n Paleis se sorg is dieselfde sorg voor My as sorg in 'n wildernis. Indien aan alle behoeftes voldoen is, sodat die mens krag in homself ontvang om te arbei, is daar voldoende aan die siel verleen. Amein.

Hierdie sorg wat die wêreld so graag voorhou as beter as vir 'n ander, is die kern van My teenpool se bestaan, want daarmee word alle negatiewe eienskappe gevoed, wat teen My Liefde en Krag is. Ek wil dat daar in die leer wat julle aan My kinders voorhou geen melding gemaak word van betaling en verdienste nie, want My Lewe in die ewige is gebaseer op 'n hemelsbreë teenoorgestelde waardesisteem as wat tans op julle aarde in gebruik is. Ek gee aan almal genoeg om mee voort te bestaan, maar seën dit met 'n ewige waarde indien hulle afhanklikheid van My erken en die krag so eer deur Liefde en diensbaarheid. Amein.

In die mate waarin die afhanklike op My vertrou vir sorg, sal Ek voorsien en dit met ewigheidswaarde vermeerder. Beskou daarom julle lewens as 'n skatkis wat gevul moet word met ewige gawes en dat julle die waarde daarin toevoeg deur My toestroming van Krag in julle krag te vra en te eer. Indien Ek nie geken word in die bestaan en arbeid van 'n lewende nie, is daar nie 'n ewige bekleding, woning en Liefde in die siel te vind nie. Amein.

Al hierdie bied Ek julle aan as ewige sorg indien julle die beginsels van die lewe onderhou soos in hierdie Nuwe Bybel vir julle aangebied, want dit is julle ANKER VAN VERLOSSING in die teenpool se storm en oorweldigende mag. Amein.

My klein Kindertjies moet bewus wees van Krag om hulle, wat eksponensieel vermeerder kan word in arbeid, indien hulle My afhanklik en in Liefde daarvoor vra. Hulle moet My bestaan kan vind in alles om hulle en verstaan dat indien Ek erken word en daar met My saam 'n lewe geleef word, alle aardse waardes nietig is, omdat dit vergaan, maar dat Ek in My volheid die siel kan vul om aan haar ewige positiewe waardes toe te voeg. Amein.

Hoe moet hierdie aan 'n klein kindjie uitgebeeld word? Gebruik weer die voorbeeld van lig wat 'n ruimte vul. Indien die ruimte donker gelaat word, is dit vir niks diensbaar nie. Die lug verouder, groei en daarom kwyn krag weg, die spasie is beperk tot wat binne die grense lê, want alles buite is duister en onbekend en positiewe waardes raak moeilik te vind en uit te leef in die beperkte, donker ruimte. Indien daar lug binnestroom, is die grense verbreek en hernu dit die krag deurlopend binne die ruimte. Positiewe waardes is maklik te bou en 'n oorfloed van Krag is binne die ruimte se bereik. Hou dit aan die kind voor deur die voorbeeld van die hartsruimte. Indien die hartsdeur vir My geopen word, is die

waarde van die hart verhoog deur die toelating van My wat die ruimte rondom die hart beslaan. Ek is oneindig en bied daarom nie net oneindige horisonne om te verken nie, maar 'n oneindige toevloei van krag na die hart. Hierdie hart word dan 'n lewegewende ruimte om skeppings in te skep en te versorg en positiewe waardes te vergroot in die self. Koppel alle verwysings van sorg vir die kind aan hierdie hartsruimte, sodat die nuwe 'oorvloed' wat die kind ken, nie 'n dooie, groot getal is en alles wat daaraan vergelyk kan word nie, maar 'n bron van Lig, Lewe en Liefde. Amein.

Indien 'n kind My reeds op so 'n vroeë ouderdom as hierdie leer verstaan, sal die ewige omvang van My Wese te begryp word en binne My Kindertjies se bereik gestel wees. Maak dit 'n Liefde vir hulle deur hulle met opgewondenheid Lig en natuurklanke te laat ondersoek en waardeer. Maak van elke dag 'n nuwe geleentheid om iets mooi en nuut van die natuur aan hulle as ewige skat uit te wys en na te laat. Amein.

Ek sorg vir al My Kinders, maar Ek oorweldig die wat My waarlik liefhet met 'n vloed van Lewende Water, so sterk soos wat die siel dit kan hanteer. Amein.

HOOFSTUK 20

Liefde

Hiermee is nog 'n hoofstuk in die Boek van Liefde voltooi. Weer sal Ek met julle in My aarde spreek om julle weë na My te rig en meer van julle met My te verenig, want elke boek spreek tot die siele van 'n ander groep mense. Die Liefde in die harte van My Kinders is al wat Ek nodig het om 'n ewigheid se skeppings tot die huidige by te voeg. Liefde wek dankbaarheid, diensbaarheid en ootmoed. Hierdie waardes is van ewige belang in die ontwikkeling van 'n siel. Indien 'n siel nie daarby uitkom nie, sal geen bruikbaarheid en groei by die siel te vinde wees nie. Amein.

Die Liefde wat onder julle heers is goeie voorbeelde wat aan My Kinders voorgelê kan word, mits dit onselfsugtige belange uitbeeld. Elke Liefde wat in die onderrig-opset bygevoeg word, moet eers gemeet word aan die mate van verhoging wat dit My Ewige bestaan bied en die mate van Liefde wat dit by My Kinders wek tot onderhouding van al die geboorte van My Liefde. Amein.

Liefde is 'n basis, 'n wyse van bestaan, 'n medium tot Krag, dit is nie 'n toevoeging tot 'n lys van ander dinge nie. Indien die Liefde wat Ek aan Moses (Moshé) gegee het as waardesisteem vir Lewe nie onderhou word nie, kan die Liefde nie groei tot meer Liefde en groter diensbaarheid nie. Begin daarom altyd daarby en brei uit daarop met opvolgende lesse van onvoorwaardelike Liefde. Alles om julle praat die taal van My Liefde. Net die mens loop op afdraaipaaie weg van daardie taal. Dit is die taal wat verwar is by die toring van Babel. Geen groep mense het meer dieselfde taal van Liefde gepraat nie en daarom het hulle

mekaar vernietig in plaas daarvan om verder te bou aan hulle doel. Die verskynsel herhaal homself altyd by groepe mense waar die suiwer, ewige Liefde weggewys word om aan ander liefdes 'n groter plek in die hart te bied. Open altyd die groep se hart tot My Liefde en bou voort daarop, andersins kan die ewige taal nie onder julle ontwikkel nie en sal daar nie 'n Kanaän gevind word waar almal in My seën en sorg kan deel nie. Amein.

Ek breek hierdie Brood deur die hande van My Koningin van Liefde, Miriam, om aan almal 'n verhoging van sielevlak te bied. Dit is genoeg om elke siel te laat deurbreek na die ewige lewe wat versoen is deur haar in My. Ek kus elkeen op die voorhoof soos 'n Vader Sy Kinders na 'n lang tyd van afwesigheid en bestraal julle met My Liefde wat sonder einde is. Amein.

Word een met hierdie Waarhede wat Ek in julle hande geplaas het en leer dit aan al die Kinders van My Liefde wat in jou sorg is. Elkeen van hulle het nodig om in hierdie laaste dae die redding vanuit My teenpool se mag te ontvang. Ek roep My Engele wat op aarde beliggaam is om hulle take op te neem, want die wiel het gedraai. Amein.

Dit is die einde van hierdie boek in My Nuwe Bybel aan julle. Ek, Jahweshua-Miriam-Gees is onder julle om julle harte van alle vroeëre bande te verlos en bied aan elkeen die Krag daarvoor as die siel My daarom vra. Amein.

Julle Liefdevolle Skepper wat alles in stand hou, hou ook jou hart se uitnodiging dop, want daarop volg die ewige bekragtiging.

Amein.

